

ओं नमः परमात्मने, श्री महागणपतये नमः,

श्री गुरुभ्यो नमः

हरिः ओं

कृष्ण यजुर्वेदीय तैत्तिरीय संहिता

पञ्चमं काण्डं

Note: Please refer to the book, TS Kandam 1 for notes and conventions used in this Compilation.

Table of Contents

5 कृष्ण यजुर्वेदीय तैत्तिरीय संहितायां पञ्चमं काण्डं	3
5.1 पञ्चमकाण्डे प्रथमः प्रश्नः – उख्याग्निकथनं	3
5.2 पञ्चमकाण्डे द्वितीयः प्रश्नः – चित्युपक्रमाभिधानं	31
5.3 पञ्चमकाण्डे तृतीयः प्रश्नः – चितीनां निरूपणं	61
5.4 पञ्चमकाण्डे चतुर्थः प्रश्नः – इष्टकात्रयाभिधानं	85
5.5 पञ्चमकाण्डे पञ्चमः प्रश्नः – वायव्यपश्चाद्धानं निरूपणं	111
5.6 पञ्चमकाण्डे षष्ठः प्रश्नः – उपानुवाक्याभिधानं	138
5.7 पञ्चमकाण्डे सप्तमः प्रश्नः – उपानुवाक्यावशिष्टकर्मनिरूपणं ...	164

=====

ओं नमः परमात्मने, श्री महागणपतये नमः,

श्री गुरुभ्यो नमः , हरिः ओं

5 कृष्ण यजुर्वेदीय तैत्तिरीय संहितायां पञ्चमं काण्डं

5.1 पञ्चमकाण्डे प्रथमः प्रश्नः – उख्याग्निकथनं

TS 5.1.1.1

सा॒वि॒त्राणि॑ जु॒होति॑ प्र॒सू॒त्यै चतु॑र्गृही॒तेन॑ जु॒होति॑ चतु॒ष्पादः॑ प॒शवः॑
प॒शूने॒वाऽव॑ रु॒न्धे चत॑स्रो दि॒शो दि॒क्ष्वेव॑ प्र॒ति तिष्ठ॑ति छन्दा॒ऽसि
दे॒वेभ्यो॑ ऽपा॒ऽक्रामन्॑ न वो भा॒गानि॑ ह॒व्यं वक्ष्या॑म इति॒ तेभ्य॑
ए॒तच्च॑तु॒र्गृही॑तम॒धारय॑न् पु॒रोऽनु॑ वा॒क्यायै॑ या॒ज्यायै॑ दे॒वतायै॑
व॒षट्का॒राय॑ यच्चतु॒र्गृही॑तं जु॒होति॑ छन्दा॒ऽस्येव॑ तत् प्री॑णाति
ता॒न्यस्य॑ प्री॒तानि॑ दे॒वेभ्यो॑ ह॒व्यं वह॑न्ति यं का॒मये॑त – [] 1

TS 5.1.1.2

पा॒पी॒यान्त् स्या॒दित्ये॑कै॒कं तस्य॑ जु॒हुया॑-दा॒हुती॑भि॒रेवैन॑मप॒ गृह्णा॑ति
पा॒पी॒यान् भव॑ति यं का॒मये॑त व॒सी॒यान्त् स्या॒दिति॑ सर्वा॒णि
तस्या॑ऽनु॒द्रुत्य॑ जु॒हुया॑दा॒हुत्यै॑वैन॒मभि॑ क्र॒मय॑ति व॒सी॒यान् भव॑त्यथो

य॒ज्ञस्यै॒वैषा-ऽभि॒क्रान्ति॑रेति॒ वा ए॒ष य॒ज्ञमु॒खा-दृ॒द्ध्या योऽग्ने॑र्दे॒वता॑या
ए॒त्यष्टा॑वे॒तानि॑ सा॒वित्रा॑णि भवन्त्यष्टाक्षरा गायत्री गायत्रौ - [] 2

TS 5.1.1.3

ऽग्नि॑स्तेनै॒व य॒ज्ञमु॒खादृ॒द्ध्या अ॒ग्नेर्दे॒वता॑यै नैत्यष्टौ सा॒वित्रा॑णि
भव॑न्त्याहु॒तिर्न॒वमी॑ त्रि॒वृ॒तमे॒व य॒ज्ञमु॒खे वि॒यात॑यति यदि का॒मये॑त
छन्दा॑ँसि य॒ज्ञय॑श॒सेना॑ ऽर्प॒येय॑मित्यृ॒चम॑न्त॒मां कुर्या॑च्छन्दा॑ँस्ये॒व
य॒ज्ञय॑श॒सेना॑ऽर्प॒यति॑ यदि का॒मये॑त यज॑मानं य॒ज्ञय॑श॒सेना॑-ऽर्प॒येय॑मिति॒
यजु॑रन्त॒मं कुर्या॑द्-यज॑मानमे॒व य॒ज्ञय॑श॒सेना॑-ऽर्प॒यत्यृ॒चा स्तोम॑ँ
सम॑र्द्धयेत्या - [] 3

TS 5.1.1.4

-ह॒ समृ॑द्ध्यै चतु॒र्भिर॑भि॒मा द॑त्ते च॒त्वारि॑ छन्दा॑ँसि छन्दा॑ँभिरे॒व
दे॒वस्य॑ त्वा स॒वितुः॑ प्र॒सव॑ इत्या॒ह प्र॒सूत्या॑ अ॒ग्निर्दे॒वेभ्यो॑ नि॒लाय॑त
स वे॒णुं प्रा॑ऽवि॒शथ् स ए॒तामू॑तिमनु॒ सम॑च॒रद्-यद्-वे॒णोः सु॑षि॒रँ
सु॑षि॒रा-ऽभि॑र्भवति स॒योनि॑त्वाय॒ स य॒त्रय॑त्रा॒ऽवस॑त् तत् कृ॒ष्णम॑भवत्
कल्मा॑षी भवति रू॒पसमृ॑द्ध्यै उ॒भय॑तः क्षू॒णोर्भ॑वती॒तश्चा॑ऽ-()
-मु॒तश्चा॑ऽर्कस्या-व॒रुद्ध्यै॑ व्याम॒मात्री॑ भवत्ये॒ताव॑द्वै पु॒रुषे॑ वी॒र्यं

वी॒र्य॑स॒मि॒ता ऽप॑रि॒मि॒ता भ॑वत्य-प॒रि॒मि॒तस्या॑ वरु॒द्ध्यै॑ यो वनस्पतीनां
फल॒ग्र॒हिः स ए॑षां वी॒र्या॑वान् फल॒ग्र॒हिर्वे॑णु-वै॒ण॒वी भ॑वति वी॒र्य॑स्या
वरु॒द्ध्यै॑ ॥ 4

(काम॑र्य॒त - गा॒य॒त्रो - ऽर्द्ध॑येति - च - सप्त॑विं॒शति॑श्च) (A1)

TS 5.1.2.1

व्यृ॒द्धं वा॑ ए॒तद्-य॒ज्ञस्य॑ यद॒यजु॑ष्केण क्रि॒यत॑ इ॒माम॑गृ॒भ्णन्
र॒श॒ना-मृ॒तस्ये॑त्यश्वाभि॒धानी॑मा द॒त्ते यजु॑ष्कृत्यै य॒ज्ञस्य॑ समृ॒द्ध्यै॑ प्र॒तूर्त॑
वा॒जि॒न्ना द्र॒वेत्य॑श्चम॒भि द॑धाति रू॒पमे॒वास्यै॑तन् म॒हि॒मानं॑ व्याच॒ष्टे
यु॒ञ्जा॒था रा॑स॒भं यु॑वमि॒ति ग॑र्दभमसेत्ये॒व ग॑र्दभं प्रति ष्ठापयति
तस्मा॑दश्वाद्-ग॒र्दभो॑ऽस॒त्तरो॑ यो॒गेयो॑गे त॒वस्तर॑मित्याह - [] 5

TS 5.1.2.2

यो॒गेयो॑ग ए॒वैनं॑ यु॒ङ्क्ते॑ वा॒जेवा॑जे ह॒वाम॑ह इ॒त्याहा॒न्नं वै॑ वा॒जो-
ऽन्न॑मे॒वाव॑ रुन्धे स॒खाय॑ इन्द्र॒मू॒तय॑ इ॒त्याहे॑न्द्रि॒यमे॒वाव॑ रुन्धे
ऽग्नि॑र्दे॒वेभ्यो॑ नि॒लाय॑त तं प्र॒जाप॑तिरन्वविन्दत् प्रा॒जाप॑त्योऽश्नो
ऽश्ने॑न सं भ॒रत्य॑नु॒वित्यै॑ पा॒पव॑स्यसं वा ए॒तत् क्रि॑यते यच्छ्रे॒यसा॑
च पा॒पीय॑सा च स॒मानं॑ क॒र्म कु॑र्वन्ति पा॒पीया॑न्. - [] 6

TS 5.1.2.3

ह्य॑श्वाद्-ग॒र्दभोऽ॒श्वं पूर्वं॑ न॒यन्ति॑ पा॒पव॒स्य-स॒स्य व्यावृ॑त्त्यै
तस्मा॑च्छ्रेया॒ऽसं पा॑पी॒यान् प॒श्चाद॑न्वेति॒ बहु॑र्वे भवतो॒ भ्रातृ॑व्यो
भव॑तीव॒ खलु॒ वा ए॒ष योऽ॒ग्निं चि॑नुते॒ वज्र्य॑श्वः प्र॒तूर्व॑न्नेह्यव-
क्राम॑न्न-श॒स्तीरि॑त्याह॒ वज्रे॑णैव पाप्मानं॒ भ्रातृ॑व्यमव॒ क्राम॑ति
रुद्र॑स्य गा॒णप॒त्यादि॑त्याह॒ रौद्रा॑ वै प॒शवो॑ रुद्रादेव - [] 7

TS 5.1.2.4

प॒शून् नि॒र्याच्याऽऽ॒त्मने॑ कर्म॒ कुरु॑ते पू॒ष्णा स॒युजा॑ स॒हेत्या॑ह पू॒षा
वा अ॒ध्वना॑ऽ स॒न्नेता॑ सम॒ष्ट्यै पु॒रीषा॑यतनो॒ वा ए॒ष यद॑ग्निरङ्गिर॒सो
वा ए॒तम॑ग्रे दे॒वता॑ना॒ऽ सम॑भरन् पृथि॒व्याः स॒धस्था॑द॒ग्निं पु॒रीष्य॑-
मङ्गि॑रस्व-दच्छे॒हीत्या॑ह सा॒यत॑नमे॒वैनं॑ दे॒वता॑भिः सं भ॒रत्य॑ग्निं
पु॒रीष्य॑-मङ्गि॑रस्व-दच्छे॒म इत्या॑ह येन - [] 8

TS 5.1.2.5

स॒ङ्गच्छ॑ते वा॒जमे॒वास्य॑ वृ॒द्धे प्र॒जाप॑तये प्र॒तिप्रो॑च्या॒ग्निः स॒म्भृत्य॑
इत्या॑हुरि॒यं वै प्र॒जाप॑तिस्तस्या ए॒तच्छ्रो॑त्रं य॒द्वल्मी॑कोऽ॒ग्निं पु॒रीष्य॑-
मङ्गि॑रस्वद्-भ॒रिष्या॑म॒ इति॑ वल्मीकव॒पामु॑प तिष्ठते सा॒क्षादे॒व

प्र॒जा॒प॒तये॑ प्र॒तिप्रो॒च्याऽग्निं॑ सं भ॒रत्य॑ग्निं पु॒री॒ष्य-म॒ङ्गिर॑स्वद्-भ॒राम॑
इ॒त्याह॑ येन॑ सं॒गच्छ॑ते वा॒जमे॒वास्य॑ वृ॒द्धे ऽन्व॑ग्निरुष॒साम॑ग्र - [] 9

TS 5.1.2.6

म॒ख्यदि॒त्याहा-नु॒ख्या॒त्या आ॒गत्य॑ वा॒ज्यद्ध्व॑न आ॒क्रम्य॑ वा॒जिन्
पृ॒थि॒वीमि॒त्याहे॒च्छत्ये॒वैनं॑ पू॒र्वया॑ वि॒न्दत्यु॑त्तर॒या द्वा॒भ्यामा॑ क्र॒मय॑ति
प्र॒तिष्ठि॒त्या अ॒नुरू॒पाभ्यां॑ तस्मा॒दनु॒रूपाः॑ प॒शवः॑ प्र॒जाय॑न्ते द्यौ॒स्ते पृ॒ष्ठं
पृ॒थि॒वी स॒धस्थ॑मि॒त्याहै॒भ्यो वा ए॒तं लो॒केभ्यः॑ प्र॒जाप॑तिः स॒मैर॑यद्
रूप॑मे॒वास्यै-त॑न्महि॒मानं॑ व्या॒चष्टे॑ व॒ज्री वा () ए॒ष यद॑श्चो
दद्-भि॒रन्य॑तो॒दद्भ्यो॑ भू॒यां लो॒मभि॑रु॒भया॑दद्भ्यो॒ यं द्वि॒ष्यात्
तम॑ध॒स्पदं॑ ध्या॒येद्-व॒ज्रेणै॒वैनं॑ स्तृ॒णुते॑ ॥ 10

(आ॒ह - पा॒पी॒यान् - रु॒द्रादे॒व - ये॒ना - ऽग्रं॑ - व॒ज्री वै -

स॒प्तद॑श च) (A2)

TS 5.1.3.1

उ॒त्क्रा॒मो-द॒क्रमी॑दिति॒ द्वा॒भ्यामु॒त्क्रम॑यति प्र॒तिष्ठि॒त्या अ॒नुरू॒पाभ्यां॑
तस्मा॒दनु॒रूपाः॑ प॒शवः॑ प्र॒जाय॑न्ते ऽप॒ उप॑ सृ॒जति॑ यत्र॒ वा आप॑
उप॑ गच्छ॒न्ति तदो॑ष॒धयः॑ प्र॒ति तिष्ठ॑न्त्योष॒धीः प्र॒ति तिष्ठ॑न्तीः प॒शवो॑ऽनु

प्रति॑ तिष्ठन्ति॑ प॒शून् य॒ज्ञो य॒ज्ञं यँज॑मानो यज॑मानं प्र॒जास्तस्मा॑दप
उप॑ सृजति॑ प्रतिष्ठित्यै॑ यद॑ध्वर्यु-र॒न॒ग्नावाहु॑तिं जुहु॒याद॒न्धो॑

ऽध्वर्युः - [] 11

TS 5.1.3.2

स्याद्-रक्षा॑सि॒ य॒ज्ञं ह॑न्युर्.हि॒रण्यमु॑पास्य जुहोत्यग्नि॒वत्ये॒व
जुहोति॑ ना॒न्धो-ऽध्वर्यु॑र्भवति॑ न य॒ज्ञं रक्षा॑सि घ्नन्ति॑ जिघर्म्यग्निं॑
मन॑सा घृतेनेत्याह॑ मन॑सा हि पु॒रुषो॑ य॒ज्ञम॑भिगच्छति॑ प्रतिक्ष्यन्तं॑
भुव॑नानि वि॒श्वेत्याह॑ सर्व॑ ह्येष॑ प्रत्यङ् क्षेति॑ पृथुं॑ ति॒रश्वा वय॑सा
बृ॒हन्त॑मित्याहाऽल्पो॑ ह्येष॑ जा॒तो म॒हान् - [] 12

TS 5.1.3.3

भवति॑ व्यचिष्ठम॒न्नं र॒भसं॑ वि॒दान॑मित्याहाऽन्नमे॒वाऽस्मै॑ स्वदयति॑
सर्व॑मस्मै स्वदते॑ य ए॒वं वे॒दा ऽऽ*त्वा॑ जिघर्मि॑ वच॑सा घृतेनेत्याह॑
तस्मा॑द्-यत् पु॒रुषो॑ मन॑सा-ऽभिगच्छति॑ तद्-वा॒चा वद॑त्य रक्ष॑सेत्याह॑
रक्ष॑सामप॒हत्यै मर्य॑श्रीः स्पृ॒हय॑द्-व॒र्णो अ॒ग्निरि॒त्याहा-प॑चितिमे॒वा-
ऽस्मिन् द॑धात्य-प॑चितिमान् भवति॑ य ए॒वं - [] 13

TS 5.1.3.4

ॐ वे॒द॒ मन॑सा॒ त्वै॒ तामा॑प्तुम॒र्हति॒ याम॑द्ध्व॒र्युर॑-न॒ग्नावा॑हुतिं जु॒होति॒
मन॑स्वती॒भ्यां जु॑हो॒त्याहु॑त्योरा॒प्त्यै द्वा॒भ्यां प्र॑तिष्ठित्यै य॒ज्ञमु॒खे य॒ज्ञमु॒खे
वै क्रि॒यमा॑णे य॒ज्ञञ् र॒क्षाञ् सि जिघा॑ञ् सन्त्ये॒तर्हि॒ खलु॒ वा ए॒तद्-
य॒ज्ञमु॒खं य॑र्ह्ये॒नदा॑हुतिर॒नुते॒ परि॑ लिखति र॒क्षसा॑मप॒हत्यै॒ तिसृ॑भिः
परि॑ लिखति त्रि॒वृद्वा अ॒ग्निर्या॑वाने॒वा-ऽग्नि॑स्तस्माद्-र॒क्षाञ् स्यप॑
हन्ति - [] 14

TS 5.1.3.5

गाय॒त्रिया॑ परि॒ लिख॑ति ते॒जो वै गा॑यत्री तेज॒सैवैनं॑ परिगृ॒ह्णाति॑ त्रि॒ष्टुभा॒
परि॑ लिखतीन्द्रि॒यं वै त्रि॒ष्टुगिन्द्रि॑येणै॒वैनं॑ परि॒ गृह्णा॑त्यनु॒ष्टुभा॒ परि॑
लिख॒त्यनु॒ष्टुप् सर्वा॑णि छन्दा॒ञ् सि परि॑भूः पर्या॒प्त्यै म॑द्ध्यतोऽनु॒ष्टुभा॒
वाग्वा अ॒नुष्टु॑प् तस्मा॒न् म॑द्ध्यतो वा॒चा व॑दामो गाय॒त्रिया॑ प्र॒थमया॒ परि॑
लिख॒त्यथा-ऽनु॒ष्टुभा॑ऽथ त्रि॒ष्टुभा॒ तेजो॒ वै गा॑यत्री () य॒ज्ञो
ऽनु॒ष्टुगिन्द्रि॑यं त्रि॒ष्टुप् तेज॑सा चै॒वेन्द्रि॑येण चो॒भयतो॑ य॒ज्ञं परि॑
गृह्णाति ॥ 15

(अ॒न्धो॑ऽद॒ध्वर्यु॑ - म॒हान् - भ॑वति॒ य ए॒व - ह॑न्ति -
त्रि॒ष्टुभा॒ तेजो॑ वै गा॒यत्री - त्रयो॑दश च) (A3)

TS 5.1.4.1

दे॒वस्य॑ त्वा स॒वितुः॑ प्र॒सव॑ इति॒ खन॑ति प्र॒सूत्या॑ अथो॒ धूम॑मे॒वैतेन॑
जन॑यति॒ ज्योति॑ष्मन्तं त्वा॒ग्ने सु॒प्रती॑क॒मित्या॑ह॒ ज्योति॑रे॒वैतेन॑ जन॑यति॒
सो॒ऽग्नि॑र्जातः॒ प्रजाः॑ शु॒चाऽऽर्प॑यत् तं दे॒वा अ॒र्धर्चे॑ना-श॒मय॑च्छिवं
प्र॒जाभ्यो॑ऽहि॒ सन्त॑मित्या॒ह प्र॒जाभ्य॑ ए॒वैन॑ श॒मय॑ति द्वाभ्यां॑ खन॑ति
प्रति॑ष्ठित्या॒ अपां॑ पृ॒ष्ठम॑सीति॒ पुष्कर॑पर्णमा - [] 16

TS 5.1.4.2

हर॑त्यपां॒ वा ए॒तत् पृ॒ष्ठं य॑त् पु॒ष्कर॑पर्ण॒ रूपे॑णै॒वैन॑दा॒ हर॑ति
पु॒ष्कर॑पर्णेन॒ सं भ॑रति॒ योनि॑र्वा॒ अग्नेः॑ पु॒ष्कर॑पर्ण॒ सयो॑निमे॒वाग्नि॑
संभ॑रति॒ कृष्णा॑जिनेन॒ संभ॑रति॒ यज्ञो॑ वै कृष्णा॑जिनं॒ यज्ञे॑नै॒व यज्ञ॑
संभ॑रति॒ यद् ग्राम्या॑णां॒ पशू॑नां॒ चर्म॑णा॒ संभ॑रेद् ग्राम्यान्
पशू॑ञ्छु॒चाऽर्प॑येत् कृष्णा॑जिनेन॒ संभ॑रत्या॒रण्या॑ने॒व पशून् - [] 17

TS 5.1.4.3

शु॒चाऽर्प॑यति॒ तस्मा॑त् स॒माव॑त् प॒शूनां॑ प्र॒जाय॑मानाना-मा॒रण्याः॑
 प॒शवः॑ कनी॒याऽसः॑ शु॒चा ह्य॑ता लो॒मतः॑ संभ॒रत्य॑तो ह्य॒स्य मे॑द्ध्यं
 कृ॒ष्णाजि॑नं च पु॒ष्कर॑पर्णं च स॒ स्तृ॑णाती॒यं वै कृ॒ष्णाजि॑नम॒सौ
 पु॒ष्कर॑पर्ण-मा॒भ्या-मे॒वैन-मु॑भयतः॒ परि॑गृह्णात्य-ग्नि॒र्देवे॑भ्यो नि॒लाय॑त
 तम॒थर्वा-ऽन्व॑पश्य॒दथ॑र्वा त्वा प्र॒थमो॑ नि॒रम॑न्थद॒ग्न इ॒त्या - [] 18

TS 5.1.4.4

-ह॒ य ए॒वैन॑म॒न्वप॑श्यत् तेनै॒वैन॑ संभ॒रति॑ त्वा॒मग्ने॑ पु॒ष्करा॑दधीत्याह
 पु॒ष्कर॑पर्णे ह्ये॒नमु॑प॒श्रित-म॑विन्दत् तमु॒ त्वा द॑द्ध्यङ्गु॒षिरि॑त्याह
 द॑द्ध्यङ्वा आ॒थर्व॑ण-स्तेज॒स्व्यासी॑त् तेज॒ एवा॑स्मिन् दधाति॒ तमु॑
 त्वा पा॒थ्यो वृ॑षेत्याह॒ पूर्व॑मे॒वोदि॑त-मु॒त्तरे॑णा॒भि गृ॑णाति - [] 19

TS 5.1.4.5

चत॒सृभिः॑ संभ॒रति॑ च॒त्वारि॑ छन्दा॒ऽसि॑ छन्दा॒भिरे॒व गा॑यत्रीभिर्ब्रा॒ह्मण॑स्य
 गा॒यत्रो॑ हि ब्रा॒ह्मण-स्त्रि॒ष्टुग्भी॑ राज॒न्यस्य॑ त्रै॒ष्टुभो॑ हि राज॒न्यो यं
 का॒मये॑त वसी॒यान्थ-स्या॑दित्यु॒भयी॑भिस्तस्य॒ संभ॑रेत् तेजश्चै॒वाऽस्मा॑
 इन्द्रि॒यं च॑ समी॒ची द॑धात्यष्टा॒भिः संभ॑रत्यष्टाक्षरा॒ गा॑यत्री गा॒यत्रो॑

ऽग्निर्या॒वाने॒वाऽग्निस्त॑ सं॒भरति॑ सीद॑ हो॒तरित्या॑- () -ह दे॒वता॑
 ए॒वास्मै॑ स॒ साद॑यति॒ नि हो॒तेति॑ म॒नुष्या॑न्त् स॒ सीद॑स्वेति॒
 वया॑सि॒ जनि॑ष्वा हि जे॒न्यो अ॒ग्रे अ॒हामि॑त्याह दे॒व म॒नुष्या॑ने॒वाऽस्मै॑
 स॒सन्नान्॑ प्र॒जनय॑ति ॥ 20

(ऐ - व पशू - निरि - गृणाति - होतरिति - सप्तविंशतिश्च)
 (A4)

TS 5.1.5.1

क्रू॒रमि॒व वा अ॒स्या ए॒तत् क॑रोति॒ यत् ख॑न॒त्यप॒ उप॑ सृ॒जत्या॑पो वै
 शा॒न्ताः शा॒न्ताभि॑रे॒वाऽस्यै॑ शु॒चं श॑मयति॒ सं ते वा॒युर्मा॑तरि॒श्वा
 दधा॑त्वित्याह प्रा॒णो वै वा॒युः प्रा॒णेनै॒वास्यै॑ प्रा॒णं सं द॑धाति॒ सं ते
 वा॒युरि॑त्याह तस्मा॑द्-वा॒युप्र॑च्युता दि॒वो वृ॑ष्टिरी॒ते तस्मै॑ च दे॒वि
 वष॑डस्तु - [] 21

TS 5.1.5.2

तु॒भ्यमि॑त्याह ष॒ड्वा ऋ॒तव॑ ऋ॒तुष्वे॒व वृ॑ष्टिं दधाति॒ तस्मा॑त् सर्वा॒नृ॒तून्
 व॒र्षति॑ यद्-वष॑ट्कुर्याद्-या॒तया॑मा॒स्य वष॑ट्का॒रः स्या॑द्यन्न
 वष॑ट्कुर्याद् रक्षा॑सि॒ यज्ञं॑ ह॒न्युर्व॑डित्याह प॒रोक्ष॑मे॒व वष॑ट् करोति॒

नास्य॑ या॒तया॑मा वषट्कारो॑ भवति॑ न य॒ज्ञं रक्षा॑सि घ्नन्ति॑ सुजा॒तो
ज्योति॑षा स॒हेत्यनु॑ष्टुभोप नह्यत्यनु॑ष्टु – [] 22

TS 5.1.5.3

–फ॒सर्वा॑णि छन्दा॑सि छन्दा॑सि खलु॑ वा अ॒ग्नेः प्रि॒या त॒नूः
प्रि॒ययै॑वैनं॑ तनु॒वा परि॑ दधाति वेदु॑को वा॒सो भव॑तिय ए॒वं वैद॑ वा॒रुणो
वा अ॒ग्निरु॑पनद्ध उदु॑ तिष्ठ स्व॒द्ध्वरो॒र्ध्व ऊ॒ षुण॑ ऊ॒तय॑ इति॑
सा॒वित्री॑भ्यामुत् तिष्ठति॑ स॒वितृ॑प्रसूत ए॒वास्यो॒र्ध्वाँ व॑रुणमे॒निमु॒त्
सृ॒जति॑ द्वाभ्यां॑ प्रतिष्ठित्यै॑ स जा॒तो गर्भो॑ अ॒सि – [] 23

TS 5.1.5.4

रोद॑स्योरि॒त्याहे॒मे वै रोद॑सी तयो॒रेष गर्भो॑ यद॒ग्नि-स्त॑स्मा-दे॒वमा॒हाग्ने॑
चा॒रुर्वि॑भृत ओष॑धीष्वि॒त्याह॑ यदा ह्येतं॑ वि॒भर॑न्त्यथ चा॒रुत॑रो भवति॑
प्र मा॒तृभ्यो॑ अधि॒ कनि॑क्रदद्-गा इत्याहौष॑धयो वा अ॒स्य मा॒तर॑स्ताभ्य॑
ए॒वैनं॑ प्र॒च्याव॑यति स्थि॒रो भव॑ वी॒ड्वङ्ग॑ इति॑ गर्द॒भ
आ सा॒दय॑ति – [] 24

TS 5.1.5.5

सं न॒ह्यत्ये॒वैनमे॒तया॑ स्थे॒म्ने गर्द॑भेन सं॒भरति॑ तस्मा॒द् गर्द॑भः प॒शूनां॑
 भार॑भारितमो गर्द॑भेन सं॒ भरति॑ तस्मा॒द् गर्द॑भो-ऽप्यना॒लेशे-ऽत्यन्यान्
 प॒शून् मे॒घत्यन्न॑ ह्ये॒नेना॒र्कः सं॒भरन्ति॑ गर्द॑भेन सं॒भरति॑ तस्मा॒द्
 गर्द॑भो द्विरे॒ताः सन् क॑निष्ठं प॒शूनां॑ प्रजा॒यते॒ऽग्निर्ह्यस्य॑ योनिं
 निर्द॑हति प्रजा॒सु वा ए॒ष ए॒तर्ह्यारूढः॑ - [] 25

TS 5.1.5.6

स ई॒श्वरः प्र॒जाः शु॒चा प्र॒दहः॑ शि॒वो भव॑ प्रजा॒भ्य इत्या॑ह प्रजा॒भ्य
 ए॒वैनं॑ शमयति मा॒नुषी॑भ्यस्त्वम॒ङ्गिर इत्या॑ह मा॒नव्यो॑ हि प्रजा॒ मा
 द्यावा॑पृथि॒वी अ॒भि शू॒शुचो॑ मा॒न्तरि॑क्षं मा॒ वनस्प॑ती॒नित्या॑है॒भ्य ए॒वैनं॑
 लो॒केभ्यः॑ शमयति प्रै॒तु वा॒जी क॑नि॒क्रद॑दित्या॒ह वा॒जी ह्येष॑
 ना॒नद॑द्-रा॒सभः॑ प॒त्वेत्या॑ - [] 26

TS 5.1.5.7

-ह रा॒सभ॑ इति ह्ये॒तमृ॑षयो॒ऽवदन्॑ भर॒न्नग्निं॑ पु॒रीष्य॑मित्या॒हाऽग्निं॑
 ह्येष॑ भरति मा॒ पा॒द्यायु॑षः पु॒रेत्या॑हाऽऽ*यु॒रेवा॑ऽस्मिन् दधाति॑ तस्मा॒द्

ग॒र्द॒भः॑ स॒र्व॒मा॒युरे॒ति॑ तस्मा॑द् ग॒र्द॒भे॑ पु॒राऽऽयु॑षः प्र॒मी॒ते बि॒भ्यति॑
वृ॒षाऽग्निं॑ वृ॒षणं॑ भ॒रन्नि॒त्याह॑ वृ॒षा ह्येष॑ वृ॒षाऽग्नि॒रपां॑ गर्भं॑ - [] 27

TS 5.1.5.8

समु॒द्रि॒य-मि॒त्याहा॑ऽपां॑ ह्येष॑ गर्भो॑ यद॒ग्नि॒रग्न॑ आ या॒हि वी॒तय॑ इति॑
वा इ॒मौ लो॒कौ व्यै॒ताम॑ग्न आ या॒हि वी॒तय॑ इति॑ यदा॒हा ऽन॒योर्लो॒कयो-
र्वी॒त्यै प्र॒च्युतो॑ वा ए॒ष आ॒यत॑नाद॒गतः॑ प्र॒तिष्ठां॑ स ए॒तर्ह्य॑द्ध्व॒र्युं च
यज॑मानं च द॒ध्याय॑त्यृ॒तं स॒त्यमि॒त्याहे॒यं वा ऋ॒तम॒सौ - [] 28

TS 5.1.5.9

स॒त्यम॒नयो॒रेवैनं॑ प्र॒ति ष्ठा॑पयति॒ नाऽऽ*ति॑माच्छ॒त्यद्ध्व॒र्युर्न यज॑मानो
वरु॒णो वा ए॒ष यज॑मानम॒भ्यैति॑ यद॒ग्निरु॑प॒नद्ध॑ ओष॒धयः॑ प्र॒ति
गृ॒ह्णी॒ताग्नि॑मेत-मि॒त्याह॑ शान्त्यै॒ व्यस्य॑न् वि॒श्वा अ॒मती॑र॒राती-रि॒त्याह॑
रक्ष॑साम॒पहत्यै॑ नि॒षीद॑न् नो॒ अप॑ दु॒र्मतिं॑ ह॒नदि॒त्याह॑ प्र॒तिष्ठि॒त्या
ओष॑धयः प्र॒तिमो॑द॒ध्व - [] 29

TS 5.1.5.10

मे॒नमि॒त्याहौष॑धयो॒ वा अ॒ग्नेर्भा॑ग॒धेयं॑ ता॒भिरे॒वैनं॑ सम॒दर्ध॑यति॒
पु॒ष्पाव॑तीः सु॒पिप्प॒ला इ॒त्याह॑ तस्मा॑दोष॒धयः॑ फ॒लं गृ॒ह्णन्त्य॑ यं वो॒ गर्भं॑

ऋ॒त्वि॒यः प्र॒त्न॑ꣳ स॒ध॒स्थ॒मा-ऽस॒द॒दि॒त्याह॒ याभ्य॑ ए॒वैनं॑ प्र॒च्याव॑यति
तास्वे॒वैनं॑ प्र॒तिष्ठा॑पयति द्वाभ्यामु॒पाव॑हरति प्र॒तिष्ठि॑त्यै ॥ 30

(अ॒स्त्व - नु॒ष्ट - ब॒सि - सा॒दय॑त्या - रू॒ढः-प॒त्वेति॑-ग॒र्भ-म॒सौ
- मो॒द॒ध्वं - द्वि॒च॒त्वा॒रिꣳश॑च्च) (A5)

TS 5.1.6.1

वा॒रु॒णो वा अ॒ग्निरु॑प॒नद्धो॑ वि पा॒ज॒सेति॑ वि॒स्रꣳस॑यति स॒वितृ॑प्र॒सूत॑
ए॒वास्य॑ वि॒षूचीं॑ व॒रु॒णमे॒निं वि॑सृ॒जत्य॑प॒ उप॑ सृ॒जत्या॑पो वै शा॒न्ताः
शा॒न्ताभि॑रे॒वास्य॑ शु॒चꣳ श॑मयति ति॒सृभि॑रु॒प सृ॑जति त्रि॒वृद्धा॑
अ॒ग्निर्या॑वा॒नेवा-ग्नि॑स्तस्य शु॒चꣳ श॑मयति मि॒त्रः सꣳसृ॑ज्य
पृ॒थि॒वीमि॑त्याह मि॒त्रो वै शि॒वो दे॒वानां॑ ते॒नैवै - [] 31

TS 5.1.6.2

-नꣳ सꣳ सृ॑जति शा॒न्त्यै यद्ग्रा॒म्याणां॑ पा॒त्राणां॑ क॒पालैः॑
सꣳसृ॑जेद्-ग्रा॒म्याणि॑ पा॒त्राणि॑ शु॒चाऽर्प॑ये॒दर्म॑क॒पालैः॑ सꣳ सृ॑जत्ये॒तानि॑
वा अ॒नुप॑जीवनी॒यानि॑ ता॒न्येव॑ शु॒चाऽर्प॑यति श॒र्करा॑भिः सꣳ सृ॑जति
धृ॒त्या अथो॑ श॒न्त्वाया॑ ज॒लोमैः॑ सꣳ सृ॑जत्ये॒षा वा अ॒ग्नेः प्रि॒या

त॒नूर्य॑द॒जा प्रि॒ययै॑वैनं॒ त॒नुवा॑ स॒ꣳ सृ॒ज॒त्यथो॑ तेजसा कृ॒ष्णाजि॒नस्य॑
लो॒मभिः॑ स॒ꣳ - [] 32

TS 5.1.6.3

सृ॒जति॑ य॒ज्ञो वै कृ॒ष्णाजि॒नं य॒ज्ञेनै॒व य॒ज्ञꣳ स॒ꣳ सृ॒जति॑ रु॒द्राः
संभृ॑त्य पृ॒थिवी॑मि॒त्याहै॒ता वा ए॒तं दे॒वता॑ अ॒ग्रे स॒मभ॑रन् ताभि॒रेवैन॑ꣳ
संभ॑रति म॒खस्य॑ शिरोऽसी॒त्याह॑ य॒ज्ञो वै म॒खस्त॑स्यै॒त-च्छि॒रो यदु॒खा
तस्मा॑दे॒वमा॒ह य॒ज्ञस्य॑ प॒दे स्थ॑ इ॒त्याह॑ य॒ज्ञस्य॑ ह्ये॒ते - [] 33

TS 5.1.6.4

प॒दे अथो॑ प्र॒तिष्ठि॑त्यै प्रा॒न्याभि॑-र्य॒च्छत्य॑न्व॒न्यै-र्म॑न्त्रयते मिथु॒नत्वाय॑
त्र्यु॒द्धिं करो॑ति त्रय॑ इ॒मे लो॒का ए॒षां लो॒काना॑माप्त्यै छ॒न्दोभिः॑ करोति
वी॒र्यं वै छ॒न्दाꣳसि॑ वी॒र्येणै॑वैनां॒ करो॑ति य॒जुषा॑ बि॒लं करो॑ति व्यावृ॒त्त्या
इ॒यतीं॑ करोति प्र॒जाप॑तिना य॒ज्ञमु॒खेन॑ संमि॒तां द्वि॒स्तनां॑ करोति
द्या॒वापृ॑थि॒व्योर्दो॑हाय चतुः॒स्तनां॑ करोति प॒शूनां॑ दो॒हाया॑ष्टा॒स्तनां॑
करो॑ति छ॒न्दसां॑ दो॒हाय॑ नवा॒श्रि-म॑भिच॒रतः॑ () कुर्यात् त्रि॒वृ॒तमे॒व
व॒ज्रꣳ संभृ॑त्य भ्रातृ॒व्याय॑ प्र॒हरति॑ स्तृ॒त्यै कृ॒त्वाय॑ सा म॒हीमु॒खामि॑ति
नि द॑धाति दे॒वता॑स्वे॒वैनां॑ प्र॒तिष्ठा॑पयति ॥ 34

(तेनैव – लोमभिः स – मेते – अभिचरत – एकविंशतिश्च) (A6)

TS 5.1.7.1

सप्तभिर्धूपयति सप्त वै शीर्षण्याः प्राणाः शिर एतद्-यज्ञस्य
यदुखा शीर्षन्नेव यज्ञस्य प्राणान् दधाति तस्मात् सप्त शीर्षन्
प्राणा अश्वशकेन धूपयति प्राजापत्यो वा अश्वः सयोनित्वाया-
दितिस्त्वेत्याहेयं वा अदितिरदित्यैवादित्यां खनत्यस्या अक्रूरंकाराय
न हि स्वः स्वः हिनस्ति देवानां त्वा पत्नीरित्याह देवानां – [] 35

TS 5.1.7.2

वा एतां पत्नयोऽग्रेऽकुर्वन् ताभिरेवैनां दधाति धिषणास्त्वेत्याह विद्या
वै धिषणा विद्याभिरेवैनामभीन्धे ग्नास्त्वेत्याह छन्दांसि वै ग्ना
श्छन्दोभिरेवैनां श्रपयति वरूत्रयस्त्वेत्याह होत्रा वै वरूत्रयो
होत्राभिरेवैनां पचति जनयस्त्वेत्याह देवानां वै पत्नी – [] 36

TS 5.1.7.3

-र्जनयस्ताभिरेवैनां पचति षड्भिः पचति षड्वा ऋतव ऋतुभिरेवैनां
पचति द्विः पचन्वित्याह तस्माद् द्विः सँवथसरस्य सस्यं पच्यते
वारुण्युखाऽभीद्धा मैत्रियोपैति शान्त्यै देवस्त्वा सवितोद्-वपत्त्वित्याह

स॒वि॒तृ॒प्र॒सू॒त ए॒वैनां॑ ब्र॒ह्म॒णा दे॒वता॑भि॒रुद्-व॒प॒त्यप॑द्यमाना पृ॒थि॒व्या॒शा
दि॒श आ पृ॒णे - [] 37

TS 5.1.7.4

-त्या॒ह तस्मा॑द॒ग्निः सर्वा॑ दि॒शोऽनु॑ वि॒भा॒त्युत्ति॑ष्ठ बृ॒हती॑ भ॒वो॒र्द्ध्वा
ति॑ष्ठ ध्रु॒वा त्वमि॑त्या॒ह प्र॒ति॒ष्ठित्या॑ अ॒सुर्यं॑ पा॒त्रम॑ना॒च्छृ॒ण्णमा॑-च्छृ॒णत्ति॑
दे॒व॒त्रा-ऽकर॑जक्षी॒रेणा॑-ऽऽ*च्छृ॒णत्ति॑ पर॒मं वा॑ ए॒तत् प॒यो यद॑जक्षी॒रं
पर॑मे॒णैवैनां॑ प॒यसा॑ऽऽच्छृ॒णत्ति॑ य॒जुषा॑ व्यावृ॒त्यै छन्दो॑भि॒रा च्छृ॑णत्ति॒
छन्दो॑भि॒र्वा ए॒षा () क्रि॑यते छन्दो॑भि॒रेव॑ छन्दा॒ऽस्या च्छृ॑णत्ति ॥ 38

(आ॒ह दे॒वानां॑ - वै प॒त्नीः - पृ॒णै - षा - षट् च) (A7)

TS 5.1.8.1

एक॑वि॒ंश॒त्या मा॒षैः पु॒रुष॑शी॒र्ष-म॑च्छै॒त्यमे॑द्ध्य॒ा वै मा॒षा अमे॑द्ध्यं
पु॒रुष॑शी॒र्ष-ममे॑द्ध्यै॒रेवा॑-स्या॒-मे॑द्ध्यं नि॒रव॑दाय मे॒द्ध्यं कृ॒त्वा
ऽऽह॑रत्येक॑वि॒ंशति॑-र्भव॑न्त्येक॑वि॒ंशो वै पु॒रुषः॑ पु॒रुष॑स्याऽऽ*प॒त्यै
व्यृ॒द्धं वा॑ ए॒तत् प्रा॒णैर॑मे॒द्ध्यं यत् पु॒रुष॑शी॒र्ष-स॑प्त॒धा वि॑तृ॒ण्णां
वल्मी॑क॒वपां॑ प्र॒ति नि॑ दधाति स॒प्त वै शी॑र्ष॒ण्याः प्रा॒णाः
प्रा॒णैरे॒वैन॑थ्-सम॑र्द्धयति मे॒द्ध्य॒त्वाय॑ याव॑न्तो - [] 39

TS 5.1.8.2

वै मृत्युबन्धवस्तेषां यम आधिपत्यं परीयाय यमगाथाभिः परिगायति
यमादेवैनद्-वृङ्क्ते तिसृभिः परिगायति त्रय इमे लोका एभ्य
एवैनल्लोकेभ्यो वृङ्क्ते तस्माद्-गायते न देयं गाथा हि तद्-वृङ्क्ते
ऽग्निभ्यः पशूना लभते कामा वा अग्नयः कामानेवाव रुन्धे यत्
पशून् नाऽऽलभेताऽनवरुद्धा अस्य - [] 40

TS 5.1.8.3

पशवः स्युर्यत् पर्यग्निकृतानुथ्-सृजेद्-यज्ञवेशसं कुर्याद्-यथ्
सऽस्थापयेद्-यातयामानि शीर्षाणि स्युर्यत् पशूनालभते तेनैव
पशूनव रुन्धे यत् पर्यग्निकृतानुथ्-सृजति शीर्ष्णा-मयातयामत्वाय
प्राजापत्येन सऽस्थापयति यज्ञो वै प्रजापतिर्यज्ञ एव यज्ञं
प्रतिष्ठापयति प्रजापतिः प्रजा असृजत स रिरिचानोऽमन्यत स एता
आप्रीरपश्यत् ताभिर्वै स मुखत - [] 41

TS 5.1.8.4

आ॒त्मान॒मा ऽप्री॑णी॒त य॒दे॒ता आ॒प्रि॒यो भ॒वन्ति॑ य॒ज्ञो वै प्र॒जाप॑ति-
र्य॒ज्ञमे॒वैताभि॑र्मु॒खत आ प्री॑णा॒त्य-परि॑मित॒छन्द॑सो भ॒वन्त्य॑परि॒मितः
प्र॒जाप॑तिः प्र॒जाप॑ते॒राप्त्या॑ ऊ॒नाति॑रि॒क्ता मि॒थु॒नाः प्र॒जात्यै॑ लो॒मशं॑ वै
नामै॒तच्छ॑न्दः प्र॒जाप॑तेः प॒शवो॑ लो॒मशाः॑ प॒शूने॒वाऽव॑ रु॒न्धे सर्वा॑णि
वा ए॒ता रूपा॑णि सर्वा॑णि रू॒पाण्य॒ग्नौ चि॒त्ये क्रि॒यन्ते॑ तस्मा॑दे॒ता
अ॒ग्नेश्चि॒त्यस्य॑ - [] 42

TS 5.1.8.5

भ॒वन्त्ये॑ क॒वि॒श् श॒ति॒ः सा॒मि॒धेनी॑र॒न्वाह॑ रु॒ग्वा ए॒कवि॒ंशो॑ रु॒चमे॒व
ग॒च्छ॒त्यथो॑ प्रति॒ष्ठामे॒व प्रति॒ष्ठा ह्ये॒कवि॒ंश-श्च॑तु॒र्विंश॑तिम॒न्वाह॑
च॒तुर्विं॑श॒तिर॒र्धमा॑साः सँ॒वथ्स॑रः सँ॒वथ्स॑रौऽग्नि॒र्वैश्वा॑नरः सा॒क्षादे॒व
वैश्वा॑नरम॒व रु॒न्धे प॒राची॑र॒न्वाह॑ प॒राडि॒व हि सु॒वर्गो॑ लो॒कः
स॒मास्त्वा॑ऽग्न ऋ॒तवो॑ व॒र्धय॑न्त्वित्या॒ह स॒माभि॑रे॒वाऽग्निं॑
व॒र्धय॑ - [] 43

TS 5.1.8.6

तृ॒तुभिः॑ सँव॒त्सरं॑ वि॒श्वा आ॒ भाहि॑ प्र॒दिशः॑ पृ॒थिव्या॑ इ॒त्याह॑
तस्मा॑द॒ग्निः सर्वा॑ दि॒शोऽनु॑ वि॒भाति॑ प्र॒त्यौह॑ताम॒श्विना॑
मृ॒त्युम॑स्मा॒दित्या॑ह मृ॒त्युमे॒वाऽस्मा॑दप॒ नुद॑त्यु॒द्वयं॑ तम॒सस्प॑रीत्याह पा॒प्मा
वै तमः॑ पा॒प्मान॑मे॒वास्मा॑दप॒ हन्त्य॑गन्म॒ ज्योति॑रु॒त्तम॑-मि॒त्याहाऽसौ॑ वा
आ॒दि॒त्यो () ज्योति॑रु॒त्तम॑-मा॒दि॒त्यस्यै॒व सा॑यु॒ज्यं ग॑च्छति न
सँव॒त्सर॑स्तिष्ठति ना॒स्य श्री॑स्तिष्ठति य॒स्यैताः॑ क्रि॒यन्ते॒ ज्योति॑ष्मती-
मु॒त्तमा॑मन्वाह॒ ज्योति॑रे॒वास्मा॑ उप॒रिष्ठाद् द॑धाति सु॒वर्ग॑स्य
लो॒कस्या॑नु॒ख्यात्यै॑ ॥ 44

(याव॑न्तो - ऽस्य - मुख॑त - श्रि॒त्यस्य॑ - वर्द्ध॑य - त्या॒दि॒त्यौ -
ऽष्टा॑विं॒शति॑श्च) (A8)

TS 5.1.9.1

षड्भि॑र्दीक्षयति षड्वा ऋ॒तव॑ ऋ॒तुभि॑रे॒वैनं॑ दीक्षयति स॒प्तभि॑र्दीक्षयति
स॒प्त छन्दा॑ऽसि छन्दा॑भि॒रेवैनं॑ दीक्षयति वि॒श्वे दे॒वस्य॑ ने॒तुरि॑त्य-
नु॒ष्टुभौ॑त्तमया जुहोति वा॒ग्वा अ॒नुष्टु॑प् तस्मा॑त् प्रा॒णानां॑ वा॒गुत्त॑मै-

कस्मा॑दक्षरा॒दनाप्तं॑ प्रथ॒मं पदं॑ तस्मा॑द्-यद्-वाचो॑ऽनाप्तं॑ तन्मनु॒ष्या
उप॑ जी॒वन्ति॑ पूर्ण॒या जुहोति॑ पूर्ण॒ इव॑ हि प्र॒जापतिः॑ - [] 45

TS 5.1.9.2

प्र॒जापते॑रापत्यै न्यून॒या जुहोति॑ न्यूना॒द्धि प्र॒जापतिः॑ प्र॒जा असृ॑जत
प्र॒जाना॑ꣳ सृष्ट्यै॑ यदर्चि॑षि प्रवृ॒ज्याद्-भू॒तमव॑ रुन्धीत॒ यदङ्गा॑रेषु
भवि॑ष्यदङ्गा॑रेषु प्रवृ॒णक्ति॑ भवि॑ष्य दे॒वाव रुन्धे॑ भवि॑ष्यद्धि भू॒यो भू॒ताद्-
द्वाभ्यां॑ प्रवृ॒णक्ति॑ द्वि॒पाद्-यज॑मानः॒ प्रति॑ष्ठित्यै ब्रह्म॒णा वा ए॒षा यजु॑षा
संभृ॑ता यदु॒खा सा यद्धि॑द्येताऽऽ*र्ति॒माच्छे॑ - [] 46

TS 5.1.9.3

-द्यज॑मानो ह॒न्येता॑ऽस्य य॒ज्ञो मि॒त्रैता॑मु॒खां तपे॑त्याह ब्रह्म॒ वै मि॒त्रो
ब्रह्म॑न्ने॒वैनां॑ प्रति॑ष्ठापयति॒ नाऽऽर्ति॑माच्छे॒ति यज॑मानो नास्य॒ यज्ञो
ह॒न्यते॑ यदि॒ भिद्ये॑त तैरे॒व क॒पालैः॑ सꣳ सृ॑जेथ् सै॒व ततः॑
प्राय॑श्चित्तिर्यो ग॒तश्रीः॑ स्यान्मथि॒त्वा तस्या॑व द॒ध्याद्-भू॒तो
वा ए॒ष स स्वां॑ - [] 47

TS 5.1.9.4

दे॒वता॒मु॒पैति॑ यो भू॒ति॒कामः॑ स्याद्य उ॒खायै॑ सं॒भवे॒त् स ए॒व तस्य॑
स्यादतो ह्येष सं॒भव॒त्येष॑ वै स्वयं॑भूर्नाम भव॒त्येव॑ यं का॒मये॑त
भ्रातृ॑व्यमस्मै जनये॒यमित्य॑-न्यतस्तस्या-ऽऽह॒त्याऽव द॑द्ध्याथ्
साक्षा॑दे॒वास्मै॑ भ्रातृ॑व्यं जनयत्यम्ब॒रीषा॑दन्न का॒मस्या॑व द॑द्ध्यादं॒बरी॑षे
वा अन्नं॑ भ्रियते स॒यौन्ये॑वान्न - [] 48

TS 5.1.9.5

-मव रुन्धे मु॒ञ्जान॑व दधात्यूर्ग्वै मु॒ञ्जा ऊ॒र्जमे॑वास्मा अपि
दधात्य॒ग्निर्दे॒वेभ्यो॑ नि॒लाय॑त स कु॒मुकं॑ प्राऽ*वि॒शत् कु॒मुक॑मव दधाति
यदे॒वास्य॑ तन्न न्य॒क्तं तदे॒वाव॑ रुन्ध आ॒ज्येन॑ सं यौ॒त्येत॑द्वा अ॒ग्नेः प्रि॒यं
धाम॑ यदा॒ज्यं प्रि॒येणै॒वैनं॑ धाम्ना॒ सम॑दर्धयत्यथो तेज॒सा - [] 49

TS 5.1.9.6

वै कं॒कती॑मा दधाति भा ए॒वाव॑ रुन्धे शमी॒मयी॑मा दधाति शान्त्यै
सीद॑ त्वं मा॒तुर॒स्या उप॑स्थ इति ति॒सृभि॑र्जा॒तमु॑प तिष्ठते त्रय॑ इ॒मे
लो॒का ए॒ष्वेव॑ लो॒केष्वा॒विदं॑ गच्छत्यथो प्रा॒णाने॒वाऽऽत्म॑न् धत्ते ॥ 50

(प्रजापतिर् - ऋच्छेत् - स्वा - मेवान्नं - तेजसा -
चतुस्त्रिंशच्च) (A9)

TS 5.1.10.1

न ह स्म वै पुराऽग्निरपरशुवृक्णं दहति तदस्मै प्रयोग
एवर्षिरस्वदयद्-यदग्ने यानि कानि चेति समिधमा
दधात्यपरशुवृक्ण-मेवास्मै स्वदयति सर्वमस्मै स्वदते य एवं
वेदौदुम्बरीमा दधात्यूर्वा उदुम्बर ऊर्जमेवास्मा अपि दधाति
प्रजापतिरग्नि-मसृजत तं सृष्टं रक्षाऽस्य - [] 51

TS 5.1.10.2

-जिघाऽसन्थ्स एतद्-राक्षोघ्नमपश्यत् तेन वै सरक्षाऽस्यपाऽहत
यद्-राक्षोघ्नं भवत्यग्नेरेव तेन जाताद्-रक्षाऽस्यप हन्त्याश्चत्थीमा
दधात्यश्चत्थो वै वनस्पतीनां सपत्नसाहो विजित्यै वैकङ्कतीमा
दधाति भा एवाव रुन्धे शमीमयीमा दधाति शान्त्यै सञ्शितं मे
ब्रह्मोदेषां बाहू अतिरमित्युत्तमे औदुम्बरी - [] 52

TS 5.1.10.3

वाचयति ब्रह्मणैव क्षत्रं स ऽ श्रयति क्षत्रेण ब्रह्म तस्माद् ब्राह्मणो
 राजन्यवानत्यन्यं ब्राह्मणं तस्माद्-राजन्यो ब्राह्मणवानत्यन्यं
 राजन्यं मृत्युर्वा एष यदग्निरमृतं हिरण्यं रुक्ममन्तरं
 प्रतिमुञ्चते ऽमृतमेव मृत्योरन्तर्द्धत्त एकविंशतिनिर्बाधो
 भवत्येकविंशतिर्वै देवल्लोका द्वादश मासाः पञ्चर्तवस्त्रय इमे
 लोका असावादित्य - [] 53

TS 5.1.10.4

एकविंश एतावन्तो वै देवल्लोकास्तेभ्य एव भ्रातृव्यमन्तरेति
 निर्बाधैर्वै देवा असुरान् निर्बाधेऽकुर्वत तन्निर्बाधानां निर्बाधत्वं
 निर्बाधी भवति भ्रातृव्यानेव निर्बाधे कुरुते सावित्रिया प्रतिमुञ्चते
 प्रसूत्यै नक्तोषासेत्युत्तरया ऽहोरात्राभ्यामेवैन-मुद्यच्छते देवा
 अग्निं धारयन् द्रविणोदा इत्याह प्राणा वै देवा द्रविणोदा
 अहोरात्राभ्यामेवैनमुद्यत्य - [] 54

TS 5.1.10.5

प्राणैर्दा॑धारा ऽऽसी॑नः प्रति॑मुञ्चते तस्मा॑दासी॑नाः प्र॒जाः प्र॒जाय॑न्ते
 कृ॒ष्णाजि॑नमुत्तरं तेजो॑ वै हि॒रण्यं ब्र॑ह्म कृ॒ष्णाजि॑नं तेज॑सा चै॒वैनं
 ब्र॑ह्मणा चोभ॒यतः॑ परि॑गृह्णाति षडु॑द्याम॒ शि॒क्यं भव॑ति षड्वा ऋ॒तव॑
 ऋ॒तुभिरे॒वैन॑-मुद्यच्छते॑ यद् द्वाद॑शोद्याम॒ सँव॑त्सरेणै॒व मौञ्जं
 भव॑त्यूर्ग्वै मुञ्जा ऊ॒र्जैवैन॑ स () म॒दर्ध॑यति सु॒पर्णोऽसि॑
 गरु॑त्मानित्यवै॒क्षते॑ रूप॑मेवा॒स्यैत॑न्महि॒मानं॑ व्याच॑ष्टे दि॒वं गच्छ॑ सु॒वः
 प॒तेत्या॑ह सु॒वर्ग॑मे॒वैनं॑ लो॒कं ग॑मयति ॥ 55

(रक्षा॑स्यौ - दु॒र्ब॑रि - आ॒दि॒त्य - उ॒द्य॒त्य - सं -
 चतु॑र्विंशतिश्च) (A10)

TS 5.1.11.1

समि॑द्धो अ॒ञ्जन् कृ॑दरं म॒तीनां॑ घृ॒तम॑ग्ने म॒धुम॑त् पि॒न्वमा॑नः ।
 वा॒जी वह॑न् वा॒जिनं॑ जा॒तवे॑दो दे॒वानां॑ व॒क्षि प्रि॒यमा॑ स॒धस्थं॑ ॥
 घृ॒तेना॑ञ्जन्त्सं प॒थो दे॑व॒याना॑न् प्र॒जान॑न् वा॒ज्यप्ये॑तु दे॒वान् ।
 अनु॑ त्वा स॒प्ते प्र॑दि॒शः स॑चन्ता॒ स्व॒धाम॑स्मै यज॑मानाय धेहि ॥

ई॒ड्य॒श्चा॒सि॒ व॒न्द्य॒श्च॒ वा॒जि॒न्ना॒शु॒श्चा॒सि॒ मे॒द्ध्य॒श्च॒ स॒प्ते ।

अ॒ग्नि॒ष्ट्वा – [] 56

TS 5.1.11.2

दे॒वैर्व॒सुभिः॑ स॒जोषाः॑ प्री॒तं व॑हिं व॑हतु जा॒तवे॑दाः ॥

स्ती॒र्णम् ब॒र्हिः सु॒ष्ट्री॒मा जु॒षा॒णो॒रु पृ॒थु प्र॑थ॒मानं॑ पृ॒थि॒व्यां ।

दे॒वेभि॑र्यु॒क्तम॑दि॒तिः स॒जोषाः॑ स्यो॒नं कृ॑ण्वाना सु॒विते॑ दधातु ॥

ए॒ता उ॒ वः सु॒भगा॑ वि॒श्वरू॑पा वि॒पक्षो॑भिः श्रय॑माणा उ॒दातैः॑ ।

ऋ॒ष्वाः स॒तीः क॒वषः॑ शु॒म्भ॒मा॒ना द्वा॒रो दे॒वीः सु॒प्रा॒य॒णा भ॑वन्तु ॥

अ॒न्तरा॑ मि॒त्राव॑रुणा च॒रन्ती॑ मु॒खं य॒ज्ञा॒नाम॑भि सँ॒वि॒दाने॑ ।

उ॒षा॒सा वाꣳ – [] 57

TS 5.1.11.3

सु॒हि॒रण्ये॑ सु॒शि॒ल्ये ऋ॒तस्य॑ यो॒नावि॑ह सा॒दया॑मि ॥

प्र॒थ॒मा वाꣳ स॒रथि॑ना सु॒वर्णा॑ दे॒वौ प॑श्यन्तौ भु॒वनानि॑ वि॒श्वा ।

अ॒पि॒प्रयं॑ चो॒दना॑ वां मि॒मा॒ना हो॑तारा ज्यो॒तिः प्र॒दि॒शा दि॒शन्ता॑ ॥

आ॒दि॒त्यैर्नो॑ भा॒रती॑ व॒ष्टु य॒ज्ञꣳ स॒रस्व॑ती स॒ह रु॒द्रैर्न॑ आ॒वीत् ।

इ॒डो॒प॒हू॒ता॒ व॒सु॒भिः॑ स॒जोषा॑ य॒ज्ञं नो॑ दे॒वीर॒मृते॑षु ध॒त्त ॥

त्व॒ष्टा वी॒रं दे॒वका॑मं ज॒जान॑ त्व॒ष्टुर्वा॑ जा॒यत आ॒शुर॑श्चः () । 58

TS 5.1.11.4

त्व॒ष्टेदं॑ वि॒श्वं भु॒वनं॑ ज॒जान॑ ब॒होः क॒र्तार॑मि॒ह य॒क्षि हो॑तः ॥

अ॒श्वो घृ॑तेन॒ त्मन्या॑ स॒म॒क्त उप॑ दे॒वा ऋ॑तु॒शः पा॒थ ए॒तु ।

व॒नस्प॑ति-दे॒वलोकं॑ प्र॒जान॑न्न॒ग्निना॑ ह॒व्या स्व॑दि॒तानि॑ व॒क्षत् ॥

प्र॒जाप॑ते॒स्तप॑सा वावृ॒धानः॑ स॒द्यो जा॒तो द॑धि॒षे य॒ज्ञम॑ग्ने ।

स्वा॒हाकृ॑तेन॒ हवि॑षा पु॒रोगा॑ या॒हि सा॒द्ध्या ह॒विर॑दन्तु दे॒वाः ॥ 59

(अ॒ग्नि॒ष्ट्वा - वा - म॒श्वो - द्वि॒च॒त्वारि॑श्च) (A11)

Prasna Korvai with starting Padams of 1 to 11 Anuvaakams :-

(सा॒वि॒त्राणि॑ - व्यृ॒द्ध - मु॒त्क्राम॑ - दे॒वस्य॑ ख॒नति॑ - क्रू॒रं - वा॒रुणः॑
- स॒प्तभि॑ - रे॒कवि॑श्च॒त्या - ष॒ड्भि - न ह॑ स्म - स॒मि॒द्धो
अ॒ञ्ज - त्रे॒का॒दश॑)

Korvai with starting Padams of 1, 11, 21 Series of Panchaatis :-

(सा॒वि॒त्रा - ण्यु॒त्क्राम॑ - क्रू॒रं - वा॒रुणः॑ - प॒शवः॑ स्यु -
न ह॑ स्म - न॒वप॑ञ्चा॒शत्)

First and Last Padam of First Prasnam of 5th Kandam

(सा॒वि॒त्राणि॑ – ह॒वि॒रद॑न्तु दे॒वाः)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे

प्रथमः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

5.2 पञ्चमकाण्डे द्वितीयः प्रश्नः – चित्युपक्रमाभिधानं

TS 5.2.1.1

विष्णु॑मुखा॒ वै दे॒वा इ॒च्छन्द्वा॑भिरि॒मान् लो॒कान॑न॒प॒ज॒य्य म॒भ्यज॑यन्.
यद्-विष्णु॑क्र॒मान् क्र॒मते॑ विष्णु॑रेव भू॒त्वा यज॑मान इ॒च्छन्द्वा॑भिरि॒मान्
लो॒कान॑न॒प॒ज॒य्यम॒भि ज॑यति विष्णोः॑ क्रमो॑ऽस्य-भि॒माति॑हेत्याह गाय॒त्री
वै पृ॒थि॒वी त्रै॒ष्टुभ॑मन्तरि॒क्षं जा॑गती द्यौ॒रानु॑ष्टुभीर्दि॒श इ॒च्छन्द्वा॑भिरेवे॒मान्
लो॒कान् यथा॑ पू॒र्वम॒भि ज॑यति प्र॒जाप॑तिर॒ग्निम॑सृजत
सो॑ऽस्मात् सृष्टः॑ - [] 1

TS 5.2.1.2

परा॑डैत् तमे॒तया॑ ऽन्वैद॑क्र॒न्ददिति॑ तया॒ वै सो॑ऽग्नेः प्रि॒यं धा॑माऽवा॒रुन्ध॑
यदे॒ताम॒न्वाहा॑-ग्नेरे॒वैतया॑ प्रि॒यं धा॑माऽव रुन्ध ई॒श्वरो॑ वा ए॒ष परा॑ड्
प्र॒द॒घो यो॑ विष्णु॑क्र॒मान् क्र॒मते॑ चत॒सृभि॑रा वर्तते च॒त्वारि॑ छन्दा॑ऽसि
छन्दा॑ऽसि खलु॒ वा अ॒ग्नेः प्रि॒या त॒नूः प्रि॒यामे॒वास्य॑ त॒नुव॑म॒भि -[] 2

TS 5.2.1.3

पर्या॑वर्त॑ते दक्षि॑णा पर्या॑वर्त॑ते स्वमे॒व वी॒र्य॑मनु॑ पर्या॑वर्त॑ते तस्मा॑द्-
दक्षि॑णोऽर्ध॑ आ॒त्मनो॑ वी॒र्या॑वत्त॒रोऽथो॑ आ॒दित्य॑स्यै॒वाऽऽ*वृ॑त॒मनु॑
पर्या॑वर्त॑ते शु॒नश्शे॑प॒माजी॑ग॒र्तिं वरु॑णोऽगृ॒ह्णाथ् स ए॒तां वा॑रु॒णीम॑पश्यत्
तया॒ वै स आ॒त्मानं॑ वरु॒णपा॑शादमुञ्च॒द्-वरु॑णो वा ए॒तं गृ॑ह्णाति
य उ॒खां प्र॑तिमुञ्च॒त उदु॑त्त॒मं वरु॑णपा॒श-म॒स्मदि॑त्याहा-
ऽऽ*त्मा॑नमे॒वैतया॑ - [] 3

TS 5.2.1.4

वरु॑णपा॒शान् मु॑ञ्च॒त्या त्वाऽ*हा॑र्ष॒मित्या॑हा ऽऽ*ह्ये॒नञ् हर॑ति
ध्रु॒वस्ति॑ष्ठा ऽवि॒चाच॑लि॒रित्या॑ह प्र॒तिष्ठि॑त्यै वि॒शस्त्वा॑ सर्वा
वाञ्छ॑न्त्वित्या॒ह वि॒शैवै॒नञ् स॑म॒र्द्धय॑त्यस्मिन् रा॒ष्ट्रम॑धि श्रये॒त्याह॑
रा॒ष्ट्रमे॒वास्मिन्॑ ध्रु॒वम॑क॒र्यं का॒मये॑त रा॒ष्ट्रञ् स्या॑दिति तं म॒नसा॑
ध्या॑येद्-रा॒ष्ट्रमे॒व भ॑वत्य - [] 4

TS 5.2.1.5

-ग्रे बृ॒हन्नु॒षसा॑मू॒र्ध्वो अ॑स्था॒दित्या॑हाऽग्र॑मे॒वैनञ् स॑मा॒नानां॑ करोति
नि॒र्जग्मि॑वान् तम॒स इ॒त्याह॑ तम॒ ए॒वास्मा॑दप॒ हन्ति॑ ज्योति॒षा-

ऽऽगा॒दित्या॒ह॒ ज्योति॑रे॒वा-स्मिन् दधा॑ति च॒तसृ॑भिः सा॒दय॑ति च॒त्वारि॑
छन्दा॑ँ॒सि छन्दो॑भिरे॒वाऽ-ति॑च्छन्द॒सोत्त॑मया॒ वर्ष्म॑ वा ए॒षा छन्द॑सां
यदति॑च्छन्दा॒ वर्ष्मै॑वैन॑ँ॒ समा॒नानां॑ करोति स॒द्वती॑ - [] 5

TS 5.2.1.6

भव॑ति स॒त्त्वमे॒वैनं॑ गम॑यति वा॒थ्सप्रे॑णोप॒ तिष्ठ॑त ए॒तेन॑ वै
व॒थ्सप्री॑र्भा॒लन्दनो॑ऽग्नेः प्रि॒यं धामा॑ऽवाऽरु॒न्धाऽग्ने॑रे॒वैतेन॑ प्रि॒यं धामा॑ऽव
रु॒न्ध एका॑द॒शं भव॑त्ये॒कधै॒व यज॑माने॒ वीर्यं॑ दधा॑ति स्तो॒मेन॑ वै दे॒वा
अ॒स्मिन् लो॒क आ॑र्ध॒र्नुवन्॑ छन्दो॑भि॒रमुष्मि॑न्थ् स्तो॒मस्ये॒व खलु॑ वा
ए॒तद्-रूपं॑ यद्-वा॒थ्सप्रं॑ यद्-वा॒थ्सप्रे॑णोप॒ तिष्ठ॑त - [] 6

TS 5.2.1.7

इ॒ममे॒व तेन॑ लो॒कम॒भि ज॑यति॒ यद्-विष्णु॑क्र॒मान् क्रम॑तेऽमु॒मेव॑
तैर्लो॒कम॒भि ज॑यति॒ पूर्वे॒द्युः प्र॑क्राम॒त्युत्तरे॑द्यु॒रुप॑ तिष्ठ॒ते तस्मा॑द्-
यो॒गेऽन्या॑सां प्र॒जानां॑ मनः॒ क्षेमे॑ऽन्या॒सां तस्मा॑द्-या॒यावरः॑ क्षे॒म्यस्ये॑शे
तस्मा॑द्-या॒यावरः॑ क्षे॒म्यम॑द्ध्यव॒स्यति॑ मु॒ष्टी करो॑ति वा॒चं यच्छ॑ति
य॒ज्ञस्य॑ धृ॒त्यै ॥ 7

(सृष्टोऽ - (1) भ्ये - तया - भवति - सद्यु - पतिष्ठते -
द्विचत्वारिंशच्च) (A1)

TS 5.2.2.1

अन्नपतेऽन्नस्य नो देहीत्याहा-ग्निर्वा अन्नपतिः स एवास्मा अन्नं
प्रयच्छत्यनमीवस्य शुष्मिण इत्याहा-यक्ष्मस्येति वावैतदाह प्र प्रदातारं
तारिष ऊर्जं नो धेहि द्विपदे चतुष्पद इत्याहाऽऽ*शिषमेवैतामा शास्त
उदु त्वा विश्वे देवा इत्याह प्राणा वै विश्वे देवाः - [] 8

TS 5.2.2.2

प्राणैरेवैनमुद्यच्छते ऽग्ने भरन्तु चित्तिभिरित्याह यस्मा एवैनं
चित्तायोद्यच्छते तेनैवैनं समर्द्धयति चतसृभिरा सादयति चत्वारि
छन्दांसि छन्दोभिरेवा-तिच्छन्दसोत्तमया वर्ष्म वा एषा छन्दसां
यदतिच्छन्दा वर्ष्मेवैनं समानानां करोति सद्युती भवति
सत्त्वमेवैनं गमयति प्रेदग्ने ज्योतिष्मान् - [] 9

TS 5.2.2.3

याहीत्याह ज्योतिरेवास्मिन् दधाति तनुवा वा एष हिनस्ति यं
हिनस्ति मा हिंसीस्तनुवा प्रजा इत्याह प्रजाभ्य एवैनं शमयति

रक्षा॑सि॒ वा ए॒तद्-य॒ज्ञ॑ स॒चन्ते॒ यद॑न॒ उ॒त्स॒र्ज-त्य॒क्र॒न्द॒दि॒त्य॒न्वा॒ह
र॒क्ष॒सा॒म॒प॒ह॒त्या अ॒न॒सा व॒हन्-त्य॒प॒चि॒ति-मे॒वा॒स्मिन् द॒धाति॑
त॒स्मा॒द॒न॒स्वी च॒ र॒थी चा॒ति॒थी॒ना-म॒प॒चि॒त॒त॒मा - [] 10

TS 5.2.2.4

व॒प॒चि॒ति॒मा॒न् भ॒वति॑ य॒ एवं॑ वे॒द स॒मि॒धा॒ऽग्निं॑ दु॒व॒स्य॒तेति॑
घृ॒ता॒नु॒षि॒क्ता॒म॒व॒सि॒ते स॒मि॒ध॒मा द॒धाति॑ य॒था॒ऽति॒थय॑ आ॒ग॒ताय॑
स॒र्पि॒ष्व॒दा॒ति॒थ्यं क्रि॒यते॑ ता॒दृ॒गे॒व तद्-गा॒य॒त्रि॒या ब्रा॒ह्म॒ण॒स्य॑ गा॒य॒त्रो
हि ब्रा॒ह्म॒ण॒स्त्रि॒ष्टु॒भा रा॒ज॒न्य॒स्य॑ त्रै॒ष्टु॒भो हि रा॒ज॒न्यो॑ ऽप्सु॒ भ॒स्म
प्र॒ वे॒श॒य॒त्य॒प्सु॒यो॒नि॒र्वा अ॒ग्निः स्वा॒मे॒वैनं॑ यो॒निं ग॒म॒यति॑ ति॒सृ॒भिः
प्र॒वे॒श॒यति॑ त्रि॒वृ॒द्वा - [] 11

TS 5.2.2.5

अ॒ग्नि-र्या॒वा॒ने॒वा॒ऽग्नि॒स्तं प्र॒ति॒ष्ठां ग॒म॒यति॑ प॒रा वा ए॒षो॑ऽग्निं
व॒पति॑ यो॒ऽप्सु॒ भ॒स्म प्र॒वे॒श॒यति॑ ज्यो॒ति॒ष्म॒ती॒भ्या-म॒व द॒धाति॑
ज्यो॒ति॒रे॒वा॒ऽस्मिन् द॒धाति॑ द्वा॒भ्यां प्र॒ति॒ष्ठि॒त्यै प॒रा वा ए॒ष प्र॒जां प॒शून्

वपति॑ योऽ॒प्सु भ॒स्म प्र॒वेश॑यति पुन॒रूर्जा॑ सह॒ रय्ये॑ति पुन॒रुदै॑ति
प्र॒जामे॒व प॒शूना॒त्मन् ध॑त्ते पुन॒स्त्वाऽऽदि॑त्या - [] 12

TS 5.2.2.6

रु॒द्रा वस॑वः॒ समि॑न्धता-मि॒त्याहै॑ता वा ए॒तं दे॒वता॑ अ॒ग्रे स॒मैन्ध॑त
ताभि॑रेवैन॒ꣳ समि॑न्धे बो॒धा स बो॒धीत्यु॑प तिष्ठते बो॒धय॑त्येवैनं
तस्मा॑त् सु॒प्त्वा प्र॒जाः प्र॒बुद्ध्य॑न्ते यथा॒स्थान॑मुप तिष्ठते तस्मा॑द्-
यथा॒स्थानं॑ प॒शवः॑ पुन॒रेत्यो॑प तिष्ठन्ते ॥ 13

(वै विश्वे॑ दे॒वा - ज्योति॑ष्मा - न॒प॑चिततमौ - त्रि॒वृ॒द्धा - आ॑दि॒त्या
- द्वि॑च॒त्वारि॑ꣳश॒च्च) (A2)

TS 5.2.3.1

याव॑ती वै पृ॒थि॒वी तस्यै॑ यम॒ आधि॑पत्यं प॒रीया॑य यो वै यमं
दे॒वय॑जनमस्या॒ अनि॑र्याच्याऽग्निं चि॒नुते॑ यमा॒यै न॒ꣳ
स चि॒नुते॑ऽपे॒ते-त्य॑द्ध्यवसाययति यममे॒व दे॒वय॑जनमस्यै॒ निर्या॑च्या-
ऽऽत्म॑नेऽग्निं चि॒नुत॑ इष्व॒ग्रेण॑ वा अ॒स्या अना॑मृत-मिच्छन्तो॒ नावि॑न्दन्
ते दे॒वा ए॒तद्-य॑जुरपश्यन्पे॒तेति॑ यदे॒तेना॑-ध्यवसाययत्य - [] 14

TS 5.2.3.2

—नामृत॑ ए॒वाग्निं॑ चि॒नुत॑ उ॒द्धन्ति॑ यदे॒वास्या॑ अमे॒द्ध्यं॑ तदप॑
हन्त्यपोऽवो॑क्षति॒ शान्त्यै॑ सि॒कता॑ नि व॒पत्ये॒तद्वा॑ अ॒ग्नेर्वै॑श्वा॒नरस्य॑
रूपं॑ रूपेणै॒व वै॑श्वा॒नरम॑व रुन्ध॒ ऊषान्॑ नि॒वपति॑ पु॒ष्टिर्वा॑ ए॒षा
प्र॒जननं॑ य॒दूषाः॑ पु॒ष्ट्यामे॒व प्र॒जनने॑ऽग्निं चि॒नुते॑ऽथो सं॒ज्ञान॑ ए॒व
सं॒ज्ञानं॑ ह्येतत् — [] 15

TS 5.2.3.3

प॒शूनां॑ य॒दूषा॑ द्या॒वापृ॑थि॒वी स॒हाऽऽस्तां॑ ते वि॒यती॑ अ॒ब्रूता॑मस्त्वे॒व नौ॑
स॒ह य॒ज्ञिय॑मिति॒ यद॒मुष्या॑ य॒ज्ञिय॑मासीत् तद॒स्याम॑दधात् त ऊ॒षा
अ॒भवन्॑ यद॒स्या य॒ज्ञिय॑मासीत् तद॒मुष्या॑मदधात् तददश्च॒न्द्रम॑सि
कृ॒ष्णमू॑षान् नि॒वप॑न्नदो ध्या॒येद् द्या॒वापृ॑थि॒व्योरे॒व य॒ज्ञिये॑ऽग्निं चि॒नुते॑
ऽयं॑ सो अ॒ग्निरिति॑ वि॒श्वामि॑त्रस्य — [] 16

TS 5.2.3.4

सू॒क्तं भ॑वत्ये॒तेन॒ वै वि॒श्वामि॑त्रोऽग्नेः प्रि॒यं धा॒मा ऽवा॑रुन्धा॒ग्नेरे॒वैतेन॑ प्रि॒यं
धा॒माव॑ रुन्धे छन्दोभिर्वै दे॒वाः सु॒वर्गं॑ लो॒कमा॑यन् चत॒स्रः प्रा॒चीरु॑प
दधाति च॒त्वारि॑ छन्दांसि॒ छन्दो॑भिरे॒व तद्—य॑ज॒मानः॑ सु॒वर्गं॑

लोकमेति तेषां सुवर्गं लोकं यतां दिशः समवलीयन्त ते द्वे
पुरस्ताथ समीची उपादधत द्वे - [] 17

TS 5.2.3.5

पश्चाथ समीची ताभिर्वै तेदिशोऽदृहन् यद्वे पुरस्ताथ समीची
उपदधाति द्वे पश्चाथ समीची दिशां विधृत्या अथो पशवो वै
छन्दांसि पशूनेवास्मै समीचो दधात्यष्टावुप दधात्यष्टाक्षरा गायत्री
गायत्रोऽग्नि-र्यावानेवाग्निस्तं चिनुतेऽष्टावुप दधात्यष्टाक्षरा गायत्री
गायत्री सुवर्गं लोकमञ्जसा वेद सुवर्गस्य लोकस्य - [] 18

TS 5.2.3.6

प्रजात्यै त्रयोदश लोकंपृणा उप दधात्येकविंशतिः संपद्यन्ते
प्रतिष्ठा वा एकविंशः प्रतिष्ठा गार्हपत्य एकविंशस्यैव
प्रतिष्ठां गार्हपत्यमनु प्रति तिष्ठति प्रत्यग्निं चिक्र्यान्स्तिष्ठति य
एवं वेद पञ्चचितीकं चिन्वीत प्रथमं चिन्वानः पाङ्क्तो यज्ञः पाङ्क्ताः
पशवो यज्ञमेव पशूनव रुन्धे त्रिचितीकं चिन्वीत द्वितीयं
चिन्वानस्त्रय इमे लोका एष्वेव लोकेषु - [] 19

TS 5.2.3.7

प्रति॑तिष्ठ॒-त्येक॑चितीकं चिन्वीत॑ तृतीयं॑ चिन्वान॑ एक॒धा वै सु॒वर्गो॑
 लोक॑ एक॒वृत्तै॑व सु॒वर्गं लो॒कमे॑ति पु॒रीषे॑णाभ्यूहति॑ तस्मा॑न्मा॒ꣳ
 सेना॑स्थि॒ छन्नं॑ न दुश्च॑र्मा भवति॑ य एवं वे॒द पञ्च॑ चि॒तयो॑ भवन्ति
 पञ्च॑भिः पु॒रीषै॑रभ्यूहति॑ द॒श संप॑द्यन्ते द॒शाक्ष॑रा वि॒राडन्नं॑ वि॒राड्
 वि॒राज्ये॑वाऽन्नाद्ये॑ प्रति॑तिष्ठति ॥ 20

(अ॒ध्यव॑साययति॑ - ह्ये॒त - द्वि॒श्वामि॑त्रस्या - दध॒त द्वे - लो॒कस्य॑ -
 लो॒केषु॑ - सप्त॑चत्वारि॒ꣳशच्च॑) (A3)

TS 5.2.4.1

वि वा ए॒तौ द्वि॑षाते यश्च पु॒राऽग्नि॑र्यश्चो॒खाया॒ꣳ समि॑तमि॒ति च॑त॒सृभिः॑
 सं नि॒वप॑ति च॒त्वारि॑ छन्दा॒ꣳसि छन्दा॒ꣳसि ख॒लु वा अ॒ग्नेः प्रि॒या
 त॒नूः प्रि॒ययै॑वैनौ त॒नुवा॒ सꣳ शा॑स्ति॒ समि॑तमित्याह॑ तस्मा॑द्ब्रह्म॒णा
 क्ष॒त्रꣳ स॒मेति॑ यथ्सं॒ न्युप्य॑ वि॒हर॑ति तस्मा॑द् ब्रह्म॒णा
 क्ष॒त्रं व्यै॑त्यृतुभि॑ - [] 21

TS 5.2.4.2

-र्वा ए॒तं दी॒क्षय॑न्ति॒ स ऋ॒तुभि॑रे॒व वि॒मुच्यो॑ मा॒तेव॑ पु॒त्रं पृ॒थि॒वी
पु॒री॒ष्यमि॒त्याह॑-तु॒भिरे॒वैनं॑ दी॒क्षयि॑त्व॒र्तुभि॑र्वि॒ मुञ्च॑ति॒ वैश्वान॑र्या
शि॒क्यमा॑ द॒त्ते स्व॒दय॑त्ये॒वैन॑-नैर्ऋ॒तीः कृ॒ष्णा-स्ति॒स्र-स्तु॑ष॒पक्वा
भव॑न्ति॒ निर्ऋ॑त्यै॒ वा ए॒तद्-भा॒गधे॑यं॒ यत् तु॑षा॒ निर्ऋ॑त्यै॒ रूपं॑ कृ॒ष्णाꣳ
रूपे॑णै॒व निर्ऋ॑तिं॒ नि॒रव॑दय॒त इ॒मां दि॒शं य॑न्त्ये॒षा - [] 22

TS 5.2.4.3

वै निर्ऋ॑त्यै॒ दिक् स्वा॑या॒मेव॑ दि॒शि निर्ऋ॑तिं॒ नि॒रव॑दय॒ते स्व॑कृ॒त
इ॒रि॒ण उप॑ दधाति॒ प्रद॑रे॒ वैत॑द्वै॒ निर्ऋ॑त्या॒ आय॑तनꣳ स्व॒ ए॒वाऽऽ*
य॑तने॒ निर्ऋ॑तिं॒ नि॒रव॑दय॒ते शि॒क्यम॑भ्युप॒ दधा॑ति॒ नैर्ऋ॑तो॒ वै पा॑शः
सा॒क्षादे॒वैनं॑ निर्ऋ॑तिपा॒शान्-मु॑ञ्चति॒ तिस्र॑ उप॒ दधा॑ति॒ त्रेधा॑वि॒हितो
वै पु॒रुषो॑ या॒वाने॒व पु॒रुष॑स्तस्मा॒न्-निर्ऋ॑तिम॒व य॑ज॒ते
परा॑चीरुप - [] 23

TS 5.2.4.4

दधा॑ति॒ परा॑चीमे॒वास्मा॒न्-निर्ऋ॑तिं॒ प्र॒णु॑द॒ते ऽप्र॑तीक्ष॒मा य॑न्ति॒
निर्ऋ॑त्या॒ अ॒न्तर्ःहि॑त्यै॒ मार्ज॑यित्वोप॒ तिष्ठ॑न्ते॒ मेद्ध्य॑त्वा॒य

गार्॒हप॒त्यमु॒प तिष्ठ॑न्ते निर्॒ऋति॑ लो॒क ए॒व च॒रित्वा॑ पू॒ता
 दे॒वलोक॑मु॒पाव॑र्तन्त॒ एक॑यो॒प तिष्ठ॑न्त॒ एक॑धै॒व यज॑माने वी॒र्यं॑ दधति
 नि॒वेश॑नः स॒ङ्गम॑नो वसू॒नामि॑त्याह प्र॒जा वै प॒शवो॑ वसु प्र॒जयै॑वैनं
 प॒शुभिः॑ सम॒दर्ध॑यन्ति ॥ 24

(ऋ॒तुभि॑ - रे॒षा- परा॑ची॒रुपा॑ - षा॒चत्वा॑रि॒ञ्शच्च॑) (A4)

TS 5.2.5.1

पु॒रुष॑मा॒त्रेण॑ वि मि॒मीते॑ य॒ज्ञेन॑ वै पु॒रुषः॑ सं॒मितो॑ य॒ज्ञप॑रुषै॒वैनं॑
 वि॒मिमी॑ते या॒वान् पु॒रुष ऊ॒र्ध्वबा॑हु॒स्तावान्॑ भवत्ये॒ताव॑द्वै पु॒रुषे॑ वी॒र्यं॑
 वी॒र्येणै॑वैनं वि मि॒मीते॑ प॒क्षी भ॑वति न ह्य॒पक्षः॑ पति॒तु-म॑र्ह॒त्यर॑न्निना
 प॒क्षौ द्रा॑घीया॒सौ भ॑वतस्तस्मा॒त् प॒क्षप्र॑वया॒सि वया॑सि
 व्याम॑मा॒त्रौ प॒क्षौ च॑ पु॒च्छं च॑ भवत्ये॒ताव॑द्वै पु॒रुषे॑ वी॒र्यं॑ - [] 25

TS 5.2.5.2

वी॒र्यसं॑मितो वे॒णुना॑ वि मि॒मीत॑ आ॒ग्नेयो॑ वै वे॒णुः स॑यो॒नित्वा॑य
 य॒जुषा॑ यु॒नक्ति॑ य॒जुषा॑ कृषति॒ व्यावृ॑त्यै ष॒ङ्गवे॑न कृषति॒ षड् वा॑
 ऋ॒तव॑ ऋ॒तुभि॑रे॒वैनं॑ कृषति॒ यद् द्वा॑द॒शग॑वे॒न सँव॑थ्स॒रेणै॑वे यं वा

अग्ने-रतिदाहादबिभेथ् सैतद् द्विगुणमपश्यत् कृष्टं चाकृष्टं
च ततो वा इमां नाऽत्यदहद्यत् कृष्टं चाकृष्टं च - [] 26

TS 5.2.5.3

भवत्यस्या अनतिदाहाय द्विगुणं त्वा अग्नि-मुद्यन्तु-मर्हतीत्याहुयत्
कृष्टं चाकृष्टं च भवत्यग्नेरुद्यत्या एतावन्तो वै पशवो द्विपादश्च
चतुष्पादश्च तान् यत् प्राच उथ्सृजेद्-रुद्रायापि दद्ध्याद्-यद्-
दक्षिणा पितृभ्यो निधुवेद्यत् प्रतीचो रक्षाँसि हन्युरुदीच
उथ्सृजत्येषा वै देवमनुष्याणाँ शान्ता दिक् - [] 27

TS 5.2.5.4

तामेवैनाननूथ् सृजत्यथो खल्विमां दिशमुथ् सृजत्यसौ वा आदित्यः
प्राणः प्राणमेवैना-ननूथ्सृजति दक्षिणा पर्यावर्तन्ते स्वमेव वीर्यमनु
पर्यावर्तन्ते तस्माद्-दक्षिणोऽर्ध आत्मनो वीर्यावत्तरोऽथो
आदित्यस्यैवाऽऽ*वृतमनु पर्यावर्तन्ते तस्मात् पराञ्चः पशवो
वि तिष्ठन्ते प्रत्यञ्च आ वर्तन्ते तिस्रस्तिस्रः सीताः - [] 28

TS 5.2.5.5

कृषति॑ त्रिवृ॑तमे॒व य॒ज्ञमु॒खे वि॒ यात॑य॒त्योष॑धीर्वपति॒ ब्रह्म॑णाऽन्नम॒व रुन्धे॑
 ऽर्के॑ ऽर्कश्ची॑यते चतु॒र्दश॑भिर्वपति॒ सप्त॑ ग्रा॒म्या ओष॑धयः सप्ताऽऽर॒ण्या
 उ॒भयी॑षाम॒वरु॑द्ध्य॒ अन्न॑स्यान्नस्य॒ वप॑त्यन्नस्या-न्नस्या॒वरु॑द्ध्यै कृ॒ष्टे
 वपति॑ कृ॒ष्टे ह्योष॑धयः प्र॒ति॒तिष्ठ॑न्त्यनु॒सीतं॑ वपति॒ प्रजा॑त्यै द्वाद॒शसु॑
 सीता॑सु वपति॒ द्वाद॑श मा॒साः सँव॑त्सरः सँव॑त्सरेणै॒वास्मा॑
 अन्नं॑ पचति॒ यद॑ग्निचि - [] 29

TS 5.2.5.6

-दन॑वरुद्धस्या-॒रुनी॑यादव-रुद्धे॒न व्य॑द्ध्येत॒ ये वन॑स्पतीनां
 फल॑ग्रहय-स्तानि॒द्धमे॑ऽपि प्रोक्षे-दन॑वरुद्धस्या-वरु॑द्ध्यै दिग्भ्यो
 लो॒ष्टान्त् सम॑स्यति दि॒शामे॒व वी॑र्यम॒वरु॑द्ध्य दि॒शां वी॑र्येऽग्निं चि॒नुते॑
 यं द्वि॒ष्याद्-यत्र॑ स स्यात् तस्यै दि॒शो लो॒ष्टमा ह॑रेदिष-मूर्ज॑मह॒मित
 आ दद॑ इतीषमेवोर्जं तस्यै दि॒शोऽव () रुन्धे॑ क्षो॒धुको भ॑वति
 यस्तस्यां॑ दि॒शि भ॑वत्युत्तरवेदिमुप॒ वप॑त्युत्तरवेद्या॒ ह्यग्नि॑श्चीयते ऽथो
 प॒शवो॑ वा उत्तरवेदिः प॒शूने॒वाव रुन्धे॑ऽथो य॒ज्ञप॒रुषो॑ऽनन्तरित्यै ॥ 30

(च भवत्येतावद्वै पुरुषे वीर्यं - यत्कृष्टञ्चाऽकृष्टञ्च - दिख्-
सीता - अग्निचि - दव - पञ्चविंशतिश्च) (A5)

TS 5.2.6.1

अग्ने॑ तव॑ श्रवो॑ वय॑ इति॑ सि॒क॒ता नि॑ वपत्येतद्वा अग्ने॑र्वै॒श्वान॑रस्य॑
सू॒क्तं सू॒क्तेनै॒व वै॒श्वान॑रमव॑ रुन्धे षड्भि॑र्नि वपति॑ षड्वा ऋ॒तवः॑
सँव॑त्सरः सँव॑त्सरोऽग्नि॑र्वै॒श्वान॑रः साक्षा॑देव॑ वै॒श्वान॑रमव॑ रुन्धे स॒मु॒द्रं
वै॑ नामै॒तच्छ॑न्दः स॒मु॒द्रम॑नु प्र॒जाः प्र॒जाय॑न्ते यदे॒तेन॑ सि॒क॒ता नि॑
वपति॑ प्र॒जानां॑ प्र॒जन॑नायेन्द्रो - [] 31

TS 5.2.6.2

वृ॒त्राय॑ वज्रं॑ प्रा॒हर॑त् स त्रे॒धा व्य॑भवत् स्प॒यस्तृ॑तीयं॒ रथ॑स्तृ॒तीयं॒
यूप॑स्तृ॒तीयं॒ येऽन्त॑श्शरा॒ अशी॑र्यन्त॒ ताः शर्करा॑ अभवन्
तच्छर्करा॑णां॒ शर्कर॑त्वं वज्रो॑ वै शर्कराः प॒शुर॑ग्नि-र्यच्छर्करा॑भिर॒ग्निं
परि॑मिनोति॒ वज्रे॑णैवास्मै प॒शून् परि॑ गृह्णाति॒ तस्मा॑द्-वज्रे॑ण प॒शवः॑
परि॑गृहीतास्तस्मा॑त् स्थे॒यान॑स्थे॒यसो॑ नोप॑ हरते त्रि॒स॒प्ताभिः॑
प॒शुका॑मस्य - [] 32

TS 5.2.6.3

परि॑ मि॒नुया॑त् स॒प्त वै शी॑र्ष॒ण्याः प्रा॒णाः प्रा॒णाः प॒शवः॑ प्रा॒णैरे॒वास्मै॑
 प॒शून्व रु॒न्धे त्रि॒णवा॑भि-भ्रा॒तृव्य॑वत-स्त्रि॒वृत॑मे॒व वज्र॑ सं॒भृत्य॑
 भ्रा॒तृव्या॑य प्र॒हरति॑ स्तृ॒त्या अ॒परि॑मिताभिः परि॑ मि॒नुया-द॑परि॒मित॒स्या-
 व॒रुद्ध्यै॑ यं का॒मये॑ताप॒शुः स्या॒दित्य॑परि॒मित्य॑ तस्य॒ शर्क॑राः सि॒कता॑
 व्यू॒हेद॑परिगृहीत ए॒वास्य॑ वि॒षूची॑न् रे॒तः परा॑ सिञ्चत्य॒पशु॑रे॒व
 भव॑ति - [] 33

TS 5.2.6.4

यं का॒मये॑त प॒शुमा॑न्त् स्या॒दिति॑ परि॒मित्य॑ तस्य॒ शर्क॑राः सि॒कता॑
 व्यू॒हेत् परि॑गृहीत ए॒वास्मै॑ समी॒चीन् रे॒तः सिञ्च॑ति प॒शुमा॑ने॒व
 भव॑ति सौ॒म्या व्यू॑हति सोमो॒ वै रे॒तो॒धा रे॒त ए॒व तद्-द॑धाति गाय॒त्रिया॑
 ॥ ब्रा॒ह्मण॑स्य गाय॒त्रो हि ब्रा॒ह्मण॑-स्त्रि॒ष्टुभा॑ राज॒न्यस्य॑ त्रै॒ष्टुभो॑ हि राज॒न्यः
 श॒म्युं बा॒र्हस्प॑त्यं मे॒धो नो॑पा॒नम॑त् सौ॒ग्निं प्रा॑वि॒शत् - [] 34

TS 5.2.6.5

सौ॒ग्नेः कृ॑ष्णो रू॒पं कृ॒त्वोदा॑यत सो॒ऽश्वं प्रा॑वि॒शत् सो॒ऽश्व॑स्या-
 वा॒न्तर॑श॒फो-भ॒वद्-यद॑श्चमा॒क्रम॑यति य ए॒व मे॒धोऽश्वं॑ प्रा॑वि॒शत्

तमे॒वाव॑ रु॒न्धे प्र॒जाप॑ति॒नाऽग्नि॑श्चे॒तव्य॑ इत्याहुः प्राजापत्योऽश्वो
यद॑श्च॒माक्रम॑यति प्र॒जाप॑ति॒नैवाऽग्निं॑ चि॒नुते॑ पु॒ष्कर॑पर्णमुप दधाति
योनि॑र्वा अ॒ग्नेः पु॒ष्कर॑पर्णं स॒योनि॑- () -मे॒वाग्निं॑ चि॒नुते॑ ऽपां
पृ॒ष्ठम॑सीत्युप दधात्य॒पां वा॑ ए॒तत् पृ॒ष्ठं य॑त् पु॒ष्कर॑पर्णं
रूपे॑णै॒वैन॑दुप दधाति ॥ 35

(इन्द्रः - पशुकामस्य - भवत्य - विशथ - सयोनिं - विशतिश्च) (A6)

TS 5.2.7.1

ब्र॒ह्म ज॒ज्ञान॑मिति रु॒क्ममु॑प दधाति ब्र॒ह्ममु॑खा वै प्र॒जाप॑तिः प्र॒जा
अ॒सृज॑त ब्र॒ह्ममु॑खा ए॒व तत् प्र॒जा य॑ज॒मानः॑ सृज॑ते ब्र॒ह्म ज॒ज्ञान॑मित्याह
तस्मा॑द्ब्राह्म॒णो मुख्यो॑ मुख्यो॑ भवति य ए॒वं वे॑द ब्र॒ह्मवा॑दिनो वदन्ति
न पृ॑थि॒व्यां ना॒न्तरि॑क्षे न दि॒व्यग्नि॑श्चे॒तव्य॑ इति यत् पृ॑थि॒व्यां चि॑न्वीत
पृ॑थि॒वीं शु॒चाऽर्प॑येन्नौष॒धयो॑ न व॒नस्प॑तयः - [] 36

TS 5.2.7.2

प्र जाये॒रन् यद॒न्तरि॑क्षे चिन्वी॒तान्तरि॑क्षं शु॒चाऽर्प॑येन्न वया॒ंसि
 प्र जाये॒रन् यद्-दि॒वि चिन्वी॑त दि॒वः शु॒चाऽर्प॑येन्न पर्जन्यो
 वर्षे॒द्रुक्म॑मुप दधात्य॒मृतं वै हिर॑ण्यम॒मृत ए॒वाग्निं चि॑नुते प्रजा॒त्यै
 हिर॑ण्यं पु॒रुष॑मुप दधाति यज॒मानलो॑कस्य वि॒धृत्यै॑ यद्वि॒ष्टका॑या
 आ॒तृण्ण॑मनूपद॒ध्यात् प॒शूनां च॑ यज॒मानस्य॑ च प्रा॒णमपि॑

द॒ध्याद् दक्षि॑णतः – [] 37

TS 5.2.7.3

प्रा॒ञ्चमु॑प दधाति दा॒धार यज॑मानलो॒कं न प॒शूनां च॑ यज॒मानस्य॑
 च प्रा॒णमपि॑ दधात्यथो ख॒ल्विष्ट॑काया आ॒तृण्ण॑मनूप दधाति
 प्रा॒णाना॑मु॒त्सृष्ट्यै॑ द्र॒फ्सश्च॑स्क॒न्देत्य॑भि मृ॒शति॑ हो॒त्रास्वे॒वैनं
 प्र॒तिष्ठा॑पयति सु॒चावु॑प दधात्या॒ज्यस्य॑ पूर्णां का॒र्ष्यम॒यीं द॒ध्नः
 पूर्णा॑-मौदु॒ंबरी॑मियं वै का॒र्ष्यम॒य्यसा॒वौ-दु॒ंबरी॑मे ए॒वोप॑

धत्ते – [] 38

TS 5.2.7.4

तूष्णीमुप दधाति न हीमे यजुषाऽऽप्तुमर्हति दक्षिणां कार्ष्ण्यमयी-
मुत्तरामौ-दुम्बरीं तस्मादस्या असावुत्तरा ऽऽज्यस्य पूर्णां कार्ष्ण्यमयीं
वज्रो वा आज्यं वज्रः कार्ष्ण्यो वज्रेणैव यज्ञस्य दक्षिणतो
रक्षाऽस्यप हन्ति दध्नः पूर्णामौदुम्बरीं पशवो वै दध्यूर्गुदुम्बरः
पशुष्वेवोर्जं दधाति पूर्णो उप दधाति पूर्णो एवैन - [] 39

TS 5.2.7.5

ममुष्मिन् लोक उपतिष्ठेते विराज्यग्निश्चेतव्य इत्याहुः सुग्वै विराड्यथ्
सुचावुपदधाति विराज्येवाग्निं चिनुते यज्ञमुखेयज्ञमुखे वै क्रियमाणे
यज्ञं रक्षांसि जिघांसन्ति यज्ञमुखं रुक्मो यद्-रुक्मं
व्याघारयति यज्ञमुखादेव रक्षाऽस्यप हन्ति पञ्चभिव्या घारयति
पाङ्क्तो यज्ञो यावानेव यज्ञस्तस्माद्-रक्षाऽस्यप हन्त्यक्ष्णयाव्या
घारयति तस्मादक्ष्णया () पशवोऽङ्गानि प्र हरन्ति प्रतिष्ठित्यै ॥ 40

(वनस्पतयो- दक्षिणतो- धत्त- एनं- तस्मा दक्ष्णया-
पञ्च च) (A7)

TS 5.2.8.1

स्वयमा॒तृ॒ण्णामु॑प॒ दधा॒तीयं॑ वै स्वयमा॒तृ॒ण्णेमा॒मेवो॑प॒ धत्ते॑
 ऽश्व॒मुप॑ घ्रापयति प्रा॒णमे॒वास्यां॑ दधात्यथो प्राजापत्यो वा अश्वः
 प्रजा॑पतिनैवाऽग्निं चिनुते प्रथ॒मेष्ट॑कोपधीयमाना पशूनां च
 यज॑मानस्य च प्रा॒णमपि॑ दधाति स्वयमा॒तृ॒ण्णा भव॑ति
 प्रा॒णानामु॑त्सृष्ट्या अथो सुव॒र्गस्य॑ लो॒कस्यानु॑ख्यात्या
 अ॒ग्नाव॒ग्निश्चे॒तव्य॑ इत्याहु॒रेष वा - [] 41

TS 5.2.8.2

अ॒ग्निर्वै॑श्वा॒नरो॑ यद्ब्रा॒ह्मण॑स्तस्मै प्रथ॒मामिष्ट॑कां यजु॒ष्कृतां॑ प्रयच्छेत्
 तां ब्रा॒ह्मण॑श्चोप॒ दद्ध्या॑ता-म॒ग्नावे॒व तद॒ग्निं चि॑नुत ईश्व॒रो वा ए॒ष
 आ॒र्तिमा॒र्तो॒र्यो-ऽवि॒द्वानिष्ट॑का-मुप॒दधा॑ति त्रीन् वरा॑न् दद्यात्
 त्रयो॑ वै प्रा॒णाः प्रा॒णाना॑ ऽस्पृ॒त्यै द्वावे॒व दे॒यौ द्वौ हि प्रा॒णावे॒क
 ए॒व दे॒य ए॒को हि प्रा॒णः प॒शु - [] 42

TS 5.2.8.3

-र्वा ए॒ष यद॒ग्निर्न॑ खलु॒ वै प॒शव॑ आयवसे रमन्ते दूर्वेष्ट॒कामु॑प॒ दधा॑ति
 पशूनां धृत्यै द्वाभ्यां प्रतिष्ठित्यै काण्डात् काण्डात् प्ररोहन्तीत्याह

काण्डे॑न॒काण्डे॑न॒ ह्येषा॑ प्र॒ति॒तिष्ठ॑त्ये॒वा नो॑ दूर्वे॒ प्रत॑नु स॒हस्रे॑ण श॒तेन॑
चे॒त्याह॑ सा॒हस्रः॑ प्र॒जाप॑तिः प्र॒जाप॑तेरा॒प्त्यै दे॒वल॑क्ष्मं वै त्र्या॒लिखि॑ता
तामु॑त्तरलक्ष्माणं दे॒वा उपा॑दधता-धरलक्ष्माण-मसु॒रा यं - [] 43

TS 5.2.8.4

का॒मये॑त वसी॒यान्त् स्या॑दित्यु॒त्तर॑लक्ष्माणं तस्यो॒प द॑द्ध्यद्-वसी॒याने॒व
भव॑ति यं का॒मये॑त पापी॒यान्त् स्या॑दित्यधरलक्ष्माणं तस्यो॒प
द॑द्ध्यद्सु॒रयो॒नि-मे॒वैन॑मनु॒ परा॑ भावयति पापी॒यान् भव॑ति त्र्या॒लिखि॑ता
भव॑तीमे॒ वै लो॒कास्त्र्या॑लिखितै॒भ्य ए॒व लो॒केभ्यो॑ भ्रातृ॒व्यम॑न्तरेत्यङ्गि॒रसः
सु॒वर्गं लो॒कं य॑तः पु॒रोडा॑शः कू॒र्मो भू॒त्वाऽनु॑ प्रा॒सर्प - [] 44

TS 5.2.8.5

-द्यत् कू॒र्ममु॑प॒दधा॑ति यथा॑ क्षे॒त्रवि॑दञ्जसा नयत्ये॒वमे॒वैनं॑ कू॒र्मः
सु॒वर्गं लो॒कम॑ञ्जसा नयति मे॒धो वा ए॒ष प॑शूनां य॑त् कू॒र्मो यत्
कू॒र्ममु॑प॒ दधा॑ति स्वमे॒व मे॒धं प॑श्यन्तः प॒शव॑ उप॒ तिष्ठ॑न्ते श्मशानं वा
ए॒तत् क्रि॑यते यन्मृ॒तानां॑ प॒शूनाञ् शी॒र्षाण्यु॑प॒धी॑यन्ते यज्जी॒वन्तं
कू॒र्ममु॑प॒ दधा॑ति तेनाश्मशानचि॒द्वास्त॑व्यो वा ए॒ष यत् - [] 45

TS 5.2.8.6

कू॒र्मो म॒धु वा॒ता ऋ॒ताय॒त इति॑ द॒ध्ना म॒धुमि॒श्रेणा॒भ्यन॑क्ति
 स्व॒दय॑त्ये॒वैनं॑ ग्रा॒म्यं वा॑ ए॒तद॒न्नं यद्-द॑द्ध्यार॒ण्यं म॒धु यद्द॑ध्ना
 म॒धुमि॒श्रेणा॑ भ्य॒नक्त्यु॒भय॑स्या ऽव॒रुद्ध्यै॑ म॒ही द्यौः पृ॑थि॒वी च न
 इत्या॑हा ऽऽभ्या॒मेवैन॑मु॒भय॑तः परि॒गृह्णा॑ति प्रा॒ञ्चमु॑प दधाति सु॒वर्ग॑स्य
 लो॒कस्य॑ सम॒ष्ट्यै पु॒रस्ता॑त् प्र॒त्यञ्च॑मु॒प दधा॑ति तस्मा॑त् - [] 46

TS 5.2.8.7

पु॒रस्ता॑त् प्र॒त्यञ्चः॑ प॒शवो॑ मे॒धमु॑प तिष्ठ॒न्ते यो वा अ॑प॒नाभि॑म॒ग्निं
 चि॒नुते॑ यज॒मान॑स्य नाभि॒मनु॑ प्रवि॒शति॑ स ए॒नमी॑श्व॒रो
 हि॒ऽसि॑तो॒रुलू॑ख॒लमु॑प दधात्येषा वा अ॒ग्नेर्ना॑भिः स॒नाभि॑मे॒वाऽग्निं॑
 चि॒नुते॑ हि॒ऽसा॒या औ॑दु॒म्बरं॑ भव॒त्यूर्वा॑ उ॒दुम्ब॑र ऊ॒र्जमे॒वाव॑ रु॒न्धे
 म॒द्ध्यत॑ उप दधाति म॒द्ध्यत॑ ए॒वास्मा॑ ऊ॒र्जं दधा॑ति तस्मा॑न्-()-
 म॒द्ध्यत॑ ऊ॒र्जा भु॑ञ्जत इ॒यद्-भ॑वति प्र॒जाप॑तिना य॒ज्ञमु॑खेन
 सं॒मित॑म॒व ह॑न्त्य॒न्नमे॒वाक॑-वै॒ष्णव्य॑र्चो॒प दधा॑ति वि॒ष्णुर्वै॑ य॒ज्ञो वै॒ष्णावा॑
 व॒नस्प॑तयो य॒ज्ञ ए॒व य॒ज्ञं प्र॑तिष्ठापयति ॥ 47

(एष वै – पशु – र्य – मसर्प – देष यत् – तस्मात् – तस्मात् –
सप्तविंशतिश्च) (A8)

TS 5.2.9.1

एषां वा एतल्लोकानां ज्योतिः सम्भृतं यदुखा यदुखा-मुपदधात्येभ्य
एव लोकेभ्यो ज्योतिरव रुन्धे मद्ध्यत उप दधाति मद्ध्यत एवास्मै
ज्योतिर्दधाति तस्मान्मद्ध्यतो ज्योतिरुपाऽऽस्महे सिकताभिः
पूरयत्येतद्वा अग्नेर्वैश्वानरस्य रूपं रूपेणैव वैश्वानरमव रुन्धे
यं कामयेत क्षोधुकः स्यादित्यूनां तस्योप – [] 48

TS 5.2.9.2

दद्ध्यात् क्षोधुक एव भवति यं कामयेता-नुपदस्य-दन्नमद्यादिति
पूर्णां तस्योप दद्ध्यादनुपदस्य-देवान्नमत्ति सहस्रं वै प्रति पुरुषः
पशूनां यच्छति सहस्रमन्ये पशवो मद्ध्ये पुरुषशीर्षमुप दधाति
सवीर्यत्वायो-खायामपि दधाति प्रतिष्ठामेवैनद्-गमयति व्यृद्धं वा
एतत् प्राणैरमेद्ध्यं यत् पुरुषशीर्षममृतं खलु वै प्राणा – [] 49

TS 5.2.9.3

अ॒मृत॑ꣳ हिर॑ण्यं प्रा॒णेषु॑ हिर॑ण्यश॒ल्कान् प्रत्य॑स्यति प्रति॒ष्ठामे॒वैनद्-
 गम॑यित्वा प्रा॒णैः सम॑र्धयति द॒ध्ना म॑धुमिश्रेण पू॒रयति॑
 मध॑व्योऽसानीति शृ॒तात॒ङ्क्येन॑ मे॒ध्यत्वाय॑ ग्रा॒म्यं वा ए॒तदन्नं॑
 यद्-द॑ध्या॒रण्यं म॑धु यद्द॒ध्ना म॑धुमिश्रेण पू॒रयत्यु॒भय॑स्या-वरु॒द्ध्यै
 पशु॑शीर्षाण्युप दधाति प॒शवो॑ वै पशु॑शीर्षाणि प॒शूने॒वाव रु॒न्धे
 यं का॒मये॑तापशुः स्यादिति - [] 50

TS 5.2.9.4

विषू॑चीनानि तस्योप द॒ध्याद्-विषू॑च ए॒वास्मात् प॒शून् द॑धात्यप॒शुरे॒व
 भव॑ति यं का॒मये॑त पशु॒मान्थ्-स्या॑दिति समी॒चीनानि॑ तस्योप
 द॒ध्याथ् समी॑च ए॒वास्मै प॒शून् द॑धाति पशु॒माने॒व भव॑ति पु॒रस्ता॑त्
 प्रती॑चीनमश्चस्योप दधाति प॒श्चात् प्रा॒चीन॑मृषभस्या-प॒शवो॑ वा अ॒न्ये
 गो॑ अश्चे॒भ्यः प॒शवो॑ गो अश्वा॒नेवा॒स्मै समी॑चो दधात्ये-ताव॒न्तो वै
 प॒शवो॑ - [] 51

TS 5.2.9.4

द्वि॒पादश्च॑ चतु॒ष्पादश्च॑ तान् वा ए॒तद॒ग्नौ प्र॑दधाति यत् प॒शु॒शीर्षा॑ण्युप-
 दधा॒त्य-मु॒मा॒रण्यम॑नु ते दि॒शामी॑त्याह॒ ग्राम्ये॑भ्य ए॒व प॒शुभ्य॑ आ॒रण्यान्
 प॒शूञ्छु॑चमनू॒त्सृ॑जति॒ तस्मा॑त् स॒माव॑त् प॒शूनां॑ प्र॒जाय॑मानाना-मा॒रण्याः
 प॒शवः॑ कनी॒याऽसः॑ शु॒चा ह्य॑ताः सर्प॒शीर्षमु॑प दधाति यै॒व सर्पे॑
 त्वि॒षिस्ता॑मे॒वाव रु॒न्धे - [] 52

TS 5.2.9.5

यथ् स॒मीची॑नं प॒शु॒शीर्षै॑रुप द॒ध्याद् ग्राम्या॑न् प॒शून् द॒शुकाः॑
 स्यु॒र्यद्-वि॒षूची॑न-मा॒रण्यान् य॒जुरे॑व व॒देद॑व तां त्वि॒षिऽरु॒न्धे या सर्पे॑
 न ग्रा॒म्यान् प॒शून् हि॒नस्ति॒ नाऽऽ*र॒ण्यान॑थो खलू॒पधे॑यमे॒व यदु॑प॒दधा॑ति
 तेन॒ तां त्वि॒षिम॑व रु॒न्धे या सर्पे॑ यद्-य॒जुर्व॑दति॒ तेन॑ शान्तं ॥ 53

(ऊ॒नान्त॑स्योप॑ - प्रा॒णाः - स्या॒दिति॑ - वै प॒शवो॑ - रु॒न्धे -
 चतु॑श्च॒त्वारि॑श॒च्च) (A9)

TS 5.2.10.1

प॒शुर्वा ए॒ष यद॑ग्निर्यो॒निः खलु॑ वा ए॒षा प॒शोर्वि॑ क्रि॒यते॒ यत्
 प्रा॒चीन॑मैष्ट॒काद्-य॒जुः क्रि॒यते॒ रेतो॑ऽप॒स्या अप॒स्या उप॑ दधाति

यो॒नावे॒व रे॒तो द॒धाति॑ पञ्चो॒प द॒धाति॑ पा॒ङ्गाः प॒शवः॑ प॒शूने॒वास्मै॑
 प्र॒ज॒नय॑ति पञ्च दक्षि॒णतो॑ वज्रो वा अ॒पस्या॑ वज्रे॒णैव॑ य॒ज्ञस्य॑
 दक्षि॒णतो॑ रक्षा॒स्यप॑ हन्ति पञ्च पश्चात् – [] 54

TS 5.2.10.2

प्रा॒चीरु॒प द॒धाति॑ पश्चा॒द्वै प्रा॒चीन॑ रे॒तो धी॑यते पश्चा॒देवा॒स्मै प्रा॒चीन॑
 रे॒तो द॒धाति॑ पञ्च पु॒रस्ता॑त् प्र॒तीची॒रुप॑ द॒धाति॑ पञ्च पश्चात्
 प्रा॒चीस्त॑स्मात् प्रा॒चीन॑ रे॒तो धी॑यते प्र॒तीचीः॑ प्र॒जा जा॑यन्ते
 पञ्चो॒त्तर॑त इ॒च्छन्द्स्याः॑ प॒शवो॑ वै छ॒न्दस्याः॑ प॒शूने॒व प्र॒जाता॑न्थ्
 स्वमा॒यत॑नम॒भि पर्यू॑हत इ॒यं वा अ॒ग्ने-र॑तिदाहाद॒बिभे॑थ्

सैता – [] 55

TS 5.2.10.3

अ॒पस्या॑ अ॒पश्य॑त् ता उ॒पाध॑त्त ततो वा इ॒मां ना॒त्यद॑हद्-यद॒पस्या॑
 उ॒पद॑धात्यस्या अ॒नति॑दाहायोवाच हे॒यम॑ददि॒थ् स ब्र॑ह्मणाऽन्नं य॒स्यैता॑
 उ॒पधी॑यान्तै य उ चै॒ना ए॒वँवे॑ द॒दिति॑ प्रा॒णभू॑त उप द॒धाति॑ रे॒तस्ये॒व

प्रा॒णान् द॒धाति॑ तस्मा॒द्-वदन् प्रा॒णन् पश्य॑ञ्छृ॒ण्वन् प॒शुर्जा॒यते॑
 ऽयं पुरो - [] 56

TS 5.2.10.4

भुव॑ इति॑ पु॒रस्ता॒दुप॑ द॒धाति॑ प्रा॒णमे॒वैताभि॑-र्दा॒धारा॒ऽयं दक्षि॑णा
 वि॒श्वक॑र्मेति॑ दक्षि॒णतो॑ मन॑ ए॒वैताभि॑र्दा॒धारा॒यं पश्चा॑द्-वि॒श्वव्य॑चा इति॑
 पश्चा॑-च्चक्षु॑रे॒वैताभि॑-र्दा॒धारे॒द-मु॒त्तरा॑थ् सु॒वरि॑त्यु॒त्तरतः॑
 श्रो॒त्रमे॒वैताभि॑-र्दा॒धारे॒यमु॒परि॑ म॒तिरि॑त्यु॒परि॑ष्ठाद्-वा॒चमे॒वैताभि॑-
 दा॒धार द॑शद॒शोप॑ द॒धाति॑ स॒वीर्य॑त्वा॒याक्ष्ण॑यो - [] 57

TS 5.2.10.5

-प द॒धाति॑ तस्मा॒दक्ष्ण॑या प॒शवो॑ऽङ्गानि॑ प्र॒हर॑न्ति प्र॒तिष्ठि॑त्यै॒ याः
 प्रा॒चीस्ता॑भि-र्व॒सिष्ठ॑ आ॒ध्धर्नो॑द्या दक्षि॒णा ताभि॑र्भ॒रद्वा॑जो॒ याः
 प्र॒तीची॑स्ताभि॑ वि॒श्वामि॑त्रो॒ या उ॒दीची॑स्ताभि॑-र्ज॒मद॑ग्निर्या
 ऊ॒र्ध्वास्ता॑भि-र्वि॒श्वकर्मा॑ य ए॒वमे॒तासा॑मृ॒द्धिं वै॒दध्ध॑र्नो॒त्येव॑
 य आ॒सामे॒वं ब॒न्धुतां॑ वै॒द ब॒न्धुमा॑न् भवति॑ य आ॒सामे॒वं क्लृ॑प्तिं
 वै॒द क॒ल्पते॑ - [] 58

TS 5.2.10.6

ऽस्मै॑ य आ॒सामे॒वमा॒यत॑नं वे॒दाऽऽ*य॑तनवान् भवति॑ य आ॒सामे॒वं
 प्र॒तिष्ठां॑ वे॒द प्र॒त्येव॑ तिष्ठति॑ प्राण॒भृ॒त उप॑धाय सँय॑त उप॑ दधाति॑
 प्रा॒णाने॒वा ऽस्मिन्॑ धि॒त्वा सँय॑द्भिः सँय॑च्छति॑ तथ् सँय॑ताञ्
 सँय॑त्वमथो॑ प्राण॒ ए॒वापा॑नं दधाति॑ तस्मा॑त् प्रा॒णापा॑नौ सं च॑रतो॒
 वि॒षूची॑रुप॑ दधाति॑ तस्मा॑द्-विष्व॒ञ्चौ प्रा॒णापा॑नौ यद्वा
 अ॒ग्नेर॑सँय॑त - [] 59

TS 5.2.10.7

-म॒सुव॑र्ग्यमस्य॑ तथ् सु॒वर्ग्यो॑ऽग्नि॒र्यथ् सँय॑त उप॑ दधाति॑ स॒मेवैनं॑
 य॑च्छति सु॒वर्ग्यमे॒वाक॑-स्त्र्य॒विर्वयः॑ कृ॒तम॑याना॒मित्या॑ह
 वयो॑भिरे॒वाया॑नव॒ रुन्धे॑ ऽयै॒र्वया॑ऽसि॒ सर्व॑तो वा॒युम॑ती॒र्भव॑न्ति
 तस्मा॑दय॑ऽसर्व॑तः पवते ॥ 60

(पश्चा - दे॒ताः - पु॒रो - ऽक्ष॑णया - क॒ल्प॑ते - ऽसं॑ य॒तं -
 पञ्च॑त्रिं॒शच्च॑) (A10)

TS 5.2.11.1

गा॒य॒त्री त्रि॒ष्टुब् जग॑त्यनु॒ष्टुक् पङ्क्त्या॑ सह ।
 बृ॒ह॒त्यु॒ष्णिहा॑ क॒कु॒थ् सू॒चीभिः॑ शि॒म्यन्तु॑ त्वा ॥
 द्वि॒प॒दा या चतु॑ष्प॒दा त्रि॒प॒दा याच॑ षट्प॒दा ।
 स॒छ॒न्दा या च वि॒च्छ॒न्दाः सू॒चीभिः॑ शि॒म्यन्तु॑ त्वा ॥
 म॒हा॒ना॒म्नी रे॒व॒त॒यो वि॒श्वा आ॒शाः प्र॒सू॒व॒रीः ।
 मे॒घ्या वि॒द्युतो॑ वाचः सू॒चीभिः॑ शि॒म्यन्तु॑ त्वा ॥
 र॒ज॒ता हरि॑णीः सी॒सा यु॒जो यु॒ज्यन्ते॑ कर्म॒भिः ।
 अ॒श्वस्य॑ वा॒जिन॑स्त्व॒चि सू॒चीभिः॑ शि॒म्यन्तु॑ त्वा ॥
 नारी॑ – [] 61

TS 5.2.11.2

–स्ते प॒त्नयो॑ लो॒म वि॒चि॒न्वन्तु॑ मनी॒षया॑ ।
 दे॒वानां॑ प॒त्नीर्दि॑शः सू॒चीभिः॑ शि॒म्यन्तु॑ त्वा ॥
 कु॒वि॒द॒ङ्ग यव॑मन्तो॒ यवं चि॒द्यथा॑ दा॒न्त्यनु॑पूर्व॒ वियू॑य ।
 इ॒हे॒हैषां॑ कृ॒णुत॑ भो॒ज॒नानि॑ ये ब॒र्हिषो॑ नमो॒वृक्तिं॑ न॒ज॒ग्मुः ॥ 62
 (नारी॑ – स्त्रि॒५॒श॒च्च) (A11)

TS 5.2.12.1

क॒स्त्वा॑ च्छ॒यति॑ क॒स्त्वा॑ वि॒ शा॒स्ति॑ क॒स्ते॑ गा॒त्राणि॑ शि॒म्यति॑ ।

क॒ उ॒ ते॑ श॒मिता॑ क॒विः॑ ॥

ऋ॒तव॑स्त ऋ॒तुधा॑ प॒रुः श॒मिता॑रो वि॒शास॑तु ।

सँ॒व॒थ्स॒रस्य॑ धा॒यसा॑ शि॒मीभिः॑ शि॒म्यन्तु॑ त्वा ॥

दै॒व्या अ॒ध्व॒र्यव॑स्त्वा च्छ॒यन्तु॑ वि॒ च॑ शा॒सतु॑ ।

गा॒त्राणि॑ प॒र्वश॑स्ते शि॒माः कृ॑ण्वन्तु शि॒म्यन्तः॑ ॥

अ॒र्ध॒मा॒साः प॒रू॒षि॑ ते॒ मा॒साः छ॑यन्तु शि॒म्यन्तः॑ ।

अ॒हो॒रा॒त्राणि॑ म॒रुतो॑ वि॒लिष्ट॑ - [] 63

TS 5.2.12.2

सू॒दय॑न्तु ते ॥

पृ॒थि॒वी ते॑ ऽन्त॒रिक्षे॑ण वा॒युश्छि॑द्रं भिष॒ज्यतु॑ ।

द्यौ॒स्ते नक्ष॑त्रैः स॒ह रू॒पं कृ॑णोतु सा॒धुया॑ ॥

शं ते॒ प॒रे॒भ्यो गा॒त्रे॒भ्यः श॑मस्त्व॒वरे॑भ्यः ।

श॑म॒स्थ॒भ्यो म॒ज्ज॒भ्यः श॑मु ते॒ त॒नुवे॑ भुवत् ॥ 64

(विलिष्टं - त्रि॒श॒च्य) (A12)

Prasna Korvai with starting Padams of 1 to 12 Anuvaakams :-

(विष्णु॑मुखा - अन्न॑पते - याव॑ती - वि॒ वै - पु॑रुषमा॒त्रेणा -
ऽग्ने॑ तव॒ श्रवो॑ वयो - ब्र॒ह्म ज॑ज्ञान॒ - स्व॑यमा॒तृण्णा - मे॒षां वै -
प॒शु - गा॑यत्री - क॒स्त्वा - द्वा॑दश)

Korvai with starting Padams of 1, 11, 21 Series of Panchaatis :-

(विष्णु॑मुखा - अप॑चिति॒मान् - वि॒ वा ए॒ता - व॒ग्ने तव॑ -
स्व॑यमा॒तृण्णां - वि॒षू॒चीना॑नि - गा॒यत्री - च॒तु॒ष्प॒ष्टिः)

First and Last Padam of Second Prasnam of 5th Kandam

(विष्णु॑मुखा - स्त॒नु॒वे भुव॑त्)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे द्वितीयः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

5.3 पञ्चमकाण्डे तृतीयः प्रश्नः – चितीनां निरूपणं

TS 5.3.1.1

उ॒थ्स॒न्न॒ य॒ज्ञो॒ वा॒ ए॒ष॒ य॒द॒ग्निः॒ किं॑ वा॒ऽहै॒तस्य॑ क्रि॒यते॑ किं॑ वा॒ न
य॒द्वै य॒ज्ञस्य॑ क्रि॒यमा॑णस्या-न्त॒र्यन्ति॑ पू॒यति॑ वा अ॒स्य तदा॑श्चिनीरुप॑
द॒धात्य॑श्चिनी॒ वै दे॒वानां॑ भि॒षजौ॑ ताभ्यामे॒वास्मै॑ भेष॒जं करो॑ति पञ्चोप॑
द॒धाति॑ पा॒ङ्क्तो॑ य॒ज्ञो या॒वाने॒व य॒ज्ञस्त॑स्मै भेष॒जं करो॑त्यृत॒व्या उप॑
द॒धात्यृ॑तूनां क्लृ॒प्त्यै - [] 1

TS 5.3.1.2

पञ्चोप॑ द॒धाति॑ पञ्च॒ वा ऋ॒तवो॑ यावन्त॑ ए॒वर्त॑वस्तान् क॒ल्पय॑ति
स॒मा॒नप्र॑भृतयो भवन्ति स॒मा॒नो॒द॒र्कास्त॑स्मा॒त् स॒मा॒ना ऋ॒तव॑ ए॒केन॑
प॒देन॑ व्यावर्तन्ते तस्मा॒द्-ऋ॒तवो॑ व्यावर्तन्ते प्रा॒णभृ॑त उप॑ द॒धात्यृ॑तुष्वे॒व
प्रा॒णान् द॒धाति॑ तस्मा॒त् स॒मा॒नाः सन्त॑ ऋ॒तवो॑ न जी॒र्यन्त्य॑थो

प्र॒जन॒यत्ये॒वैनाने॒ष वै वा॒युर्यत् प्रा॒णो यद्-ऋ॒तव्या उप॒धाय

प्रा॒णभृ॒त - [] 2

TS 5.3.1.3

उप॒दधा॒ति तस्मा॒त् सर्वा॑नृ॒तून् वा॒युरा व॒रीव॒र्त्ति वृ॒ष्टिस॒नीरु॒प द॒धाति॑
वृ॒ष्टिमे॒वाव रु॒न्धे यदे॑क॒धोप॒दद्ध्या-दे॑क॒मृ॒तुं ँव॒र्षेद॒नुपरि॒हारं॑

साद॒यति॑ तस्मा॒त् सर्वा॑नृ॒तून् व॒र्षति॑ यत् प्रा॒णभृ॒त उप॒धाय

वृ॒ष्टिस॒नीरु॒पद॒धाति॑ तस्मा॒द्-वा॒युप्र॑च्यु॒ता दि॒वो वृ॒ष्टिरी॒र्ते प॒शवो॑

वै वय॒स्या ना॒नाम॒नसः॑ ख॒लु वै प॒शवो॑ ना॒नाव्र॑तास्तेऽप॒ ए॒वाभि॑

सम॑नसो - [] 3

TS 5.3.1.4

यं का॒मये॑ताप॒शुः स्या॒दिति॑ वय॒स्यास्त॒स्यो-प॒धाया॑प॒स्या उप॑

द॒द्ध्याद॑ सं॒ज्ञान॑मे॒वास्मै॑ प॒शुभिः॑ क॒रोत्य॑प॒शुरे॒व भ॑वति॒ यं का॒मये॑त

प॒शुमा॒न्त्-स्या॒दित्य॑-प॒स्यास्त॒स्योप॒धाय॑ वय॒स्या उप॑ द॒द्ध्यात्

सं॒ज्ञान॑मे॒वास्मै॑ प॒शुभिः॑ क॒रोति॑ प॒शुमा॒ने॒व भ॑वति॒ चत॑स्रः पु॒रस्ता॒दुप॑

द॒धाति॑ तस्मा॒च्च॒त्वारि॑ चक्षु॒षो रू॒पाणि॑ द्वे शु॒क्ले द्वे कृ॒ष्णे - [] 4

TS 5.3.1.5

मू॒र्ध॒न्व॒ती॒र्भ॒व॒न्ति॒ तस्मा॑त् पु॒रस्ता॑न्मू॒र्द्धा॑ पञ्च॒ दक्षि॑णाया॒ श्रो॒ण्या॒मुप॑
 दधा॑ति पञ्चो॒त्तर॑स्यां॒ तस्मा॑त् प॒श्चाद्-वर्षी॑यान् पु॒रस्ता॑त् प्रवणः
 प॒शु॒र्ब॒स्तो वय॑ इति॒ दक्षि॑णेऽ॒स उप॑ दधाति वृ॒ष्णिर्वय॑ इत्यु॒त्तरे॑
 ऽ॒सावे॒व प्रति॑ दधाति व्याघ्रो वय॑ इति॒ दक्षि॑णे पक्ष॒ उप॑ दधाति
 सि॒हो वय॑ इत्यु॒त्तरे॑ पक्षयो॒रेव॑ वी॒र्यं॑ दधाति पु॒रुषो॑ वय॑ इति ()
 मद्ध्ये॒ तस्मा॑त् पु॒रुषः॑ प॒शूना॑मधिपतिः ॥ 5

(क्लृ॒प्त्या॑ - उप॒धाय॑ प्रा॒णभृ॒तः-सम॑नसः-कृ॒ष्णे-पु॒रुषो॑ वय॑ इति -
 पञ्च॑ च) (A1)

TS 5.3.2.1

इन्द्रा॑ग्नी॒ अव्य॑थमा॒नामि॑ति॒ स्वय॑मा॒तृ॒ण्णामु॑प॒ दधा॑तीन्द्रा॒ग्निभ्यां॑
 वा॑ इ॒मौ लो॒कौ वि॑धृ॒तावन॑यो-लो॒कयो॑-वि॒धृत्या॑ अ॒धृते॒व वा ए॒षा
 यन्म॑द्ध्य॒मा चि॑तिर॒न्तरि॑क्षमि॒व वा ए॒षेन्द्रा॑ग्नी॒ इत्या॑हेन्द्रा॒ग्नी वै
 दे॒वाना॑मो॒जो भृ॑ता॒वोज॑सै॒वैना॑-म॒न्तरि॑क्षे चि॒नुते॑ धृ॒त्यै

स्वयमा॒तृ॒ण्णामु॒प द॒धात्यन्तरि॒क्षं॑ वै स्वयमा॒तृ॒ण्णा ऽन्तरि॒क्षमे॒वोप॑
धत्ते ऽश्वमु॒प – [] 6

TS 5.3.2.2

घ्रापयति प्रा॒णमे॒वास्यां॑ द॒धात्यथो॑ प्राजापत्यो वा अश्वः
प्राजापति॑नैवाग्निं चिनुते स्वयमा॒तृ॒ण्णा भवति प्रा॒णानामु॒त्सृ॒ष्ट्या
अथो सु॒वर्गस्य॑ लो॒कस्यानु॑ख्यात्यै दे॒वानां॑ वै सु॒वर्गं लो॒कं
य॒तां दि॒शः सम॑व्लीयन्त त ए॒ता दि॒श्या अप॑श्यन् ता उपादधत
ताभिर्वै ते दि॒शोऽदृ॒हन् यद्दि॒श्या उप॑दधाति दि॒शां वि॒धृत्यै॑ द॒श
प्राण॑भृतः पु॒रस्ता॒दुप॑ – [] 7

TS 5.3.2.3

दधाति न॒व वै पु॒रुषे प्रा॒णा नाभि॑र्दशमी प्रा॒णाने॒व पु॒रस्ता॑द्धत्ते तस्मात्
पु॒रस्ता॑त् प्रा॒णा ज्योति॑ष्मती-मु॒त्तमामु॒प दधाति॑ तस्मात् प्रा॒णानां॑
वाग्ज्योति॑रु॒त्तमा द॒शोप॑ दधाति द॒शाक्ष॑रा वि॒राड् वि॒राट् छन्द॑सां
ज्योति॑र्ज्योति॒रेव पु॒रस्ता॑द्धत्ते तस्मात् पु॒रस्ता॑ज्ज्योति॒रुपा॑ ऽऽ*स्महे
छन्दा॑सि प॒शुष्व॑जि॒मयु॑स्तान् बृ॒हत्यु॑दजयत्
तस्मा॑द्-बा॒र्हताः॑ – [] 8

TS 5.3.2.4

प॒शव॑ उ॒च्यन्ते॑ मा॒ छन्द॑ इति॑ दक्षि॒णत॑ उप॑ दधाति॒ तस्माद्-दक्षि॑णा
वृ॒तो मा॑साः पृथि॒वी छन्द॑ इति॑ पश्चात्॑ प्र॒तिष्ठि॑त्या अ॒ग्निर्दे॒वतेत्यु॑त्तरत॑
ओजो॑ वा अ॒ग्निरोज॑ ए॒वोत्तर॑तो धत्ते॒ तस्मादु॑त्तरतो ऽभिप्रयायी॑ जयति॒
षट्त्रिं॑श॒थ् संप॑द्यन्ते॒ षट्त्रिं॑शदक्षरा बृ॒हती॑ बा॒र्हताः॑ प॒शवो॑
बृ॒हत्यैवा॑स्मै प॒शूनव॑ रुन्धे बृ॒हती॑ छन्द॒साऽ॒ स्वारा॑ज्यं प॒रीयाय॑
यस्यै॒ता - [] 9

TS 5.3.2.5

उप॒धीय॑न्ते गच्छति॒ स्वारा॑ज्यं स॒प्त वा॒लखि॑ल्याः पु॒रस्ता॑दुप॑
दधाति॒ सप्त॑ पश्चा॒थ् सप्त॑ वै शी॒र्षण्याः॑ प्रा॒णा द्वाववा॑ञ्चौ प्रा॒णानां॑
सवी॒र्यत्वा॑य मू॒र्धाऽसि॑ राडिति॒ पु॒रस्ता॑दुप॑ दधाति॒ यन्त्री॑ राडिति॒
पश्चात्॑ प्रा॒णानेवा॑स्मै स॒मीचो॑ दधाति ॥ 10

(अ॒श्वमु॑प-पु॒रस्ता॑दुप-बा॒र्हता-ए॒ता-श्रु॑तुस्त्रिं॒शच्च॑) (A2)

TS 5.3.3.1

दे॒वा वै यद्-य॒ज्ञे ऽकु॑र्वत॒ तदसु॑रा अकुर्वत॒ ते दे॒वा ए॒ता
अ॒क्ष्णया॑स्तोमीया॒ अप॑श्यन् ता अ॒न्यथा॑ ऽनू॒च्या-न्यथो॑पा॒दधत॑ तदसु॒रा

नान्ववायन् ततो देवा अभवन् पराऽसुरा यदक्षण्यास्तोमीया अन्यथा
 ऽनूच्यान्यथोप दधाति भ्रातृव्याभिभूत्यै भवत्यात्मना पराऽस्य भ्रातृव्यो
 भवत्या-शुस्त्रिवृदिति पुरस्तादुप दधाति यज्ञमुखं वै त्रिवृ - [] 11

TS 5.3.3.2

-द्यज्ञमुखमेव पुरस्ताद्वि यातयति व्योम सप्तदश इति दक्षिणतो
 ऽन्नं वै व्योमाऽन्नं सप्तदशोऽन्नमेव दक्षिणतो धत्ते तस्माद्-
 दक्षिणेनान्नमद्यते धरुण एकविंश इति पश्चात् प्रतिष्ठा वा
 एकविंशः प्रतिष्ठित्यै भान्तः पञ्चदश इत्युत्तरत ओजो वै भान्त
 ओजः पञ्चदश ओज एवोत्तरतो धत्ते तस्मादुत्तरतो ऽभिप्रयायी
 जयति प्रतूर्तिरष्टादश इति पुरस्ता- [] 12

TS 5.3.3.3

-दुप दधाति द्वौ त्रिवृतावभिपूर्वं यज्ञमुखे वि यातयत्यभिर्वतः
 सविंश इति दक्षिणतोऽन्नं वा अभिवर्तोऽन्नं सविंशोऽन्नमेव
 दक्षिणतो धत्ते तस्माद्-दक्षिणेनान्नमद्यते वर्चो द्वाविंश इति
 पश्चाद्-यद्-विंशतिर्द्वे तेन विराजौ यद् द्वे प्रतिष्ठा तेन विराजोरेवा-
 भिपूर्वमन्नाद्ये प्रतितिष्ठति तपो नवदश इत्युत्तर तस्मात् सव्यो-[] 13

TS 5.3.3.4

हस्तयोस्तपस्वितरो योनिश्चतुर्विंश इति पुरस्तादुप दधाति
चतुर्विंशत्यक्षरा गायत्री गायत्री यज्ञमुखं यज्ञमुखमेव पुरस्ताद्-
वियातयति गर्भाः पञ्चविंश इति दक्षिणतोऽन्नं वै गर्भा अन्नं
पञ्चविंशोन्नमेव दक्षिणतो धत्ते तस्माद् दक्षिणेनान्नमद्यत
ओजस्त्रिणव इति पश्चादिमे वै लोकास्त्रिणव एष्वेव लोकेषु
प्रतिष्ठति संभरणस्त्रयोविंश इत्यु - [] 14

TS 5.3.3.5

-त्तरतस्तस्मात् सव्यो हस्तयोः सम्भार्यतरः क्रतुरेकत्रिंश इति
पुरस्तादुप दधाति वाग्वै क्रतुर्यज्ञमुखं वाग्यज्ञमुखमेव पुरस्ताद्वि
यातयति ब्रध्नस्य विष्टपं चतुस्त्रिंश इति दक्षिणतोऽसौ वा
आदित्यो ब्रध्नस्य विष्टपं ब्रह्मवर्चसमेव दक्षिणतो धत्ते तस्माद्
दक्षिणोऽर्धो ब्रह्मवर्चसितरः प्रतिष्ठा त्रयस्त्रिंश इति पश्चात्
प्रतिष्ठित्यै नाकः षट्त्रिंश इत्युत्तरतः सुवर्गो वै () लोको नाकः
सुवर्गस्य लोकस्य समष्ट्यै ॥ 15

(वै त्रिवृ - दिति पुरस्ताथ - सव्य - स्त्रयोविंश इति - सुवर्गो
वै - पञ्च च) (A3)

Special Korvai for Anuvaakam 3

आशु - व्योम - धरुणो - भान्तः - प्रतूर्तिर - भिवर्तो - वर्च -
स्तपो - योनि - गर्भा - ओजः - संभरणः - क्रतु - ब्रह्मस्य
- प्रतिष्ठा - नाकः - षोडश)

TS 5.3.4.1

अग्नेर्भागोऽसीति पुरस्तादुप दधाति यज्ञमुखं वा अग्निर्यज्ञमुखं
दीक्षा यज्ञमुखं ब्रह्म यज्ञमुखं त्रिवृद्-यज्ञमुखमेव पुरस्ताद्वि यातयति
नृचक्षसां भागोऽसीति दक्षिणतः शुश्रुवांसो वै नृचक्षसोऽन्नं धाता
जातायैवास्मा अन्नमपि दधाति तस्माज्जातोऽन्नमत्ति जनित्रो स्पृतो
सप्तदशः स्तोम इत्याहाऽन्नं वै जनित्र - [] 16

TS 5.3.4.2

-मन्नो सप्तदशो-ऽन्नमेव दक्षिणतो धत्ते तस्माद् दक्षिणेना-
न्नमद्यते मित्रस्य भागोऽसीति पश्चात् प्राणो वै मित्रोऽपानो वरुणः
प्राणापानावेवास्मिन् दधाति दिवो वृष्टिर्वाताः स्पृता एकविंशः स्तोम

इत्याह॑ प्रति॒ष्ठा वा॑ एक॒वि॒ंशः॑ प्रति॒ष्ठित्या॑ इन्द्र॒स्य भा॒गोऽसीत्युत्तर॑त
ओजो॑ वा इन्द्र॒ ओजो॑ विष्णु॒रोजः॑ क्षत्र॒मोजः॑ पञ्चद॒श - [] 17

TS 5.3.4.3

ओज॑ ए॒वोत्तर॑तो ध॒त्ते तस्मा॑दुत्तरतो-ऽभि॒प्रया॒यी ज॑यति॒ वसू॑नां
भा॒गोऽसीति॑ पु॒रस्ता॑दुप॒ दधा॑ति य॒ज्ञमु॒खं वै वस॑वो य॒ज्ञमु॒खं रु॒द्रा
य॒ज्ञमु॒खं चतु॑र्वि॒ंशो य॒ज्ञमु॒खमे॒व पु॒रस्ता॑द्वि या॒तय॑त्यादि॒त्यानां॑
भा॒गोऽसीति॑ दक्षि॒णतोऽन्नं॑ वा आ॒दित्या॑ अन्नं॑ मरु॒तोऽन्नं॑ गर्भा॑ अन्नं॑
पञ्च॒वि॒ंशोऽन्नमे॒व दक्षि॑णतो ध॒त्ते तस्मा॑द् दक्षि॒णेनाऽन्न॑म॒द्यते॑
ऽदित्यै॑ भा॒गो - [] 18

TS 5.3.4.4

ऽसीति॑ प॒श्चात् प्रति॒ष्ठा वा॑ अ॒दितिः॑ प्रति॒ष्ठा पू॒षा प्रति॒ष्ठा त्रि॒णवः॑
प्रति॒ष्ठित्यै॑ दे॒वस्य॑ स॒वितु॑र्भा॒गोऽसीत्युत्तर॑तो ब्र॒ह्म वै दे॒वः स॒विता ब्र॒ह्म
बृ॒हस्प॑तिर्ब्र॒ह्म चतु॑ष्टो॒मो ब्र॒ह्मव॑र्च॒समे॒वोत्तर॑तो ध॒त्ते तस्मा॑दुत्त॒रोऽर्धो॑
ब्र॒ह्मव॑र्च॒सित॑रः सा॒वित्र॑वती भवति॒ प्रसू॑त्यै॒ तस्मा॑द् ब्रा॒ह्मणा॑नामु॒दीची॑

स॒निः प्र॒सू॒ता ध॒र्त्रश्चतु॒ष्टो॒म इति॑ पु॒रस्ता॒दुप॑ दधाति य॒ज्ञमु॒खं वै

ध॒र्त्रो – [] 19

TS 5.3.4.5

य॒ज्ञमु॒खं चतु॒ष्टो॒मो य॒ज्ञमु॒खमे॒व पु॒रस्ता॒द्वि या॑तयति या॒वानां॑
भा॒गोऽसी॑ति दक्षि॒णतो॑ मा॒सा वै या॒वा अ॒र्धमा॒सा अया॑वा-स्तस्मा॒द्-
दक्षि॒णावृ॑तो मा॒सा अन्नं॑ वै या॒वा अन्नं॑ प्र॒जा अन्नमे॒व दक्षि॑णतो ध॒त्ते
तस्मा॒द् दक्षि॑णेना-न्नमद्यत ऋ॒भूणां॑ भा॒गोऽसी॑ति प॒श्चात् प्र॑तिष्ठित्यै
वि॒वर्तो॑ ऽष्टाच॒त्वारि॒ंश इत्यु॑त्तरतोऽनयो॒र्लोकयोः॑ स॒वीर्य॑त्वाय
तस्मा॒दिमौ लो॒कौ समा॑वद्-वीर्यो – [] 20

TS 5.3.4.6

यस्य॑ मु॒ख्यव॑तीः पु॒रस्ता॒दुप॑धीयन्ते मु॒ख्य ए॒व भ॑वत्याऽस्य मु॒ख्यो
जा॒यते॑ यस्या-न्न॒वती – दक्षि॑णतो-ऽत्य॒न्नमा॑स्यो॒न्नादो॑ जा॒यते॑ यस्य॑
प्र॑तिष्ठावतीः प॒श्चात् प्र॑त्ये॒व तिष्ठ॑ति यस्यौज॒स्वती॑रुत्तरत ओज॒स्व्ये॒व
भ॑वत्याऽस्यौज॒स्वी जा॒यते॑ ऽर्को॑ वा ए॒ष यद॒ग्निस्त॑स्यै॒तदे॒व
स्तो॒त्रमे॒तच्छ॒स्त्रं य॑देषा वि॒धा – [] 21

TS 5.3.4.7

वि॒धी॒य॒तेऽर्क॑ ए॒व तद॒र्क्य॑म॒नु वि॒ धी॒य॒ते ऽत्य॒न्न॒माऽस्या॑न्नादो
जा॒य॒ते य॒स्यै॒षा वि॒धा वि॒धी॒य॒ते य उ॑ चै॒नामे॒वं वै॒द सृ॒ष्टी॒रुप॑ दधाति
यथा॑सृ॒ष्टमे॒वाव रु॒न्धे न वा इ॒दं दि॒वा न न॑क्त॒मासी॑दव्यावृ॒त्तं ते दे॒वा
ए॒ता व्यु॑ष्टी॒रप॒श्यन् ता उ॒पा॒द॒धत॑ ततो॒ वा इ॒दं () व्यौ॑च्छद्-
य॒स्यै॒ता उप॑धी॒य॒न्ते व्ये॑वास्मा॒ उच्छ॑त्यथो॒ तम॑ ए॒वाप॑हते ॥ 22

(वै॒ ज॒नि॒त्रं - पञ्च॑द॒शो - ऽदि॑त्यै॒ भा॒गो - वै॒ ध॒र्त्रः - स॒माव॑द्दी॒र्यै-
वि॒धा-त॒तो वा इ॒दं - च॒तु॒र्द॒श च) (A4)

Special Korvai for Anuvaakam 4

(अ॒ग्ने - नृ॒चक्ष॑सां - ज॒नि॒त्रं - मि॒त्र - स्ये॑न्द्र॒स्य -व॑सू॒ना -
मा॒दि॒त्याना॑ - म॒दि॒त्यै - दे॒वस्य॑ स॒वि॒तुः - सा॒वि॒त्र॒वती॑ - ध॒र्त्रो -
या॒वा॒ना-मृ॒भू॒णां - वि॒व॒र्त - श्र॒तु॒र्द॒श)

TS 5.3.5.1

अ॒ग्ने जा॒तान् प्र॑णु॒दा नः स॒प॒त्नानि॑ति॒ पु॒रस्ता॑दुप॒ दधा॑ति जा॒ताने॒व
भा॒तृव्या॑न् प्र॑णु॒दते स॒हसा॑ जा॒तानि॑ति॒ पश्चा॑ज्जनिष्यमा॒णाने॒व प्र॑ति॒ नुद॑ते
च॒तुश्च॑त्वारि॒ंशः स्तो॒म इति॑ दक्षि॒णतो॑ ब्र॒ह्मव॑र्च॒सं वै च॒तुश्च॑त्वारि॒ंशो

ब्र॒ह्मव॑र्च॒समे॒व दक्षि॑णतो॒ धत्ते॒ तस्मा॑द् दक्षि॒णोऽर्धो॑ ब्र॒ह्मव॑र्च॒सितरः॑
षोड॑शः स्तोम॒ इत्यु॑त्तरत॒ ओजो॒ वै षोड॑श॒ ओज॑ ए॒वोत्त॑रतो॒ धत्ते॒
तस्मा॑ – [] 23

TS 5.3.5.2

दु॒त्तरतो॑ऽभि॒प्रया॒यी ज॑यति॒ वज्रो॒ वै च॑तुश्च॒त्वारि॒ॐशो॑ वज्रः॒ षोड॑शो
यदे॒ते इष्ट॑के॒ उप॑दधाति॒ जा॒ताञ्च॑ ज॒निष्य॑माणाञ्च॒ भ्रातृ॑व्यान्
प्र॒णुद्य॑ वज्र॒मनु॑ प्र॒हरति॒ स्तृत्यै॒ पुरी॑षवतीं॒ मद्ध्य॑ उप॑दधाति॒ पुरी॑षं॒ वै
मद्ध्य॑मा॒त्मनः॒ सा॒त्मान॑मे॒वाग्निं॑ चि॒नुते॒ सा॒त्माऽमु॑ष्मिन् लो॒के भ॑वति॒
य ए॒वं वैदै॒ता वा अ॑स॒पत्ना॒ नामे॑ष्टका॒ यस्यै॒ता उप॑धी॒यन्ते॒ – [] 24

TS 5.3.5.3

ना॒स्य स॒पत्नो॑ भ॒वति॒ पशु॑र्वा ए॒ष यद॑ग्निर्वि॒राज॑ उत्त॒मायां॑ चि॒त्यामु॑प
दधा॑ति वि॒राज॑मे॒वोत्त॑मां॒ पशु॑षु दधा॑ति॒ तस्मा॑त् पशु॒मानु॑त्त॒मां वा॑चं
व॑दति॒ दश॑दशो॒प दधा॑ति॒ सवी॑र्य॒त्वाया॑ऽक्ष॒णयो॑प दधा॑ति॒ तस्मा॑दक्ष॒णया॑
प॒शवो॑ऽङ्गानि॒ प्र॒हर॑न्ति॒ प्रति॑ष्ठित्यै॒ यानि॒ वै छ॑न्दा॒ऽसि सु॒वर्ग्या॑ण्यास॒न्
तैर्दे॒वाः सु॒वर्गं॑ लो॒कमा॑यन् तेन॒र्षयो॑ – [] 25

TS 5.3.5.4

ऽश्राम्यन् ते तपोऽतप्यन्त तानि तपसाऽपश्यन् तेभ्य एता इष्टका
निरमिमतेवश्छन्दो वरिवश्छन्द इति ता उपादधत ताभिर्वै ते सुवर्गं
लोकमायन्. यदेता इष्टका उपदधाति यान्येव छन्दाँसि सुवर्ग्याणि
तैरेव यजमानः सुवर्गं लोकमेति यज्ञेन वै प्रजापतिः

प्रजा असृजत ताः स्तोम भागैरेवाऽसृजत यथ् – [] 26

TS 5.3.5.5

स्तोम भागा उपदधाति प्रजा एव तद्-यजमानः सृजते बृहस्पतिर्वा
एतद्-यज्ञस्य तेजः समभरद्यथ् स्तोमभागा यथ् स्तोमभागा उपदधाति
सतेजसमेवाग्निं चिनुते बृहस्पतिर्वा एतां यज्ञस्य प्रतिष्ठामपश्यद्यथ्
स्तोमभागा यथ् स्तोमभागा उपदधाति यज्ञस्य प्रतिष्ठित्यै सप्तसप्तोप
दधाति सवीर्यत्वाय तिस्रो मद्ध्ये प्रतिष्ठित्यै ॥ 27

(उत्तरतो धत्ते तस्मा - दुपधीयन्त - ऋषयो - ऽसृजत यत् -
त्रिचत्वारिंशच्च) (A5)

TS 5.3.6.1

र॒श्मि॒रित्ये॒वा ऽऽदि॒त्यम॑सृ॒जत॑ प्रेति॒रिति॑ ध॒र्मम॑न्वि॒तिरिति॑ दि॒वः॑
सं॒धि॒रित्य॑न्तरि॒क्षं प्र॑ति॒धिरिति॑ पृ॒थि॒वीं वि॑ष्ट॒म्भ इति॑ वृ॒ष्टिं
प्र॒वेत्य॑हर॒नुवेति॑ रा॒त्रिमु॒शिगिति॑ व॒सून् प्र॑के॒त इति॑ रु॒द्रान्त्
सु॒दी॒तिरित्या॑दि॒त्यानो॒ज इति॑ पि॒तृ॒स्तन्तु॑रिति॑ प्र॒जाः पृ॑त॒नाषा॑डिति॑
प॒शून् रे॒वदि॒त्यो-ष॑धी॒रभि॑जि॒दसि॑ यु॒क्तग्रा॒वे - [] 28

TS 5.3.6.2

-न्द्रा॒य त्वेन्द्रं॑ जि॒न्वेत्ये॒व दक्षि॑णतो व॒ज्रं प॒र्यो॒हद॑भि॒जित्यै॑ ताः प्र॒जा
अ॒पप्रा॑णा अ॒सृज॑त तास्व॒धिप॑ति॒रसीत्ये॒व प्रा॑णम॒दधा-द्य॑न्ते॒त्यपा॑नः
स॒र्प इति॑ चक्षु॒र्वयो॑धा इति॑ श्रो॒त्रं ताः॑ प्र॒जाः प्रा॑ण॒तीर॑पा॒नतीः
प॒श्यन्तीः॑ शृ॒ण्वती॑र्न मि॒थुनी॑ अ॒भवन्॑ तासु॑ त्रि॒वृद॑सीत्ये॒व
मि॒थुन॑म॒दधा॑त् ताः प्र॒जा मि॒थुनी॑ - [] 29

TS 5.3.6.3

भ॒वन्ती॑र्न प्रा॒जाय॑न्त ताः स॒र्गो॒होऽसि॑ नी॒रो॒होऽसीत्ये॒व प्रा॑ज॒नय॑त्
ताः प्र॒जाः प्र॒जाता॑ न प्र॒त्यति॑ष्ठन् ता व॒सुको॑ऽसि॒ वेष॑श्चिर॒सि
व॒स्यष्टि॑रसीत्ये॒वैषु॑ लो॒केषु॑ प्र॒त्यस्था॑पयद्य॒दाह॑ व॒सुको॑ऽसि॒ वेष॑श्चिर॒सि

वस्यष्टिरसीति प्रजा एव प्रजाता एषु लोकेषु प्रतिष्ठापयति
 सात्माऽन्तरिक्षं () रोहति सप्राणोऽमुष्मिन् लोके प्रति
 तिष्ठत्यव्यर्धुकः प्राणापानाभ्यां भवति य एवं वेद ॥ 30

(युक्तग्रावा - प्रजा मिथुन्य - न्तरिक्षं - द्वादश च) (A6)

TS 5.3.7.1

नाकसद्विर्वे देवाः सुवर्गं लोकमायन् तन्नाकसदां नाकसत्त्वं
 यन्नाकसद उपदधाति नाकसद्विरेव तद्-यजमानः सुवर्गं लोकमेति
 सुवर्गो वै लोको नाको यस्यैता उपधीयन्ते नास्मा अकं भवति
 यजमानायतनं वै नाकसदो यन्नाकसद उपदधात्यायतनमेव
 तद्-यजमानः कुरुते पृष्ठानां वा एतत् तेजः संभृतं यन्नाकसदो
 यन्नाकसद - [] 31

TS 5.3.7.2

उपदधाति पृष्ठानामेव तेजोऽव रुन्धे पञ्चचोडा उप दधात्यप्सरसं
 एवैनमेता भूता अमुष्मिन् लोक उप शोरेऽथो तनूपानीरेवैता
 यजमानस्य यं द्विष्यात् तमुपदधद्ध्यायेदेताभ्य एवैनं देवताभ्य

आ वृ॒श्चति॑ ता॒जगार्ति॑मा॒र्च्छत्यु॒त्तरा॑ ना॒कस॒द्भ्य॒ उप॒दधा॑ति यथा
जा॒यामा॒नीय॑ गृ॒हेषु॑ नि॒षाद॑यति ता॒दृगे॒व तत् - [] 32

TS 5.3.7.3

प॒श्चात् प्रा॒चीमु॒त्तमा॒मुप॑ द॒धाति॑ तस्मा॒त् प॒श्चात् प्रा॒ची प॒त्यन्वा॑स्ते
स्व॒यमा॒तृण्णां॑ च वि॒कर्णीं॑ चो॒त्तमे॑ उप॑ द॒धाति॑ प्रा॒णो वै
स्व॒यमा॒तृण्णाऽऽयु॑र्वि॒कर्णीं॑ प्रा॒णं चै॒वाऽऽयु॑श्च प्रा॒णाना॑मु॒त्तमौ॑ ध॒त्ते
तस्मा॒त् प्रा॒णश्चाऽऽयु॑श्च प्रा॒णाना॑मु॒त्तमौ॑ ना॒न्यामु॒त्तरा॑मि॒ष्टका॑मु॒प
द॒द्ध्याद्-य॒दन्या॑मु॒त्तरा॑-मि॒ष्टका॑-मु॒पद॒द्ध्यात् प॒शूनां॑ - [] 33

TS 5.3.7.4

च यज॑मानस्य च प्रा॒णं चाऽऽयु॑श्चापि द॒द्ध्यात् तस्मान्ना-
न्यो॒त्तरे॑ष्ट॒कोप॑धेया॑ स्व॒यमा॒तृण्णामु॑प द॒धात्य॑सौ वै स्व॒यमा॒तृण्णा-
ऽमू॒मेवो॑प ध॒त्ते ऽश्च॑मु॒प घ्रा॑पयति प्रा॒णमे॒वास्यां॑ द॒धात्य॑थो प्रा॒जाप॑त्यो
वा अ॒श्वः प्रा॒जाप॑तिनै॒वाग्निं॑ चि॒नुते॑ स्व॒यमा॒तृण्णा॑ भवति
प्रा॒णाना॑मु॒त्सृ॑ष्ट्या अथो सु॒वर्ग॑स्य लो॒कस्या॑ऽनु॒ख्यात्या॑ ए॒षा वै ()
दे॒वानां॑ वि॒क्रान्ति॑र्यद्-वि॒कर्णीं॑ यद्-वि॒कर्णी॑मु॒पद॒धाति॑ दे॒वाना॑मे॒व

विक्रान्तिमनु विक्रमत उत्तरत उपदधाति तस्मादुत्तरत उपचारोऽग्नि
वायुमती भवति समिद्ध्यै ॥ 34

(संभृतं यन्नाकसदो यन्नाकसद - स्तत् - पशूना-मेषा वै-
द्वाविंशतिश्च) (A7)

TS 5.3.8.1

छन्दा॑स्युप॑ दधाति॑ प॒शवो॑ वै छन्दा॑सि प॒शूने॒वाव॑ रुन्धे
छन्दा॑सि॒ वै दे॒वानां॑ वा॒मं प॒शवो॑ वा॒ममे॒व प॒शूने॒व रुन्धे॑
ए॒ता ह॒ वै य॒ज्ञसे॑न-श्रैत्रि॒याय॑ण-श्चि॒तिं वि॒दां च॑कार॒ तया॒ वै
स प॒शूने॒वारुन्धे॑ यदे॒तामु॑प॒दधा॑ति प॒शूने॒वाव॑ रुन्धे गाय॒त्रीः
पु॒रस्ता॑दुप॑ दधाति॑ ते॒जो वै गा॒यत्री॑ ते॒ज ए॒व - [] 35

TS 5.3.8.2

मु॒खतो॑ ध॒त्ते मू॒र्धन्व॑ती॒र्भव॑न्ति मू॒र्धान॑मे॒वैनं॑ समा॒नानां॑ करोति
त्रि॒ष्टुभ॑ उप॑ दधा॒तीन्द्रि॑यं वै त्रि॒ष्टुगिन्द्रि॑यमे॒व म॑द्ध्यतो॑ ध॒त्ते जग॑तीरुप॑
दधा॒ति जा॑गता॒ वै प॒शवः॑ प॒शूने॒वाव॑ रुन्धे ऽनु॒ष्टुभ॑ उप॑ दधाति प्रा॒णा

वा अनुष्टुप् प्राणानामुत्सृष्ट्यै बृहतीरुष्णिहाः पङ्कीरक्षरपङ्कीरिति

विषुरूपाणि छन्दाऽस्युप दधाति विषुरूपा वै

पशवः पशवः – [] 36

TS 5.3.8.3

–छन्दाऽसि विषुरूपानेव पशूनव रुन्धे विषुरूपमस्य गृहे
दृश्यते यस्यैता उपधीयन्ते य उ चैना एवं वेदाऽतिच्छन्दसमुप
दधात्यतिच्छन्दा वै सर्वाणि छन्दाऽसि सर्वेभिरेवैनं छन्दोभिश्चिनुते
वर्ष्म वा एषा छन्दसां यदतिच्छन्दा यदतिच्छन्दस-मुपदधाति
वर्ष्मेवैनं समानानां करोति द्विपदा उप दधाति द्विपाद्-यजमानः
() प्रतिष्ठित्यै ॥ 37

(तेज एव – पशवः पशवो – यजमान – एकञ्च) (A8)

TS 5.3.9.1

सर्वाभ्यो वै देवताभ्योऽग्निश्चीयते यथ् सयुजो नोपदद्ध्यद् देवता
अस्याग्निं वृञ्जीरन् यथ् सयुज उपदधात्यात्मनैवैनं सयुजं चिनुते
नाग्निना व्यदध्यतेऽथो यथा पुरुषः स्नावभिः संतत

ए॒वमे॒वैता॒भिर॒ग्निः॑ सं॒ततो॑ ऽग्नि॒ना वै दे॒वाः सु॒वर्गं॑ लो॒कमा॒यन् ता॑
अ॒मूः कृ॒त्तिका॑ अ॒भवन् य॒स्यैता॑ उप॒ धीय॑न्ते सु॒वर्गमे॒व - [] 38

TS 5.3.9.2

लो॒कमे॒ति ग॒च्छति॑ प्रका॒शं चि॒त्रमे॒व भ॑वति मण॒डले॒ष्टका॑ उप॒ दधा॑तीमे
वै लो॒का मण॒डले॒ष्टका॑ इ॒मे ख॒लु वै लो॒का दे॒वपु॒रा दे॒वपु॒रा ए॒व
प्रवि॑शति नाऽऽ*ति॒माच्छ॑त्यग्निं चि॒क्या॒नो वि॒श्वज्यो॑तिष उप॒
दधा॑तीमा॒नेवैता॒भि-लो॒कान् ज्यो॑तिष्म॒तः कुरु॑तेऽथो प्रा॒णाने॒वैता॑
यज॑मानस्य दा॒ध्रत्ये॒ता वै दे॒वताः॑ सु॒वर्ग्या॑स्ता ए॒वा- ()

-न्वार॒भ्य सु॒वर्गं लो॒कमे॒ति ॥ 39

(सु॒वर्गमे॒व - ता॒ ए॒व - च॒त्वारि॑ च) (A9)

TS 5.3.10.1

वृ॒ष्टि॒सनी॒रुप॑ दधाति वृ॒ष्टिमे॒वाव॑ रु॒न्धे यदे॑क॒धोप॑द॒ध्यादे॑क॒मृतुं॑
वर्षे॑दनुपरि॒हारं सा॑दयति तस्मा॒थ् सर्वा॑नृ॒तून् वर्ष॑ति पु॒रोवा॑त॒सनि॑-
रसी॑त्याहै॒तद्वै वृ॒ष्ट्यै रू॒पं रू॒पेणै॒व वृ॒ष्टि॒मव॑ रु॒न्धे सँ॒यानी॑भिर्वै दे॒वा

इ॒मान् लो॒कान्त् सम॒युस्त॑त् सँ॒यानी॑ना॒ ऽ सँ॒यानि॑त्वं य॒त्
सँ॒यानी॑रुप॒दधा॑ति यथा॒ ऽप्सु॑ ना॒वा सँ॒यात्ये॑व – [] 40

TS 5.3.10.2

–मे॒वैता॑भि॒ र्यज॑मान॒ इ॒मान् लो॒कान्त् सं॒ या॑ति प्ल॒वो वा ए॒षो॑ऽग्ने॒र्यत्
सँ॒यानी॑र्य॒त् सँ॒यानी॑रुप॒दधा॑ति प्ल॒वमे॒वैत॑म॒ग्नय॑ उप॒दधा॑त्यु॒त
यस्यै॒तासू॑प॒हिता॒स्वापो॑ऽग्नि॒ ऽ हर॑न्त्य॒हत॑ ए॒वास्या॒–ग्नि॑रादि॒त्येष्ट॑का
उप॑ द॒धात्या॑दि॒त्या वा ए॒तं भू॒त्यै प्र॑ति॒नुद॑न्ते योऽ॒लं भू॒त्यै सन्॑ भू॒तिं
न प्रा॒प्नोत्या॑दि॒त्या – [] 41

TS 5.3.10.3

ए॒वैनं॑ भू॒तिं ग॑म॒यन्त्य॒सौ वा ए॒तस्या॑ऽऽ*दि॒त्यो रु॒चमा॑ द॒त्ते यो॑ऽग्निं
चि॒त्वा न रो॑च॒ते यदा॑दि॒त्येष्ट॑का उप॒दधा॑त्य॒सावे॒–वास्मि॑न्नादि॒त्यो रु॒चं
द॒धाति॑ यथा॒ऽसौ दे॒वाना॑ ऽ रो॑च॒त ए॒वमे॒वैष॑ म॒नुष्या॑णा॒ ऽ रो॑च॒ते
घृ॒तेष्ट॑का उप॑ द॒धात्ये॒तद्वा अ॒ग्नेः प्रि॒यं धा॒म यद्–घृ॒तं प्रि॒येणै॒वैनं॑
धा॒म्ना सम॑र्द्धय॒त्य – [] 42

TS 5.3.10.4

–थो तेजसा ऽनुपरिहारं सादय–त्यपरिवर्ग–मेवास्मिन् तेजो दधाति
 प्रजापतिरग्निमचिनुत स यशसा व्याद्ध्यत स एता यशोदा अपश्यत्
 ता उपाधत्ता ताभिर्वै स यश आत्मन्नधत्ता यद्यशोदा उपदधाति यश
 एव ताभिर्यजमान आत्मन् धत्ते पञ्चोप दधाति पाङ्कः पुरुषो
 यावानेव पुरुषस्तस्मिन् यशो दधाति ॥ 43

(एवं – प्राप्नोत्यादित्या – अर्धयत्ये – कान्न पञ्चाशच्च) (A10)

TS 5.3.11.1

देवासुराः सँयत्ता आसन् कनीयाँसो देवा आसन् भूयाँसो–
 ऽसुरास्ते देवा एता इष्टका अपश्यन् ता उपादधत्ता भूयस्कृदसीत्येव
 भूयाँसोऽभवन् वनस्पतिभि–रोषधीभि–र्वरिवस्कृदसीती–मामजयन्
 प्राच्यसीति प्राचीं दिशमजयन्नूद्ध्वा ऽसीत्यमूमजयन्–
 नन्तरिक्षसदस्यन्तरिक्षे सीदेत्य–न्तरिक्षमजयन् ततो देवा
 अभवन् – [] 44

TS 5.3.11.2

परा॑ऽसुरा॒ यस्यै॑ता॒ उप॑धी॒यन्ते॒ भूया॑ने॒व भ॑वत्य॒भीमा॑न् लो॒कान् ज॑यति
 भव॑त्या॒त्मना॒ परा॑ऽस्य॒ भ्रातृ॑व्यो भवत्य॒प्सुष॑दसि॒ श्येन॑सदसीत्या॒हैत॑द्वा
 अ॒ग्ने रू॒पꣳ रू॒पेणै॑वा॒ग्निम॑व रुन्धे पृथि॒व्यास्त्वा॒ द्रवि॑णे सादया॒मी-
 त्या॑हे॒माने॑वैताभि-लो॒कान् द्रवि॑णावतः कुरुत आयु॒ष्या उप॑
 दधा॑त्यायु॒रेवा - [] 45

TS 5.3.11.3

-स्मिन् दधा॑त्य॒ग्ने य॑त्ते परꣳ ह॒न्नामे॑त्या॒हैत॑द्वा अ॒ग्नेः प्रि॒यं धाम॑
 प्रि॒यमे॒वास्य॑ धामोपा॑ऽऽ*प्नोति॒ तावे॑हि सꣳ र॒भाव॑हा इत्या॒ह व्ये॑वैने॒न
 परि॑ ध॒त्ते पा॒ञ्चज॑न्येष्व॒प्यैद्ध्य॑ग्न इत्या॒हैष वा अ॒ग्निः पा॒ञ्चज॑न्यो यः
 पञ्च॑चितीक-स्तस्मा॑दे॒वमा॑हर्त॒व्या उप॑ () दधा॑त्येतद्वा ऋतू॒नां प्रि॒यं
 धाम॑ यदृ॒तव्या॑ ऋतू॒नामे॒व प्रि॒यं धामा॑व रुन्धे सु॒मेक इत्या॑ह
 सँव॑त्सरो वै सु॒मेकः सँव॑त्सरस्यै॒व प्रि॒यं धामो॑पा॑ऽऽ*प्नोति ॥ 46
 (अ॒भ॒व - न्नायु॑रे॒व - त॒व्या उप॑ - षड्वि॑ꣳशतिश्च) (A11)

TS 5.3.12.1

प्र॒जाप॑तेर॒क्ष्यश्च॑यत् तत् परा॑ऽपतत् तदश्चो॑ऽभवद्-यदश्च॑यत्
तदश्च॑स्याश्च॒त्वं तद्दे॒वा अ॑श्चमे॒धेनै॒व प्र॑त्यदधुरेष वै प्र॒जाप॑तिः॒ सर्वं
करो॑ति योऽश्चमे॒धेन॒ यज॑ते सर्व॒ एव॑ भवति सर्व॑स्य वा ए॒षा
प्राय॑श्चित्तिः सर्व॑स्य भेषजं॒ सर्वं वा॑ ए॒तेन॑ पाप्मानं॒ देवा॑ अ॒तर॒न्नपि॑
वा ए॒तेन॑ ब्रह्म॒हत्या॑म॒तर॒न्त् सर्वं॑ पाप्मानं - [] 47

TS 5.3.12.2

तर॑ति तर॑ति ब्रह्म॒हत्यां योऽश्चमे॒धेन॒ यज॑ते य उ चैनमे॒वं वे॒दोत्तरं॑ वै
तत् प्र॒जाप॑तेर॒क्ष्यश्च॑यत् तस्मा॑दश्च॒स्योत्तर॑तोऽव द्यन्ति दक्षि॑णतोऽन्ये॒षां
पशू॑नां वै॒तसः॑ कटो भवत्य॒प्सुयो॑निर्वा अश्चो॑ऽप्सुजो वे॒तसः॑ स्व
ए॒वैनं॑ योनौ प्रति॑ष्ठापयति चतु॑ष्टोमः स्तोमो॑ भवति सर॒ङ्ग वा॑ अश्च॑स्य
सक्थ्या॑ऽवृहत् () तद्-दे॒वाश्च॑तुष्टोमे॒नैव॑ प्र॑त्यदधुर्यच्चतु॑ष्टोमः स्तोमो॑
भवत्य॑श्च॒स्य सर्व॑त्वाय ॥ 48

(सर्वम् पाप्मानं - मवृहद् - द्वादश च) (A12)

Prasna Korvai with starting Padams of 1 to 12 Anuvaakams :-

(उ॒थ्स॒न्नय॒ज्ञ - इन्द्रा॑ग्नी - दे॒वा वा अ॑क्ष॒णयास्तो॒मीया॑ -
अ॒ग्नेर्भा॑गौ - ऽस्य॑ग्ने जा॒तान् - रश्मि॑रिति - ना॒कस॒द्भिः -
छन्दा॑ऽसि - सर्वा॑भ्यो - वृष्टि॑सनी - दे॒वासु॒राः कनी॑याऽसः -
प्र॒जाप॑तेर॒क्षि - द्वा॑द॒श)

Korvai with starting Padams of 1, 11, 21 Series of Panchaatis :-

(उ॒थ्स॒न्नय॒ज्ञो - दे॒वा वै - यस्य॑ मु॒ख्यव॑ती - ना॒कस॒द्भिरे॑ -
वै ता॑भिर - षा॒चत्वा॑रि॒शत्)

First and Last Padam of Third Prasnam of 5th Kandam

(उ॒थ्स॒न्नय॒ज्ञः - सर्व॑त्वाय)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे तृतीयः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

5.4 पञ्चमकाण्डे चतुर्थः प्रश्नः – इष्टकात्रयाभिधानं

TS 5.4.1.1

दे॒वा॒सु॒राः सँ॑य॒त्ता आ॒सन् ते न व्य॑जयन्त स ए॒ता इन्द्र॑स्तनूर॒पश्य॑त्
ता उ॒पा॒धत्त॑ ताभि॒र्वै स त॒नुव॑मिन्द्रि॒यं वी॒र्य॑मा॒त्मन्न॑धत्त ततो दे॒वा
अ॒भव॑न् प॒राऽसु॒रा यदिन्द्र॑तनूरु॒पद॑धाति त॒नुव॑मेव ताभि॒रिन्द्रि॒यं वी॒र्यं
य॑ज॒मान आ॒त्मन् ध॒त्तेऽथो सेन्द्र॑मे॒वाग्नि॑ꣳ सत॒नुं चि॒नुते॑ भव॒त्यात्म॑ना
॥ प॒राऽस्य॑ भ्रातृ॒व्यो – [] 1

TS 5.4.1.2

भव॑ति य॒ज्ञो दे॒वेभ्यो॑ऽपा॒क्राम॑त् तम॒वरु॑धं नाश॑क्नुवन्त ए॒ता
य॒ज्ञत॑नूर॒पश्य॑न् ता उ॒पा॒दध॑त ताभि॒र्वै ते य॒ज्ञम॑वा॒रुन्ध॑त यद्-
य॒ज्ञत॑नूरु॒पद॑धाति य॒ज्ञमे॒व ताभि॑र्य॒जमा॑नोऽव रुन्धे त्रय॑स्त्रिꣳ
श॒तमु॑प द॒धाति त्रय॑स्त्रिꣳश॒द्वै दे॒वता॑ दे॒वता॑ ए॒वाव रु॑न्धे ऽथो
सा॒त्मान॑मे॒वाग्नि॑ꣳ सत॒नुं चि॒नुते॑ सा॒त्माऽमु॑ष्मिन् लो॒के – [] 2

TS 5.4.1.3

भवति॑ य॒ एवं॑ वे॒द ज्योति॑ष्मतीरु॒प दधा॑ति ज्योति॑रेवास्मिन्
 दधा॑त्येताभि॒र्वा अ॒ग्निश्चि॒तो ज्वल॑ति ताभि॑रेवैन॒ꣳ समि॑न्ध उ॒भयो॑रस्मै
 लो॒कयो॒ज्योति॑र्भवति नक्ष॒त्रेष्ट॒का उप॑ दधा॑त्येतानि॒ वै दि॒वो ज्योती॑ꣳषि
 तान्ये॒वाव रु॑न्धे सु॒कृतां॑ वा ए॒तानि॒ ज्योती॑ꣳषि यन्नक्ष॑त्राणि
 तान्ये॒वाऽऽ*प्नो॑त्यथो॒ अनू॑का॒शमे॒वैतानि॒ – [] 3

TS 5.4.1.4

ज्योती॑ꣳषि कुरु॑ते सु॒वर्ग॑स्य लो॒कस्यानु॑ख्यात्यै यथ् सꣳस्पृ॑ष्टा
 उप॒दद्ध्याद्-वृ॑ष्ट्यै लो॒कमपि॑ दद्ध्या॒दवर्षु॑कः पर्ज॑न्यः
 स्या॒दसꣳस्पृ॑ष्टा उप॑ दधा॑ति वृ॒ष्ट्या ए॒व लो॒कं करो॑ति वर्षु॑कः
 पर्ज॑न्यो भवति पु॒रस्ता॑दन्याः प्र॒तीची॑रु॒प दधा॑ति पश्चा॑दन्याः
 प्रा॒चीस्तस्मा॑त् प्रा॒चीना॑नि च प्र॒तीची॑नानि च नक्ष॑त्राण्या॒ वर्तन्ते ॥ 4

(भ्रातृ॑व्यो – लो॒क – ए॒वैतान्ये॑ – क॒चत्वारि॑ꣳशच्च) (A1)

TS 5.4.2.1

ऋ॒तव्या॑ उप॑ दधा॑त्यृतू॒नां क्लृ॑प्त्यै द्वंद्व॑मु॒प दधा॑ति तस्मा॑द् द्वन्द्व॑मृतवो
 ऽधृ॑तेव वा ए॒षा यन्म॑द्ध्य॒मा चि॑तिरन्तरि॒क्षमि॑व वा ए॒षा द्वंद्व॑मन्यासु

चि॒ती॒षूप॑ द॒धाति॑ च॒तस्रो॑ म॒द्ध्ये॑ धृ॒त्या अ॒न्त॒श्श्ले॒षणं॑ वा
 ए॒ताश्चि॒तीनां॑ य॒दृत॒व्या य॒दृत॒व्या उ॒प॒द॒धाति॑ चि॒तीनां॑ वि॒धृत्या॑
 अ॒व॒का॒म॒नूप॑ द॒धात्ये॒षा वा अ॒ग्ने॒र्यो॒निः स॒यो॒नि - [] 5

TS 5.4.2.2

-मे॒वाग्निं॑ चि॒नुत॑ उ॒वाच॑ ह वि॒श्वा॒मि॒त्रो ऽद॒दि॒त् स ब्र॒ह्म॒णाऽ*॒न्नं
 य॒स्यै॒ता उ॒प॒धी॒यान्ते॑ य उ॒ चै॒ना ए॒वं वे॒द॒दि॒ति सँव॑त्स॒रो वा ए॒तं
 प्र॒ति॒ष्ठा॒यै नु॒द॒ते यो॒ऽग्निं॑ चि॒त्वा न प्र॒ति॒ति॒ष्ठति॑ पञ्च॒ पूर्वा॑श्चि॒तयो॑
 भ॒वन्त्य॑थ ष॒ष्ठीं चि॒तिं चि॒नुते॑ ष॒ड्वा ऋ॒तवः॑ सँव॑त्सर॒ ऋ॒तु॒ष्वे॒व
 सँव॑त्स॒रे प्र॒ति॒ति॒ष्ठत्ये॑ ता वा - [] 6

TS 5.4.2.3

अ॒धि॒प॒त्नी॒र्नामे॑ष्ट॒का य॒स्यै॒ता उ॒प॒धी॒यन्ते॑ऽधि॒प॒ति॒रे॒व स॒मा॒ना॒नां भ॒वति॑
 यं द्वि॒ष्या॒त् तमु॒प॒द॒धद् ध्या॒ये॒दे॒ताभ्य॑ ए॒वैनं॑ दे॒वता॑भ्य॒ आ वृ॑श्चति
 ता॒ज॒गा॒र्ति॒मा॒र्च्छ॒त्यङ्गि॑र॒सः सु॒व॒र्गं लो॒कं य॒न्तो॒ या य॒ज्ञस्य॑
 नि॒ष्कृ॑ति॒रासी॒त् ता॒मृ॒षि॒भ्यः प्र॒त्यौ॒हन् तद्वि॑रण्यम॒भव॑द्य-द्वि॒रण्य॑श॒ल्कैः
 प्रो॒क्ष॒ति य॒ज्ञस्य॑ नि॒ष्कृ॑त्या अ॒थो भे॒ष॒ज॒मे॒वास्मै॑ क॒रोत्य॑ - [] 7

TS 5.4.2.4

–थो॑ रू॒पेणै॒वैन॑ꣳ सम॑र्द्धयत्यथो॒ हिर॑ण्यज्योतिषै॒व सु॑वर्गं लो॒कमे॑ति
सा॒हस्र॑वता प्रोक्षति सा॒हस्रः॑ प्र॒जाप॑तिः प्र॒जाप॑तेराप्त्या इ॒मा मे॑
अ॒ग्न इ॑ष्टका धे॒नवः॑ स॒न्त्वित्या॑ह धे॒नूरे॒वैनाः॑ कुरुते ता ए॒नं का॑मदु॒घा
अ॒मुत्रा॑मुष्मिन् लो॒क उप॑ तिष्ठन्ते ॥ 8

(स॒योनि॑ – मे॒ता वै – क॑रोत्ये – का॒न्नच॑त्वारि॒ꣳश॑च्च) (A2)

TS 5.4.3.1

रु॒द्रो वा ए॒ष यद॑ग्निः स ए॒तर्.हि॑ जा॒तो यर्.हि॑ सर्व॑श्चितः स यथा॑
व॒त्सो जा॑तः स्तनं प्रे॒प्सत्ये॑वं वा ए॒ष ए॒तर्.हि॑ भा॒गधे॑यं प्रे॒प्सति॑
तस्मै॑ यदाहु॒तिं न जुहु॑याद॒ध्वर्युं॑ च यज॑मानं च ध्याये॒च्छत॑रु॒द्रीयं॑
जुहो॑ति भा॒गधे॑ये॒नैवैन॑ꣳ शम॑यति नाऽऽ*र्ति॒माच्छ॑त्य॒ध्वर्युर्न॑
यज॑मानो यद् ग्रा॒म्याणां॑ प॒शूनां॑ – [] 9

TS 5.4.3.2

पय॑सा जुहु॒याद् ग्रा॒म्यान् प॒शूञ्छु॑चा ऽर्प॑येद्–यदा॒रण्या॑ना–मा॒रण्या॑न्
ज॒र्तिल॑यवा॒ग्वा वा जुहु॑याद् ग॒वीधु॑कयवा॒ग्वा वा न ग्रा॒म्यान् प॒शून्
हि॒नस्ति॑ नाऽऽ*र॒ण्यान॑थो ख॒ल्वाहु॑रनाहु॒तिर्वै॑ ज॒र्तिला॑श्च ग॒वीधु॑काश्चेत्य॑

जक्षीरेण जुहोत्याग्नेयी वा एषा यदजाऽऽहुत्यैव जुहोति न ग्राम्यान्
पशून् हिनस्ति नाऽऽरण्यानङ्गिरसः सुवर्गं लोकं यन्तो – [] 10

TS 5.4.3.3

–ऽजायां घर्मं प्रासिञ्चन्थसा शोचन्ती पर्णं पराऽजिहीत
सौ(१)ऽर्कोऽभवत् तदर्कस्या–र्कत्वमर्कपर्णेन जुहोति सयोनित्वायोदङ्
तिष्ठन् जुहोत्येषा वै रुद्रस्य दिख् स्वायामेव दिशि रुद्रं निरवदयते
चरमायामिष्टकायां जुहोत्यन्तत एव रुद्रं निरवदयते त्रेधाविभक्तं
जुहोति त्रय इमे लोका इमानेव लोकान्थ् समावद्दीर्यान् करोतीयत्यग्रे
जुहोत्य – [] 11

TS 5.4.3.4

–थेयत्यथेयति त्रय इमे लोका एभ्य एवैनं लोकेभ्यः शमयति तिस्र
उत्तरा आहुतीर्जुहोति षट् थ्सं पद्यन्ते षड् वा ऋतव ऋतुभिरेवैनं
शमयति यदनुपरिक्रामं जुहुयादन्तरवचारिणं रुद्रं कुर्यादथो
खल्वाहुः कस्यां वाऽह दिशि रुद्रः कस्यां वैत्यनुपरिक्राममेव
होतव्य–मपरिवर्गमेवैनं शमयत्ये – [] 12

TS 5.4.3.5

-तावै दे॒वताः॑ सु॒वर्ग्या॑या उ॒त्तमा॑स्ता यज॒मानं॑ वाचयति ताभिरे॒वैन॑
सु॒वर्गं॑ लो॒कं ग॑मयति यं द्वि॒ष्यात् तस्य॑ सञ्चरे पशू॒नां न्यस्येद् यः
प्रथ॑मः पशुर॑भितिष्ठति स आ॒र्तिमा॑र्च्छति ॥ 13

(पशू॒नां - य॑न्तो - ऽग्ने॑ जुहोत्य - परि॑वर्गमे॒वैन॑ शमयति -
त्रि॑ञ्च) (A3)

TS 5.4.4.1

अ॒श्मन्न॑ूर्जमिति परि॑ षिञ्चति मा॒र्जय॑त्ये॒वैन॑मथो तर्प॑यत्ये॒व स ए॑नं
तृ॒प्तो ऽक्षु॑द्ध्य-न्न॑शोच-न्न॒मुष्मिन्॑ लो॒क उप॑ तिष्ठते तृ॒प्यति॑ प्र॒जया॑
पशु॑भिर्य ए॒वं वे॒द तां न॑ इ॒षमूर्जं॑ धत्त मरुतः स॒र्राणा॑ इत्या॒हान्नं॑
वा ऊ॒र्गन्नं॑ मरुतोऽन्न॑मे॒वाव रु॒न्धे ऽश्म॑स्ते क्षु॒दमुं॑ ते शु - [] 14

TS 5.4.4.2

-गृ॒च्छतु॑ यं द्वि॒ष्म इत्या॑ह यमे॒व द्वेष्टि॑ तमस्य क्षु॒धा च शु॒चा चा॑र्पयति
त्रिः परि॑षिञ्चन् पर्ये॑ति त्रि॒वृद्धा॑ अ॒ग्निर्या॑वाने॒वा-ग्नि॑स्तस्य शुच॑
शम॑यति त्रिः पुनः॑ पर्ये॑ति षट् थ्सं प॒द्यन्ते॑ षड् वा ऋ॒तव॑ ऋ॒तुभिरे॑वास्य
शुच॑ शम॑यत्यपां वा ए॒तत् पु॒ष्पं य॑द्वे॒तसो॑ऽपा - [] 15

TS 5.4.4.3

शरोऽवका वेतसशाखया चावकाभिश्च वि कर्षत्यापो वै शान्ताः
 शान्ताभिरेवास्य शुचं शमयति यो वा अग्निं चितं प्रथमः
 पशुरधिक्रामतीश्चरो वै तं शुचा प्रदहो मण्डूकेन विकर्षत्येष
 वै पशूना-मनुपजीवनीयो न वा एष ग्राम्येषु पशुषु हितो
 नाऽऽरण्येषु तमेव शुचाऽर्पयत्यष्टाभिर्वि कर्षत्य - [] 16

TS 5.4.4.4

-ष्टाक्षरा गायत्री गायत्रोऽग्निर्यावा-नेवाऽग्निस्तस्य शुचं शमयति
 पावकवतीभिरन्नं वै पावकोऽन्नेनैवास्य शुचं शमयति मृत्युर्वा
 एष यदग्निर्ब्रह्मण एतद्रूपं यत् कृष्णाजिनं कार्ष्णी उपानहावुप
 मुञ्चते ब्रह्मणैव मृत्योरन्तर्द्धत्ते ऽन्तर्मृत्योर्द्धत्ते ऽन्तरन्नाद्या-
 दित्याहुरन्या-मुपमुञ्चतेऽन्यां नान्त - [] 17

TS 5.4.4.5

-रेव मृत्योर्द्धत्ते ऽवाऽन्नाद्यं रुन्धे नमस्ते हरसे शोचिष इत्याह
 नमस्कृत्य हि वसीयां समुपचरन्त्यन्यं ते अस्मत् तपन्तु हेतय
 इत्याह यमेव द्वेष्टि तमस्य शुचाऽर्पयति पावको अस्मभ्यं शिवो

भवे॒त्या॒हान्नं॑ वै पा॒वकोऽन्नमे॒वाव॑ रुन्धे॒ द्वाभ्या॒मधि॑ क्रा॒मति॑
प्रति॑ष्ठित्या॒ अप॒स्यव॑तीभ्या॒ं शान्त्यै॑ ॥ 18

(शु - र्वेत॑सोऽपा - म॒ष्टाभिर्वि॑ कर्ष॒ति - नान्त -
रे॒कान्न॑ पञ्चा॒शच्च॑) (A4)

TS 5.4.5.1

नृष॑दे वडि॒ति व्या॑घारयति प॒ङ्क्त्याऽऽहु॑त्या य॒ज्ञमु॒खमा॑ रभते
ऽक्ष॑णया व्या॑घारयति तस्मा॑दक्ष॒णया॑ प॒शवोऽङ्गानि॑ प्र॒हरन्ति॑
प्रति॑ष्ठित्यै॒ यद्वष॑ट्कुर्याद्-या॒तया॑माऽस्य वष॑ट्कारः स्याद्यन्न
वष॑ट्कुर्याद्-रक्षा॑ं॒सि य॒ज्ञं ह॑न्युर्वडि॒त्याह॑ प॒रोक्ष॑मेव वष॑ट्
करो॑ति नास्य या॒तया॑मा वष॑ट्का॒रो भव॑ति न य॒ज्ञं रक्षा॑ं॒सि
घ्नन्ति॑ हु॒तादो॑ वा अ॒न्ये दे॒वा - [] 19

TS 5.4.5.2

अहु॒तादोऽन्ये॑ ता॒नग्नि॑चिदे॒वोभ्यान्॑ प्रीणा॒ति ये दे॒वा दे॒वाना॑मि॒ति
द॒ध्ना म॑धुमि॒श्रेणा॑वोक्षति हु॒तादश्चै॒व दे॒वानहु॑तादश्च य॒जमा॑नः
प्रीणा॒ति ते य॒जमा॑नं प्रीणन्ति द॒ध्नेव॑ हु॒तादः॑ प्रीणा॒ति मधु॑षा

॥
 ऽहु॒तादो॑ ग्रा॒म्यं वा॑ ए॒तदन्नं॑ य॒द्दध्या॑रण्यं मधु॒ यद्दध्ना॑ मधुमि॒श्रेणा॑ –
 वोक्ष॑त्युभयस्या॒वरु॑द्ध्यै गु॒मुष्टि॑ना॒वोक्ष॑ति प्राजाप॒त्यो – [] 20

TS 5.4.5.3

वै गु॒मुष्टिः॑ स॒योनि॑त्वाय॒ द्वाभ्यां॑ प्र॒तिष्ठि॑त्या अनु॒परि॑चार–मवो॒क्षत्य॑ –
 परि॒वर्ग॑मे॒वैनान्॑ प्रीणाति वि वा ए॒ष प्रा॒णैः प्र॒जया॑ प॒शुभिर्ऋ॑द्ध्यते
 यो॒ऽग्निं॑ चि॒न्वन्न॑धि॒क्राम॑ति प्रा॒णदा॑ अपा॒नदा॑ इत्याह प्रा॒णाने॒वाऽऽत्मन्॑
 ध॑त्ते वर्चो॒दा वरि॑वो॒दा इत्या॑ह प्र॒जा वै वर्चः॑ प॒शवो॑ वरि॒वः प्र॒जामे॒व
 प॒शूना॑त्मन् ध॑त्त इन्द्रो॑ वृ॒त्रम॑हन्तं वृ॒त्रो – [] 21

TS 5.4.5.4

हतः॑ षोड॒शभि॑र्भो॒गैर॑सिनाथ् स ए॒ताम॑ग्नये॒ऽनीक॑वत आहु॒तिम॑पश्यत्
 ताम॑जुहोत् तस्या॒ग्निर॑नी क॒वान्ध॑स्वेन भा॒गधे॑येन प्रीतः षोड॒शधा॑
 वृ॒त्रस्य॑ भो॒गान॑प्यदहद्–वैश्व॒कर्म॑णेन पा॒प्मनो॑ निरमुच्यत
 यद॑ग्नये॒ऽनीक॑वत आहु॒तिं जु॑होत्य॒ग्निरे॒वा–ऽस्या॑नीक॒वान्ध॑स्वेन
 भा॒गधे॑येन प्रीतः पा॒प्मान॑मपि दहति वैश्व॒कर्म॑णेन पा॒प्मनो॑ निर्मुच्यते
 यं का॒मये॑त चि॒रं पा॒प्मनो॑ – [] 22

TS 5.4.5.5

निर्मु॑च्ये॒तेत्ये॑कै॒कं तस्य॑ जुहु॒याच्चि॒रमे॒व पा॒प्मनो॑ निर्मु॑च्यते॒ यं का॒मये॑त
ता॒जक् पा॒प्मनो॑ निर्मु॑च्ये॒तेति॒ सर्वा॑णि॒ तस्या॑नु॒द्रुत्य॑ जुहु॒यात् ता॒जगे॒व
पा॒प्मनो॑ निर्मु॑च्यतेऽथो॒ खलु॑ ना॒नैव॒ सूक्ता॑भ्यां॑ जुहोति॒ ना॒नैव
सू॒क्तयो॑र्वी॒र्यं द॑धात्यथो॒ प्रति॑ष्ठित्यै ॥ 23

(दे॒वाः – प्रा॑जा॒पत्यो॑-वृ॒त्र – श्चि॒रं पा॒प्मन॑ – श्चत्वा॒रि॒ञ्शच्च॑) (A5)

TS 5.4.6.1

उदे॑नमु॒त्तरां॑ न॒येति॑ स॒मिध॑ आ द॑धाति॒ यथा॒ जनं॑ य॒तेऽव॑सं॒ करो॑ति
ता॒दृगे॒व तत् ति॒स्र आ द॑धाति॒ त्रिवृ॑द्वा अ॒ग्निर्या॑वाने-वा॒ग्निस्त॑स्मै
भा॒गधे॑यं॒ करो॑त्यौदु॒म्बरी-॑र्भव॒न्त्यूर्वा॑ उदु॒म्बर॑ ऊ॒र्जमे॒वास्मा॑ अपि
द॑धात्युदु॒ त्वा वि॒श्वे दे॒वा इ॒त्याह॑ प्रा॒णा वै वि॒श्वे

दे॒वाः प्रा॒णै – [] 24

TS 5.4.6.2

-रे॒वैन॑मु॒द्यच्छ॑ते॒ ऽग्ने॒ भर॑न्तु॒ चित्ति॑भि॒रित्या॑ह॒ यस्मा॑ ए॒वैनं॑
चि॒त्तायो॑द्यच्छ॑ते॒ तेनै॒वैन॑ञ् सम॒र्द्धय॑ति॒ पञ्च॑ दि॒शो दै॒वीर्य॑ज॒मव॑न्तु
दे॒वीरि॑त्याह॒ दि॒शो ह्ये॒षोऽनु॑ प्र॒च्यव॑ते॒ ऽपाम॑तिं॒ दुर्म॑तिं॒ बा॒धमा॑ना

इत्याह रक्षसामपहत्यै रायस्पोषे यज्ञपति-माभजन्तीरित्याह पशवो
वै रायस्पोषः - [] 25

TS 5.4.6.3

पशूनेवाव रुन्धे षड्भिर्हरति षड् वा ऋतव ऋतुभिरेवैनं
हरति द्वे परिगृह्यवती भवतो रक्षसामपहत्यै सूर्यरश्मिर्हरिकेशः
पुरस्तादित्याह प्रसूत्यै ततः पावका आशिषो नो जुषन्तामित्याहान्नं
वै पावकोऽन्नमेवाव रुन्धे देवासुराः सँयत्ता आसन् ते देवा
एत-दप्रतिरथ-मपश्यन् तेन वै ते प्रत्य - [] 26

TS 5.4.6.4

-सुरानजयन् तदप्रतिरथस्या-प्रतिरथत्वं यदप्रतिरथं द्वितीयो
होताऽन्वाहाप्रत्यैव तेन यजमानो भ्रातृव्यान् जयत्यथो
अनभिजितमेवाभि जयति दशर्चं भवति दशाक्षरा विराड् विराजेमौ
लोकौ विधृता वनयोर्लोकयोर्विधृत्या अथो दशाक्षरा विराडन्नं विराड्
विराज्येवान्नाद्ये प्रतितिष्ठत्यसदिव वा अन्तरिक्षमन्तरिक्षमिवा
ऽऽग्नीध्रमाग्नीध्रे - [] 27

TS 5.4.6.5

ऽ॒श्मानं॑ नि॒ दधा॑ति स॒त्त्वाय॑ द्वा॒भ्यां॑ प्र॒ति॒ष्ठि॒त्यै॑ वि॒मान॑ ए॒ष दि॒वो
म॒द्ध्य॑ आ॒स्त इ॒त्याह॑ व्ये॒वैत॑या मि॒मी॒ते म॒द्ध्ये॑ दि॒वो नि॒हि॒तः
पृ॒श्नि॒र॒श्मे॒त्याहा॑न्नं॒ वै पृ॒श्न्य॑न्नमे॒वाव॑ रु॒न्धे च॑त॒सृ॒भि॒रा पु॒च्छा॑देति
च॒त्वा॒रि छ॒न्दा॑ँ॒सि छ॒न्दो॑भि॒रेवे॑न्द्रं॒ विश्वा॑ अ॒वीवृ॑ध॒न्नित्या॑ह
वृ॒द्धि॑मे॒वोपा॑वर्त॒ते वा॒जा॒नाँ॒ स॒त्प॒तिं॑ प॒ति - [] 28

TS 5.4.6.6

-मि॒त्याहा॑ऽन्नं॒ वै वा॒जोऽ॒न्नमे॒वाव॑ रु॒न्धे सु॒म्न॒हूर्य॑ज्ञो दे॒वाँ॒ आ च॑
व॒क्ष॒दि॒त्याह॑ प्र॒जा वै प॒शवः॑ सु॒म्नं प्र॒जामे॒व प॒शूना॑त्मन् ध॒त्ते
य॒क्ष॒द॒ग्नि॒र्दे॒वो दे॒वाँ॒ आ च॑ व॒क्ष॒दि॒त्याह॑ स्व॒गाकृ॑त्यै
वा॒जस्य॑ मा प्र॒सवे॑नो॒द्-ग्रा॒भे॒णोद॑ग्रभी॒दि॒त्याहा॑सौ वा आ॒दि॒त्य
उ॒द्यन्नु॑द्ग्रा॒भ ए॒ष () नि॒म्रो॑चन् नि॒ग्रा॒भो ब्र॒ह्म॒णैवा॑ऽऽ*त्मान॑मु॒द्-गृ॒ह्णाति॑
ब्र॒ह्म॒णा भ्रा॑तृ॒व्यं नि॑ गृ॒ह्णाति॑ ॥ 29

(प्रा॒णैः - पो॒षो - प्र॒त्या - ग्नी॒द्धे - प॒ति - मे॒ष - द॒श च॑)
(A6)

TS 5.4.7.1

प्राची॑मनु॒ प्रदि॑शं॒ प्रेहि॑ वि॒द्वानि॑त्याह॒ देव॑लोक-मे॒वैतयो॑पावर्तते
 क्रम॑द्ध्वम॒ग्निना॒ नाक॑-मि॒त्याहे॑माने॒वैतया॑ लो॒कान् क्र॑मते पृथि॒व्या
 अ॒हमु॒दन्तरि॑क्षमा ऽरु॒हमि॒त्याहे॑माने॒वैतया॑ लो॒कान्त्स॑ समा॒रोह॑ति
 सु॒व॒र्यन्तो॒ नापे॑क्षन्त॒ इत्या॑ह सु॒व॒र्गमे॒वैतया॑
 लोक॑मे॒त्यग्ने॒ प्रेहि॑ - [] 30

TS 5.4.7.2

प्रथ॑मो दे॒वय॑ता-मि॒त्याहो॑भयै॒ष्वेवै॑तया॒ देव॑मनु॒ष्येषु॑ चक्षु॑र्दधाति
 पञ्च॑भिरधि॒ क्राम॑ति पा॒ङ्क्तो य॒ज्ञो या॑वाने॒व य॒ज्ञस्तेन॑ सह सु॒व॒र्गं
 लो॒कमे॑ति न॒क्तोषा॑सेति॒ पुरो॑ऽनुवा॒क्याम॑न्वाह॒ प्रत्या॒ अग्ने॑
 सह॑स्राक्षे॒त्याह॑ सा॒हस्रः॑ प्र॒जाप॑तिः प्र॒जाप॑ते॒राप्त्यै॒ तस्मै॑ ते वि॒धेम॒
 वाजा॑य स्वा॒हेत्या॒हान्नं॑ वै वाजोऽन्नमे॒वाव॑ - [] 31

TS 5.4.7.3

रुन्धे॑ द॒द्धन्ः पू॒र्णामौ॑दु॒म्बरी॑ ७ स्वय॑मातृ॒ण्णायां॑ जुहो॒त्यूर्ग्वै॑
 द॒ध्यूर्गु॑दु॒म्बरो॑ऽसौ स्वय॑मातृ॒ण्णा ऽमु॒ष्यामे॒वोर्जं॑ दधाति
 तस्मा॑द॒मुतो॑ऽर्वा॒चीमूर्ज॑मुप जी॒वाम॑स्ति॒सृभिः॑ सादयति त्रि॒वृद्धा॑

अ॒ग्निर्या॒वाने॒वाग्नि॒स्तं॑ प्र॒तिष्ठां॑ ग॒मय॑ति प्रे॒द्धो अ॒ग्ने दी॑दिहि पु॒रो न
इ॒त्यौदु॑म्बरी॒मा द॑धा॒त्येषा॑ वै सू॒र्मी क॑र्ण॒काव॑त्ये॒तया॑ ह स्म - [] 32

TS 5.4.7.4

वै दे॒वा अ॒सुरा॑णाँ श॒तत॑र्.हाँ स्तृ॑ह॒न्ति य॑दे॒तया॑ स॒मिध॑मा॒दधा॑ति
व॒ज्रमे॒वैत॑च्छ॒तघ्नीं॑ यँज॒मानो॑ भ्रातृ॒व्याय॑ प्र॒हर॑ति स्तृ॒त्या अ॑च्छ॒म्बट्कारं॑
वि॒धेम॑ ते प॒रमे॑ जन्म॒न्नग्न॑ इति॒ वैक॑ङ्क॒तीमा॑ द॒धाति॑ भा ए॒वाव॑ रु॒न्धे
ताँ स॒वितु॑र्वरे॒ण्यस्य॑ चि॒त्रामि॑ति श॒मीमयी॑ँ शान्त्या॑ अ॒ग्निर्वा॑ ह वा
अ॒ग्निचि॑तं दु॒हेऽग्नि॑चि॒द्वाऽग्निं॑ दु॒हे ताँ - [] 33

TS 5.4.7.5

स॒वितु॑र्वरे॒ण्यस्य॑ चि॒त्रामि॑त्या॒हैष॑ वा अ॒ग्नेर्दो॑ह॒स्तम॑स्य क॒ण्व
ए॒व श्रा॒यसो॑ऽवेत् तेन॑ ह स्मै॒नँ स॑ दु॒हे य॑दे॒तया॑ स॒मिध॑-
मा॒दधा॑त्य॒ग्निचि॑दे॒व तद॑ग्निं दु॒हे स॒प्त ते॑ अ॒ग्ने स॒मिधः॑
स॒प्तजि॑ह्वा इ॒त्याह॑ स॒प्तैवा॑स्य सा॒प्तानि॑ प्री॒णाति॑ पू॒र्णया॑ जु॒होति॑
पू॒र्ण इ॒व हि॑ प्र॒जाप॑तिः प्र॒जाप॑ते - [] 34

TS 5.4.7.6

-रा॒प्त्यै न्यून॑या जु॒होति॑ न्यून॑ाद्धि प्र॒जाप॑तिः प्र॒जा अ॑सृजत प्र॒जाना॑ꣳ
 सृष्ट्या॑ अ॒ग्निर्दे॒वेभ्यो॑ नि॒लाय॑त स दि॒शोऽनु॑ प्रा॒विश॑ज्जुह्वन्मन॑सा
 दि॒शो॑ द्ध्याये॑ दिग्भ्य॑ ए॒वैन॑मव रुन्धे द॒ध्ना पु॑रस्ताज्जुहो॒त्या-
 ज्ये॑नोप॒रिष्ठा॑त् तेजश्चै॒वास्मा॑ इन्द्रि॒यं च॑ समी॒ची द॑धाति द्वा॒दश॑कपालो
 वैश्वा॒नरो॑ भवति द्वा॒दश॑ मा॒साः सँव॑त्सरः सँव॑त्सरौ-ऽग्निर्वैश्वा॒नरः॑

साक्षा - [] 35

TS 5.4.7.7

-दे॒व वैश्वा॒नर॑मव रुन्धे यत् प्र॒याजा॑नूया॒जान् कुर्या॑द्विक॒स्तिः सा
 य॒ज्ञस्य॑ दर्वि॒होमं॑ करोति य॒ज्ञस्य॑ प्रतिष्ठित्यै रा॒ष्ट्रं वै वैश्वा॒नरो
 वि॒ष्मरु॑तो वैश्वा॒नर॑ꣳ हु॒त्वा मा॑रु॒तान् जु॒होति॑ रा॒ष्ट्र ए॒व वि॒शम॑नु
 ब॒ध्नात्यु॒च्चै-वैश्वा॒नर॑स्याऽऽ श्रावयत्युपाꣳशु मा॑रु॒तान् जु॒होति॑
 तस्मा॑द्-रा॒ष्ट्रं वि॒शम॑ति वदति मा॒रुता॑ भवन्ति म॒रुतो॑ वै दे॒वानां॑ वि॒शो
 दे॒ववि॒शेनै॒वास्मै॑ मनुष्यवि॒श () -म॑व रुन्धे स॒प्त भ॑वन्ति स॒प्तग॑णा

वै मरुतो गणश एव विशमव रुन्धे गणेन गणमनुद्रुत्य जुहोति
विशमेवास्मा अनुवर्त्मानं करोति ॥ 36

(अग्ने प्रेह्य - व - स्म - दुहे तां - प्रजापतेः - साक्षान् -
मनुष्यविश - मेकविंशतिश्च (A7)

TS 5.4.8.1

वसोर्द्धारां जुहोति वसोर्मे धाराऽसदिति वा एषा हूयते घृतस्य
वा एनमेषा धाराऽमुष्मिन् लोके पितृमानोप तिष्ठत आज्येन
जुहोति तेजो वा आज्यं तेजो वसोर्द्धारा तेजसैवास्मै तेजोऽव
रुन्धेऽथो कामा वै वसोर्द्धारा कामानेवाव रुन्धे यं कामयेत
प्राणानस्यान्नाद्यं वि - [] 37

TS 5.4.8.2

च्छिन्द्यामिति विग्राहं तस्य जुहुयात् प्राणानेवास्यान्नाद्यं विच्छिनत्ति
यं कामयेत प्राणानस्यान्नाद्यं सं तनुयामिति सं ततां तस्य जुहुयात्
प्राणानेवास्यान्नाद्यं सं तनोति द्वादश द्वादशानि जुहोति द्वादश
मासाः सँवत्सरः सँवत्सरेणै वास्मा अन्नमव रुन्धे ऽन्नं च
मेऽक्षुच्च म इत्याहै तद् वा - [] 38

TS 5.4.8.3

अ॒न्नस्य॑ रू॒पꣳ रू॒पेणै॑वान्नमव॑ रुन्धे॑ ऽग्निश्च॑ म॒ आपश्च॑ म॒ इत्या॑हैषा
वा अ॒न्नस्य॑ यो॒निः स॒योन्ये॑वान्नमव॑ रुन्धे॑-ऽर्धे॑न्द्राणि॑ जुहोति॑ दे॒वता॑
ए॒वाव॑ रुन्धे॑ यत् सर्वे॑षा-म॒र्धमिन्द्रः॑ प्रति॑ तस्मादिन्द्रो॑ दे॒वता॑नां
भूयिष्ठ॑भा॒क्तम॑ इन्द्र॒मुत्तर॑माहे-न्द्रि॒यमे॒वास्मि॑-न्नुप॑रिष्ठाद् दधाति॑
य॒ज्ञायु॑धानि जुहोति॑ य॒ज्ञो - [] 39

TS 5.4.8.4

वै य॒ज्ञायु॑धानि य॒ज्ञमे॒वाव॑ रुन्धे॑ऽथो॑ ए॒तद्वै य॒ज्ञस्य॑ रू॒पꣳ रू॒पेणै॑व
य॒ज्ञमव॑ रुन्धे॑ ऽव॒भृथश्च॑ मे॒ स्वगा॑का॒रश्च॑ म॒ इत्या॑ह स्व॒गाकृ॑त्या
अ॒ग्निश्च॑ मे॒ घर्म॑श्च॒ म॒ इत्या॑हैतद् वै ब्र॒ह्मव॑र्च॒सस्य॑ रू॒पꣳ रू॒पेणै॑व
ब्र॒ह्मव॑र्च॒समव॑ रुन्धे॑ ऋक्च॑ मे॒ साम॑ च॒ म॒ इत्या॑है - [] 40

TS 5.4.8.5

-तद्वै छ॒न्दसा॑ꣳ रू॒पꣳ रू॒पेणै॑व छ॒न्दाꣳस्य॑व॑ रुन्धे॑ गर्भा॑श्च॒ मे
व॒थ्साश्च॑ म॒ इत्या॑हैतद् वै प॒शूना॑ꣳ रू॒पꣳ रू॒पेणै॑व प॒शून॑व॑
रुन्धे॑ क॒ल्पान् जुहो॑त्य क॒ल्प॑प्तस्य॒ क॒ल्प॑त्यै॒ युग्म॑दयु॒जे जुहोति॑

मि॒थु॒न॒त्वा॒यो-॑त्त॒रा॒व॒ती॒ भ॒व॒तोऽभि॒क्रान्॒त्या॒ ए॒का॒ च॒ मे॒ ति॒स्रश्च॑
म॒ इ॒त्या॒ह॒ दे॒व॒छ॒न्द॒सं॒ वा॒ ए॒का॒ च॒ ति॒स्रश्च॑ - [] 41

TS 5.4.8.6

म॒नु॒ष्य॒छ॒न्द॒सं॒ च॒त॒स्रश्चा॒ष्टौ॒ च॒ दे॒व॒छ॒न्द॒सं॒ चै॒व॒ म॒नु॒ष्य॒ छ॒न्द॒सश्चा॒व॒ रु॒न्ध॒
आ॒ त्र॒य॒स्त्रि॒ंश॒तो॒ जु॒हो॒ति॒ त्र॒य॒स्त्रि॒ंश॒द्वै॒ दे॒व॒ता॒ दे॒व॒ता॒ ए॒वा॒व॒ रु॒न्ध॒
आऽष्टा॑च॒त्वा॒रि॒ंश॒तो॒ जु॒हो॒त्य॒ष्टा॑च॒त्वा॒रि॒ंश॒दक्ष॒रा॒ ज॒ग॒ती॒ जा॒ग॒ताः
प॒श॒वो॒ ज॒ग॒त्यै॒वा॒स्मै॒ प॒शू॒न॒व॒ रु॒न्धे॒ वा॒ज॒श्च॒ प्र॒स॒व॒श्चे॒ति॒ द्वा॒द॒शं॒ जु॒हो॒ति॒
द्वा॒द॒श॒ मा॒साः॒ सँ॒व॒त्स॒रः॒ सँ॒व॒त्स॒र॒ ए॒व॒ प्र॒ति॒ ति॒ष्ठ॒ति॒ ॥ 42

(वि - वै - य॒ज्ञः-॑सा॒म॒ च॒ म॒ इ॒त्या॒ह॒ - च॒ ति॒स्र॒ - श्रै॒का॒न्न॒
पञ्चा॑श॒च्च) (A8)

TS 5.4.9.1

अ॒ग्नि॒र्दे॒वे॒भ्यो॒ ऽपा॑क्राम॒द्-भा॒ग॒धे॒य॒मि॒च्छ॒मा॒न॒स्तं॒ दे॒वा॒ अ॒ब्रु॒व॒न्नु॒प॑
न॒ आ॒ वर्त॑स्व॒ ह॒व्यं॒ नो॒ व॒हे॒ति॒ सोऽब्र॑वी॒द्-व॒रं॒ वृ॒णै॒ म॒ह्य॒मे॒व॑
वा॒ज॒प्र॒स॒वी॒यं॒ जु॒ह॒व॒न्न॒ति॒ त॒स्मा॒द॒ग्न॒ये॒ वा॒ज॒प्र॒स॒वी॒यं॒ जु॒ह॒ति॒
य॒द्-वा॒ज॒प्र॒स॒वी॒यं॒ जु॒हो॒त्य॒ग्नि॒मे॒व॒ तद्-भा॒ग॒धे॒ये॒न॒ स॒म॒र्द्ध॒य॒त्य॒थो॑

अभिषे॒क ए॒वास्य॒ स च॒तुर्द॒शभिर्जु॑होति स॒प्त ग्रा॒म्या ओष॑धयः

सप्ता - [] 43

TS 5.4.9.2

—*ऽऽ॒र॒ण्या उ॒भयी॑षाम॒वरु॑द्ध्य॒ अन्न॑स्यान्नस्य जुहोत्यन्नस्यान्नस्या—
वरु॑द्ध्य॒ औदु॑म्बरेण सु॒वेण जुहो॑त्यूर्वा उदु॒म्बर ऊ॒र्गन्न॑मूर्जे॒वास्मा
ऊ॒र्जम॑न्नमव रुन्धे ऽग्नि॒र्वे दे॒वाना॑—मभिषि॑क्तोऽग्निचिन्—मनु॒ष्याणां
तस्मा॑दग्निचिद्—वर्ष॑ति न धा॒वेद॑वरुद्ध॒ ह्यस्या॑—न्नम॑न्नमिव खलु॒ वै
वर्ष॑ ँ यद्भा॒वेद॑न्नाद्—याद्भा॒वेदु॑पावर्तेता—न्नाद्य॑मेवाभ्यु - [] 44

TS 5.4.9.3

—पाव॑र्तते नक्तोषा॒सेति॑ कृ॒ष्णायै॑ श्वेत॑वथ्सायै॒ पय॑सा जुहोत्यहै॒वास्मै॑
रात्रिं॑ प्र॒दाप॑यति रात्रियाऽह॒रहो॑रात्रे ए॒वास्मै॑ प्र॒त्ते का॑ममन्नाद्यं दुहाते
राष्ट्र॑भृतो जुहोति रा॒ष्ट्रमे॒वाव रुन्धे॑ षड्भिर्जुहोति षड्वा ऋ॒तव॑ ऋ॒तुष्वे॒व
प्रति॑तिष्ठति भुवनस्य प॒त इति॑ रथ॒मुखे॑ पञ्चाऽऽ*हु॒तीर्जु॑होति वज्रो॒ वै
रथो॑ वज्रेणै॒व दि॒शो - [] 45

TS 5.4.9.4

-ऽभि जयत्यग्निचितं ह वा अमुष्मिन् लोके वातोऽभि पवते
 वातनामानि जुहोत्यभ्येवैन-ममुष्मिन् लोके वातः पवते त्रीणि
 जुहोति त्रय इमे लोका एभ्य एव लोकेभ्यो वातमव रुन्धे समुद्रोऽसि
 नभस्वानित्याहैतद्वै वातस्य रूपं रूपेणैव वातमव रुन्धे ऽञ्जलिना
 जुहोति न ह्येतेषामन्यथा () ऽऽहुतिरवकल्पते ॥ 46

(ओषधयः सप्ता - भि - दिशो - ऽन्यथा - द्वे च) (A9)

TS 5.4.10.1

सुवर्गाय वै लोकाय देवरथो युज्यते यत्राकूताय मनुष्यरथ एष खलु
 वै देवरथो यदग्निरग्निं युनज्मि शवसा घृतेनेत्याह युनक्त्येवैनं स
 एनं युक्तः सुवर्गं लोकमभि वहति यथ् सर्वाभिः पञ्चभि-
 र्युञ्ज्याद्-युक्तोऽस्याऽग्निः प्रच्युतः स्यादप्रतिष्ठिता आहुतयः
 स्युरप्रतिष्ठिताः स्तोमा अप्रतिष्ठितान्युक्थानि तिसृभिः
 प्रातस्सवनेऽभि मृशति त्रिवृ - [] 47

TS 5.4.10.2

-द्वा अ॒ग्निर्या॒वाने॒वा-ग्नि॒स्तं यु॑नक्ति॒ यथाऽन॑सि यु॒क्त आ॑धी॒यत॑
ए॒वमे॒व तत् प्र॑त्याहु॒तय॑स्तिष्ठन्ति॒ प्रति॒ स्तोमाः॑ प्रत्यु॒क्थानि॑ य॒ज्ञाय॑ज्ञि॒यस्य॑
स्तो॒त्रे द्वा॒भ्याम॒भि मृ॑शत्ये॒तावान् वै य॒ज्ञो या॒वानग्नि॑ष्टो॒मो भू॒मा त्वा
अ॒स्यात॑ ऊ॒र्ध्वः क्रि॑यते॒ यावा॑ने॒व य॒ज्ञस्तम॑न्ततो॒ ऽन्वारो॑हति॒ द्वाभ्यां॑
प्रति॑ष्ठित्या॒ एक॑याऽप्रस्तु॒तं भव॑त्यथा - [] 48

TS 5.4.10.3

-भि मृ॑शत्यु॒पै नमु॑त्तरो॒ यज्ञो न॑मत्यथो॒ संत॑त्यै प्र॒ वा ए॒षोऽस्मान्
लो॒काच्च॑वते॒ योऽग्निं॑ चि॒नुते॒ न वा ए॒तस्या॑निष्ट॒क आ॑हुति॒रव॑ कल्पते॒
यां वा ए॒षोऽनिष्ट॑क आ॒हुतिं॑ जु॒होति॒ स्रव॑ति॒ वै सा ता॑ स्रव॒न्तीं
य॒ज्ञोऽनु॑ परा॒ भव॑ति॒ यज्ञं॑ य॒जमानो॑ यत् पु॒नश्चि॑तिं चि॒नुत॑ आ॒हुती॑नां
प्रति॑ष्ठित्यै॒ प्रत्याहु॑तय॑स्तिष्ठन्ति - [] 49

TS 5.4.10.4

न य॒ज्ञः परा॑भवति॒ न य॒जमानो॑ ऽष्टावु॒प द॑धात्य॒ष्टाक्ष॑रा गाय॒त्री
गा॒यत्रे॒णैवैनं॑ छन्द॒सा चि॒नुते॒ यदे॒काद॑श॒ त्रैष्टु॑भेन॒ यद् द्वा॑दश॒
जा॒गते॑न॒ छन्दो॑भिरे॒वैनं॑ चि॒नुते॒ नपा॑त्को॒ वैनामै॑षोऽग्नि॒र्यत् पु॒नश्चि॑तिर्य

ए॒वं वि॒द्वान् पु॒नश्चि॒तिं चि॒नुत॑ आ तृ॒तीया॒त् पु॒रुषा॒दन्न॒मत्ति॑
यथा॒ वै पु॒नरा॒धेय॑ ए॒वं पु॒नश्चि॒तिर्यो॑ऽग्न्या॒धेये॑न न - [] 50

TS 5.4.10.5

ध्नो॑ति स पु॒नरा॒धेय॒मा ध॑त्ते यो॑ऽग्निं चि॒त्वा न॒द्ध्नो॑ति स पु॒नश्चि॒तिं
चि॒नुते॑ यत् पु॒नश्चि॒तिं चि॒नुत॑ ऋ॒द्ध्य॒ा अथो॑ ख॒ल्वाहु॑र्न चे॒तव्ये॑ति रु॒द्रो
वा ए॒ष यद॒ग्निर्य॑था॒ व्याघ्र॑ सु॒प्तं बो॒धय॑ति ता॒दृगे॒व तदथो॑
ख॒ल्वाहु॑श्चे॒तव्ये॑ति यथा॒ वसी॑या॒सं भा॒गधे॑येन बो॒धय॑ति ता॒दृगे॒व
तन्म॑नुर॒ग्निम॑चि॒नुत॑ () तेन॒ नाऽऽ*द्ध्नो॑थ्स ए॒तां पु॒नश्चि॒तिम॑पश्यत्
ताम॑चि॒नुत॑ तया॒ वै स आ॑द्ध्नो॒द्यत् पु॒नश्चि॒तिं चि॒नुत॑ ऋ॒द्ध्यै ॥ 51

(त्रि॒वृ-दथ॑-तिष्ठ॑-न्त्यग्न्या॒धेये॑न ना-चि॒नुत॑-सप्त॑दश- च) (A10)

TS 5.4.11.1

छ॒न्दश्चि॑तं चि॒न्वीत॑ प॒शुकामः॑ प॒शवो॑ वै छ॒न्दा॒सि प॒शुमा॑नेव भ॒वति॑
श्ये॒नचि॑तं चि॒न्वीत॑ सु॒वर्ग॑कामः श्ये॒नो वै वय॑सां पतिष्ठः श्ये॒न ए॒व
भू॒त्वा सु॒वर्गं लो॑कं प॒तति॑ कङ्क॒चितं॑ चि॒न्वीत॑ यः का॒मये॑त
शी॒र्षण्वा॑नमु॒ष्मिन् लो॑के स्यामि॒ति शी॒र्षण्वा॑नेवाऽमु॒ष्मिन् लो॑के

भवत्यलजचितं चिन्वीत चतुस्सीतं प्रतिष्ठाकामश्चतस्रो दिशो दिक्ष्वेव
प्रति तिष्ठति प्रउगचितं चिन्वीत भ्रातृव्यवान् प्रै - [] 52

TS 5.4.11.2

-व भ्रातृव्यान् नुदत उभयतः प्रउगं चिन्वीतयः कामयेत प्रजातान्
भ्रातृव्यान् नुदेय प्रति जनिष्यमाणानिति प्रैव जातान् भ्रातृव्यान् नुदते
प्रति जनिष्यमाणान् रथचक्रचितं चिन्वीत भ्रातृव्यवान् वज्रो वै रथो
वज्रमेव भ्रातृव्येभ्यः प्रहरति द्रोणचितं चिन्वीतान्नकामो द्रोणे वा
अन्नं भ्रियते सयोन्येवान्नमव रुन्धे समूह्यं चिन्वीत पशुकामः
पशुमानेव भवति - [] 53

TS 5.4.11.3

परिचाय्यं चिन्वीत ग्रामकामो ग्राम्येव भवति श्मशानचितं चिन्वीत
यः कामयेत पितृलोक ऋद्धनुयामिति पितृलोक एवद्धर्नोति
विश्वामित्रजमदग्नी वसिष्ठेनाऽस्पद्धेताऽ स एता जमदग्निर्विहव्या
अपश्यत् ता उपाधत्त ताभिर्वै स वसिष्ठस्येन्द्रियं वीर्यमवृद्ध यद्-

वि॒ह॒व्या॒ उप॒द॒धा॒तीन्द्रि॒यमे॒व ताभिर्वी॒र्यं॑ य॒ज॒मा॒नो भ्रातृ॒व्यस्य॑ वृ॒द्धे
होतु॒र्दि॒र्ध॒ष्णि॒य उप॑ द॒धाति॑ य॒ज॒मा॒नाय॒तनं॑ वै – [] 54

TS 5.4.11.4

हो॒ता स्व॑ ए॒वास्मा॑ आ॒य॒त॒न इन्द्रि॒यं वी॒र्य॑म॒व रु॒न्धे द्वा॒द॒शोप॑ द॒धाति॑
द्वा॒द॒शाक्ष॑रा जग॒ती जा॒गताः॑ प॒श॒वो जग॑त्यै॒वास्मै॑ प॒शू॒न॒व रु॒न्धे
ऽष्टा॑व॒ष्टाव॒न्येषु॑ धि॒ष्णि॒येषूप॑ द॒धात्य॑ष्टा॒श॒फाः प॒श॒वः प॒शू॒ने॒वाव रु॒न्धे
षण्मा॑र्जा॒लीये॒ षड् वा ऋ॒त॒व ऋ॒त॒वः खलु॑ वै दे॒वाः पि॒तर ऋ॒तू॒ने॒व
दे॒वान् पि॒तृन् प्री॑णाति ॥ 55

(प्र – भ॒वति – य॒ज॒मा॒नाय॒तनं॑वा – अ॒ष्टाच॑त्वारि॒ंशच्च॑) (A11)

TS 5.4.12.1

प॒व॒स्व वा॒ज॒सा॒तय॑ इ॒त्यनु॑ष्टुक् प्र॒तिप॑द्भवति ति॒स्रोऽनु॑ष्टुभश्च॒त॒स्रो
गा॒य॒त्रि॒यो यत् ति॒स्रोऽनु॑ष्टुभ–स्तस्मा॑–दश्च॑स्त्रिभि॒स्तिष्ठ॑ स्तिष्ठति
यच्च॑त॒स्रो गा॒य॒त्रि॒यस्त॑स्मात् सर्वाश्च॑तु॒रः प॒दः प्र॒ति॒द॒धत् प॒ला॒य॒ते
प॒र॒मा वा ए॒षा छ॒न्द॒सां यद॑नु॒ष्टुक् प॒र॒मश्च॑तुष्टोमः स्तो॒मा॒नां
प॒र॒मस्त्रि॑रा॒त्रो य॒ज्ञा॒नां प॒र॒मोऽश्चः॑ प॒शू॒नां प॒र॒मे॒णै॒वैनं॑ प॒र॒म॒तां
ग॒म॒य॒त्ये॒कवि॑ंशम॒हर्भ॑वति – [] 56

TS 5.4.12.2

यस्मिन्नश्च आलभ्यते द्वादश मासाः पञ्चर्तवस्त्रय इमे लोका
 असावादित्य एकविंश एष प्रजापतिः प्राजापत्योऽश्वस्तमेव
 साक्षाद्दध्नोति शक्वरयः पृष्ठं भवन्त्यन्-यदन्य-च्छन्दोऽन्येन्ये वा
 एते पशव आ लभ्यन्त उतेव ग्राम्या उतेवाऽऽ*रण्या यच्छक्वरयः
 पृष्ठं भवन्त्यश्वस्य सर्वत्वाय पार्थुरश्मं ब्रह्मसामं भवति रश्मिना
 वा अश्वो - [] 57

TS 5.4.12.3

यत ईश्वरो वा अश्वोऽयतोऽप्रतिष्ठितः परां परावतं गन्तोर्यत्
 पार्थुरश्मं ब्रह्मसामं भवत्यश्वस्य यत्यै धृत्यै संकृत्यच्छावाकसामं
 भवत्युथ्सन्नयज्ञो वा एष यदश्वमेधः कस्तद्वेदेत्याहुर्यदि सर्वो वा
 क्रियते न वा सर्व इति यथ् संकृत्यच्छावाकसामं भवत्यश्वस्य
 सर्वत्वाय पर्याप्त्या अनन्तरायाय सर्वस्तोमोऽतिरात्र उत्तममहर्भवति
 () सर्वस्याऽऽ*प्त्यै सर्वस्य जित्यै सर्वमेव तेनाऽऽ*प्नोति
 सर्वं जयति ॥ 58

(अ॒ह॒र्भ॒व॒ति॒ – वा अ॒श्वो – ऽह॒र्भ॒व॒ति॒ – द॒श च) (A12)

Prasna Korvai with starting Padams of 1 to 12 Anuvaakams :-

(दे॒वा॒सु॒रा॒स्तेन॑ – त॒व्या॑ – रु॒द्रो – ऽ॒श्म॑ – नृ॒ष॒दे॒ व – दु॒दे॒नं॑ –
प्रा॒ची॒मि॒ति॒ – व॒सो॒र्धा॒रा – म॒ग्नि॒र्दे॒वेभ्यः॑ – सु॒व॒र्गा॒यि॒ यत्रा॑कू॒ताय॑ –
छ॒न्द॒श्चि॒तं॑ – प॒व॒स्व – द्वा॒द॒श)

Korvai with starting Padams of 1, 11, 21 Series of Panchaatis :-

(दे॒वा॒सु॒रा – अ॒जा॒यां – वै॑ गु॒मु॒ष्टिः – प्र॒थ॒मो दे॒व॒य॒तामे॑ – त॒द्वै
छ॒न्द॒सा – मृ॒ध्नो – त्य॒ष्टौ प॒ञ्चा॒शत्)

First and Last Padam of Fourth Prasnam of 5th Kandam

(दे॒वा॒सु॒राः – सर्वं॑ ज॒य॒ति)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे चतुर्थः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

5.5 पञ्चमकाण्डे पञ्चमः प्रश्नः – वायव्यपश्चाद्वायुं निरूपणं

TS 5.5.1.1

यदेकेन स॒ स्थापयति॑ यज्ञस्य॒ संतत्या॑ अविच्छेदायैन्द्राः॒ पशवो॑
ये मुष्करा॑ यदैन्द्राः॒ सन्तोऽग्निभ्य॑ आलभ्यन्ते॒ देवता॑भ्यः समदं॒
दधात्याग्नेयीस्त्रिष्टुभो॑ याज्यानुवाक्याः॒ कुर्याद्-यदाग्नेयीस्तेना॑
ऽऽग्नेया॒ यत् त्रिष्टुभस्तेनैन्द्राः॒ समृद्ध्यै॒ न देवता॑भ्यः समदं॒
दधाति॑ वायवे॒ नियुत्वते॑ तूपरमा॒ लभते॒ तेजोऽग्नेर्वायुस्तेजस॑ एष
आ लभ्यते॒ तस्माद्-यद्रियङ् वायु॑ – [] 1

TS 5.5.1.2

-वार्ति॑ तद्रियङ्-ग्निर्दहति॒ स्वमेव॒ तत् तेजोऽन्वेति॒ यन्न नियुत्वते॑
स्यादुन्माद्येद्-यजमानो॒ नियुत्वते॑ भवति॒ यजमानस्याऽनुन्मादाय॑
वायुमती॑ श्वेतवती॒ याज्यानुवाक्ये॑ भवतः॒ सतेजस्त्वाय॑ हिरण्यगर्भः॒
समवर्तताग्र॒ इत्याधारमा॑ धारयति॒ प्रजापतिर्वै॑ हिरण्यगर्भः॒

प्र॒जाप॑तेरनु॒रूप॑त्वाय॒ सर्वा॑णि॒ वा ए॒ष रू॒पाणि॑ प॒शूनां॑ प्र॒त्या ल॑भ्यते
यच्छ॑म॒श्रुण॑स्तत् - [] 2

TS 5.5.1.3

पुरु॑षाणां॒ रूपं॑ य॒त् तू॒पर॑स्तद॒श्वा॒नां य॑दन्यतो॒दन् तद्-ग॒वां
य॑दव्या॒ इव॑ श॒फास्त॑दवी॒नां य॑दजस्तद॒जानां॑ वा॒युर्वै प॒शूनां॑ प्रि॒यं
धा॒म यद्-वा॒यव्यो॑ भवत्ये॒तमे॒वैन॑म॒भि सं॑जाना॒नाः प॒शव॑ उप॒ तिष्ठ॑न्ते
वा॒यव्यः॑ का॒र्या(३): प्रा॑जाप॒त्या(३) इ॒त्याहु॑-र्यद्-वा॒यव्यं॑ कुर्यात्
प्र॒जाप॑तेरि॒याद्य॑त् प्रा॒जाप॑त्यं कुर्याद्-वा॒यो - [] 3

TS 5.5.1.4

-रि॒याद्-यद्-वा॒यव्यः॑ प॒शुर्भव॑ति तेन॒ वा॒योर्नैति॑ यत् प्रा॒जाप॑त्यः
पु॒रोडा॑शो भवति तेन॒ प्रा॒जाप॑तेर्नैति॒ यद् द्वा॑दशकपालस्तेन॒
वैश्वा॑नरा॒न्नैत्या॑ग्ना वैष्ण॒वमे॑कादशकपालं॒ निर्व॑पति दीक्षिष्यमा॒णोऽग्निः॑
सर्वा॑ दे॒वता॑ विष्णु॒र्यज्ञो॑ दे॒वता॑श्चै॒व य॒ज्ञं चाऽऽ* र॑भतेऽग्निर॒वमो॑
दे॒वता॑नां॒ विष्णुः॑ प॒रमो॑ यदा॒ग्ना-वैष्ण॑व-मे॒काद॑शकपालं॒ निर्व॑पति
दे॒वता॑ - [] 4

TS 5.5.1.5

ए॒वो॒भ॒यतः॑ परि॒गृह्य॑ यज॒मानो॑ऽव रुन्धे पु॒रोडा॑शेन वै दे॒वा अ॒मुष्मिन्॑
 ॥ ॐ॑ लो॒क आ॒र्ध्नु॒वन् च॒रुणा॑ऽस्मिन् यः का॒मये॑ताऽमुष्मिन् ॐ॑ लो॒क
 ऋ॒द्ध्नु॒यामि॑ति स पु॒रोडा॑शं कुर्वी॒ताऽमुष्मि॑न्ने॒व लो॒क ऋ॒द्ध्नो॑ति
 यद॒ष्टाक॑पा॒लस्तेना॑ऽऽ*ग्ने॒यो यत् त्रि॑क॒पा॒लस्तेन॑ वैष्ण॒वः समृ॑द्ध्यै
 यः का॒मये॑ताऽस्मिन् ॐ॑ लो॒क ऋ॒द्ध्नु॒यामि॑ति स च॒रुं कुर्वी॑ताग्ने॒र्घृतं॑
 ॥ ॐ॑ वि॒ष्णो॒स्तण्डु॒ला-स्तस्मा॑ - [] 5

TS 5.5.1.6

-च॒रुः का॒र्यो॑ऽस्मिन्ने॒व लो॒क ऋ॒द्ध्नो॑त्यादि॒त्यो भ॑वती यं ॐ॑ वा
 अदि॒तिर॒स्यामे॒व प्र॑ति तिष्ठ॒त्यथो॑ अ॒स्यामे॒वाधि॑ य॒ज्ञं त॑नुते यो वै
 सँव॑त्स॒रमुख्य॑-म॒भृत्वा॑ऽग्निं चि॒नुते॑ यथा सा॒मि गर्भो॑ऽव॒पद्य॑ते ता॒दृगे॒व
 तदा॒र्तिमा॑च्छे॒द्-वैश्वा॑न॒रं द्वा॑द॒शक॑पा॒लं पु॒रस्ता॑न्निर्व॒पेथ् सँव॑त्स॒रो
 वा अ॒ग्निर्वै॑श्वा॒नरो॑ यथा सं॒वत्स॑रमाप्त्वा - [] 6

TS 5.5.1.7

का॒ल आ॑गते वि॒जाय॑त ए॒वमे॒व सँव॑त्स॒रमाप्त्वा॑ का॒ल आ॑गतेऽग्निं
 चि॒नुते॑ नाऽऽ*र्ति॒माच्छे॑त्येषा वा अ॒ग्नेः प्रि॒या त॒नूर्य॑द्-वैश्वा॒नरः॑

प्रि॒यामे॒वास्य॑ त॒नुव॑मव रु॒न्धे त्री॑ण्ये॒तानि॑ ह॒वी॒षि॑ भवन्ति त्रय इ॒मे
लो॒का ए॒षां लो॒काना॑ं रोहाय ॥ 7

(य॒द्रिय॑ङ् वा॒यु - र्य॑च्छ॒मश्रु॑णस्तद् - वा॒यो - नि॒र्वप॑ति दे॒वता -
स्तस्मा॑ - दा॒प्त्वा - षा॒त्रि॒ञ्श॑च्च) (A1)

TS 5.5.2.1

प्र॒जाप॑तिः प्र॒जाः सृ॑ष्ट्वा प्रे॒णाऽनु॑ प्रावि॒शत् ता॑भ्यः पुनः संभ॒वितुं॑
ना॒शक्नो॑त् सोऽब्र॒वीदृ॑द्ध॒नव॑दि॒त् स यो मे॒तः पुनः॑ संचि॒नव॑दिति तं
दे॒वाः सम॑चि॒न्वन् ततो॑ वै त आ॒र्ध्नुव॑न् यत् सम॑चि॒न्वन् तच्चि॑त्यस्य
चि॒त्यत्वं य॑ ए॒वं वि॒द्वान॒ग्निं चि॑नुत ऋ॒द्ध्नो॑त्ये॒व कस्मै॑ क॒मग्नि॑श्ची॒यत॑
इ॒त्याहु॑र॒ग्निवा॑ - [] 8

TS 5.5.2.2

-न॒सानि॑ति वा अ॒ग्निश्ची॑यते ऽग्नि॒वाने॒व भ॑वति कस्मै क॒मग्नि॑श्ची॒यत॑
इ॒त्याहु॑र्दे॒वा मा वेद॑न्निति वा अ॒ग्निश्ची॑यते वि॒दुरे॑नं दे॒वाः कस्मै॑
क॒मग्नि॑श्ची॒यत॑ इ॒त्याहु॑र्गृह्य॒सानी॑ति वा अ॒ग्निश्ची॑यते गृह्ये॒व भ॑वति
कस्मै क॒मग्नि॑श्ची॒यत॑ इ॒त्याहुः॑ प॒शुमा॑न॒सानी॑ति वा अ॒ग्नि - [] 9

TS 5.5.2.3

–श्री॑यते प॒शु॒मा॒ने॒व भ॑वति क॒स्मै क॒म॒ग्नि॒श्री॑यत इ॒त्याहुः॑ स॒प्त
मा पु॒रु॒षा उप॑ जी॒वानि॑ति वा अ॒ग्नि॒श्री॑यते त्रयः प्राञ्च॒स्त्रयः॑
प्र॒त्यञ्च॑ आ॒त्मा स॒प्तम॑ ए॒ताव॑न्त ए॒वैन॑म॒मुष्मिन्॑ लो॒क उप॑ जी॒वन्ति
प्र॒जाप॑तिर॒ग्निम॑चि॒की॒षत॑ तं पृ॒थि॒व्य॒ब्रवी॑न्न म॒य्यग्निं॑ चै॒ष्यसे॑ति
मा ध॒क्ष्यति॑ सा त्वा॑ति॒दह्य॑मा॒ना वि ध॑वि॒ष्ये – [] 10

TS 5.5.2.4

स पा॒पी॒या॒न् भ॑वि॒ष्यसी॑ति सौ॒ब्रवी॑त् त॒था वा अ॒हं क॑रि॒ष्यामि॑ य॒था
त्वा ना॑ति॒ध॒क्ष्यती॑ति स इ॒माम॑भ्यमृ॒शत् प्र॒जाप॑तिस्त्वा सा॒दय॑तु त॒या
दे॒वत॑याऽङ्गि॒रस्व॑द् ध्रु॒वा सी॒देती॒मामे॑वेष्ट॒कां कृ॒त्वोपा॑–ध॒त्ता–न॑ति॒दाहा॑य
यत् प्र॒त्यग्निं॑ चि॒न्वी॑त तद॒भि मृ॑शेत् प्र॒जाप॑तिस्त्वा सा॒दय॑तु त॒या
दे॒वत॑याऽङ्गि॒रस्व॑द् ध्रु॒वा सी॒दे – [] 11

TS 5.5.2.5

–ती॒मामे॑वेष्ट॒कां कृ॒त्वोप॑ ध॒त्तेऽन॑ति॒दाहा॑य प्र॒जाप॑तिर॒काम॑यत
प्र॒जाये॑येति स ए॒तमु॒ख्यम॑प॒श्यत् तं सँ॑व॒थ्सर॑म॒बिभ॑स्ततो वै
स प्रा॒जाय॑त तस्मा॑त् सँ॑व॒थ्सरं॑ भा॒र्यः प्रै॒व जा॑यते तं वँ॑स॒वोऽब्रु॑वन्

प्र त्वमजनिष्ठा वयं प्रजायामहा इति तं वसुभ्यः प्रायच्छत् तं
 त्रीण्यहान्यबिभरुस्तेन - [] 12

TS 5.5.2.6

त्रीणि च शतान्यसृजन्त त्रयस्त्रिंशतं च तस्मात् त्र्यहं भार्यः
 प्रैव जायते तान् रुद्रा अब्रुवन् प्र यूयमजनिद्वं वयं प्रजायामहा
 इति तं रुद्रेभ्यः प्रायच्छन् तं षडहान्यबिभरुस्तेन त्रीणि च
 शतान्यसृजन्त त्रयस्त्रिंशतं च तस्मात् षडहं भार्यः प्रैव जायते
 तानादित्या अब्रुवन् प्र यूयमजनिद्वं वयं - [] 13

TS 5.5.2.7

प्र जायामहा इति तमादित्येभ्यः प्रायच्छन् तं द्वादशाहान्यबिभरुस्तेन
 त्रीणि च शतान्यसृजन्त त्रयस्त्रिंशतं च तस्माद् द्वादशाहं भार्यः
 प्रैव जायते तेन वै ते सहस्रमसृजन्तोखां सहस्रतमीं य
 एवमुख्यं साहस्रं वेद प्र सहस्रं पशूनाप्नोति ॥ 14

(अग्निवान् - पशुमानसानीति वा अग्नि - र्द्विष्ये - मृशेत्
 प्रजापतिस्त्वा सादयतु तथा देवतयाऽङ्गिरस्व ध्रुवा सीद - तेन -
 तानादित्या अब्रुवन् प्र यूयमजनिद्वं वयं - चत्वारिंशच्च) (A2)

TS 5.5.3.1

यजु॒षा वा ए॒षा क्रि॑यते यजु॒षा प॑च्यते यजु॒षा वि मु॑च्यते यदु॒खा
सा वा ए॒षैत॑र्हि या॒तया॑म्नी सा न पुनः प्र॒युज्ये॑त्याहु॒रग्ने॑ यु॒क्ष्वा
हि ये तव॑ यु॒क्ष्वा हि दे॒वहू॑तमा॒ꣳ इत्यु॒खायां॑ जुहोति तेनै॒वैनां॑ पुनः
प्र॒युङ्क्ते॑ तेनाया॒तया॑म्नी यो वा अ॒ग्निं यो॑ग आ॒गते॑ यु॒नक्ति॑ यु॒ङ्क्ते
यु॒ञ्जाने॑ष्वग्ने – [] 15

TS 5.5.3.2

यु॒क्ष्वा हि ये तव॑ यु॒क्ष्वा हि दे॒वहू॑तमा॒ꣳ इत्या॒हैष वा
अ॒ग्नेर्यो॑गस्तेनै॒वैनं॑ यु॒नक्ति॑ यु॒ङ्क्ते यु॒ञ्जाने॑षु ब्र॒ह्मवा॑दिनो वदन्ति
न्य॒ङ्ङुग्नि॑श्चे॒तव्या॑(३) उ॒त्ताना॑(३) इति वय॒सां वा ए॒ष प्र॑तिमया ची॒यते
यद॒ग्निर्य॑न्यञ्चं चि॒नुया॑त् पृ॒ष्टित ए॒नमा॑हु॒तय ऋ॑च्छेयु॒र्यदु॑त्तानं न
पति॑तुꣳ शक्नु॒यादसु॑व॒ग्योऽस्य॑ स्यात् प्रा॒चीन॑मु॒त्तानं॑ – [] 16

TS 5.5.3.3

पुरु॑षशीर्षमु॒प द॑धाति मुख॒त ए॒वैन॑माहु॒तय ऋ॑च्छन्ति नो॒त्तानं॑ चि॒नुते
सु॒व॒ग्योऽस्य॑ भवति सौ॒र्या जु॑होति चक्षु॒रेवा॑स्मिन् प्र॒ति द॑धाति
द्वि॒र्जुहो॑ति द्वे हि चक्षु॒षी स॑मा॒न्या जु॑होति स॒मानꣳ हि चक्षुः॑

समृद्ध्यै देवासुराः सँयत्ता आसन् ते वामं वसु सं न्यदधत् तद्देवा
वामभृताऽवृज्जत तद्वामभृतो वामभृत्त्वं यद्वामभृत () मुपदधाति
वाममेव तया वसु यजमानो भ्रातृव्यस्य वृद्धे हिरण्यमूद्धर्नी
भवति ज्योतिर्वै हिरण्यं ज्योतिर्वामं ज्योतिषैवास्य ज्योतिर्वामं वृद्धे
द्वियजुर्भवति प्रतिष्ठित्यै ॥ 17

(युज्जानेष्वर्गन्-प्राचीनमुत्तानं - वामभृतं - चतुर्विंशतिश्च) (A3)

TS 5.5.4.1

आपो वरुणस्य पत्नय आसन् ता अग्निरभ्यद्ध्यायत् ताः
समभवत् तस्य रेतः पराऽपतत् तदियमभवद्यद् द्वितीयं पराऽपतत्
तदसावभवदियं वै विराडसौ स्वराड् यद्-विराजावुपदधातीमे
एवोप धत्ते यद्वा असौ रेतः सिञ्चति तदस्यां प्रति तिष्ठति तत्
प्र जायते ता ओषधयो - [] 18

TS 5.5.4.2

वीरुधो भवन्ति ता अग्निरत्ति य एवं वेद प्रैव जायतेऽन्नादो भवति
यो रेतस्वी स्यात् प्रथमायां तस्य चित्यामुभे उप दद्ध्यादिमे एवास्मै
समीची रेतः सिञ्चतो यः सिकरेताः स्यात् प्रथमायां तस्य

चित्याम॒न्यामु॒प द॒ध्यादु॒त्तमा॒याम॒न्याꣳ रे॒त ए॒वास्य॑
सि॒क्तमा॒भ्यामु॒भय॒तः परि॑ गृ॒ह्णाति॑ सँव॒थ्स॒रं न क॑ - [] 19

TS 5.5.4.3

ञ्च॒न प्र॒त्यव॒रोहे॒न्न ही॒मे कञ्च॑न प्र॒त्यव॒रोह॑तस्त॒देन॑यो॒र्व्रतं॑
ँयो वा अ॒प शी॒र्षाण॑म॒ग्निं चि॒नुते॑ऽप॒शीर्षा॑ऽमु॒ष्मिन् ँलो॒के भ॑वति
यः स॒शीर्षा॑णं चि॒नुते॑ स॒शीर्षा॑ ऽमु॒ष्मिन् ँलो॒के भ॑वति चि॒त्तिं
जुहो॑मि॒ मन॑सा घृ॒तेन॑ यथा॒ देवा॑ इ॒हाऽऽ*ग॑मन् वी॒तिहो॑न्ना ऋ॒तावृ॑धः
समु॒द्रस्य॑ व॒युन॑स्य प॒त्मन् जुहो॑मि॒ विश्व॑क॒र्मणे॑ वि॒श्वाऽहा॑ऽम॒र्त्यꣳ
ह॒विरि॑ति॒ स्वय॑मा॒तृण्णामु॒पधा॑य जुहो॒त्ये - [] 20

TS 5.5.4.4

तद्वा अ॒ग्नेः शि॒रः स॒शीर्षा॑णमे॒वाग्निं॑ चि॒नुते॑ स॒शीर्षा॑ऽमु॒ष्मिन्
ँलो॒के भ॑वति य ए॒वं वैद॑ सु॒वर्गा॑य वा ए॒ष लो॒काय॑ ची॒यते॑
यद॒ग्निस्त॑स्य यद॒यथा॑पूर्वं क्रि॒यते॑ऽसु॒वर्ग्य॑म॒स्य तथ्
सु॒वर्ग्यो॑ऽग्निश्चि॒त्तिमु॒पधा॑या॒भि मृ॑शे॒च्चि॒त्तिम॑चि॒त्तिं चि॒नव॑द्वि वि॒द्वान्
पृ॒ष्ठेव॑ वी॒ता वृ॑जि॒ना च॒ मर्ता॑न् रा॒ये च॑ नः स्व॒प॒त्याय॑ () दे॒व

दितिं च रास्वा-दितिमुरुष्येति यथापूर्वमेवैनामुप धत्ते प्राञ्चमेनं
चिनुते सुवर्ग्योऽस्य भवति ॥ 21

(ओषधयः - कं - जुहोति - स्वपत्याया - द्वादश च) (A4)

TS 5.5.5.1

विश्वकर्मा दिशां पतिः स नः पशून् पातु सोऽस्मान् पातु तस्मै नमः
प्रजापती रुद्रो वरुणो ऽग्निर्दिशां पतिः स नः पशून् पातु सोऽस्मान्
पातु तस्मै नम एता वै देवता एतेषां पशूना-मधिपतय-स्ताभ्यो
वा एष आ वृश्च्यते यः पशुशीर्षाण्युप दधाति हिरण्येष्टका उप
दधात्येताभ्य एव देवताभ्यो नमस्करोति ब्रह्मवादिनो - [] 22

TS 5.5.5.2

वदन्त्यग्नौ ग्राम्यान् पशून् प्र दधाति शुचाऽऽरण्यानर्पयति किं
तत उच्छिषतीति यद्विरण्येष्टका उपदधात्यमृतं वै हिरण्यममृतेनैव
ग्राम्येभ्यः पशुभ्यो भेषजं करोति नैनान् हिनस्ति प्राणो वै प्रथमा
स्वयमातृणा व्यानो द्वितीयाऽपानस्तृतीयाऽनु प्राऽऽरण्यात् प्रथमा
स्वयमातृणामुपधाय प्राणेनैव प्राणं समर्द्धयति
व्यन्याद् - [] 23

TS 5.5.5.3

द्वि॒तीया॑मु॒प॒धा॒य॑ व्या॒ने॒नै॒व॑ व्या॒न॒ꣳ सम॑र्ध॒य॒त्य॒पा॒न् या॒त्तृ॒तीया॑मु॒प॒धा॒या-
पा॒ने॒नै॒वा॒पा॒न॒ꣳ सम॑र्ध॒य॒त्य॒थो॑ प्रा॒णै॒रे॒वै॒न॒ꣳ समि॑न्धे भू॒र्भु॒वः॑ सु॒व॒रि॒ति॑
स्व॒य॒मा॒तृ॒ण्णा॑ उप॑ द॒धा॒ती॒मे॒ वै लो॒काः॑ स्व॒य॒मा॒तृ॒ण्णा॑ ए॒ता॒भिः॑ ख॒लु॒वै
व्या॒हृ॒ती॒भिः॑ प्र॒जा॒प॒तिः॑ प्रा॒*ऽजा॑यत॒ यदे॒ता॒भिर्व्या॑हृ॒ती॒भिः॑ स्व॒य॒मा॒तृ॒ण्णा॑
उ॒प॒द॒धा॒ती॒मा॒ने॒व लो॒का॒नु॒प॒धा॒यै॒षु- [] 24

TS 5.5.5.4

लो॒केष्व॑धि प्र॒जा॑यते प्रा॒णाय॑ व्या॒नाया॑पा॒नाय॑ वा॒चे त्वा चक्षु॑षे
त्वा त॒या दे॒व॒त॒याऽङ्गि॑र॒स्वद् ध्रु॒वा सी॑दा॒ग्नि॒ना वै दे॒वाः सु॒व॒र्गं
ँलो॒क॒म॒जि॒गाꣳस॒न् ते॒न प॑ति॒तुं ना॑श॒क्नु॒वन् त ए॒ताश्च॑त॒स्रः
स्व॒य॒मा॒तृ॒ण्णा॑ अ॒प॒श्यन् ता दि॒क्षूपा॑द॒धत॑ ते॒न स॒र्व॒तश्चक्षु॑षा सु॒व॒र्गं
ँलो॒क॒मा॒यन् यच्च॑त॒स्रः स्व॒य॒मा॒तृ॒ण्णा॑ दि॒क्षूप॑द॒धाति॑ स॒र्व॒तश्चक्षु॑षै॒व
तद॒ग्नि॒ना य॑ज॒मानः॑ () सु॒व॒र्गंँलो॒कमे॑ति ॥ 25

(ब्र॒ह्म॒वा॒दि॒नो - व्य॑न्या - दे॒षु - य॑ज॒मान - स्त्री॑णि च) (A5)

TS 5.5.6.1

अ॒ग्न आ॒ या॒हि वी॒तय॒ इत्या॒हा-हू॒तै॒वैन॑-म॒ग्निं दू॒तं वृ॑णीम॒ह इत्या॒ह
हू॒त्वै॒वैनं॑ वृ॒णीते॒ ऽग्नि॑ना॒ऽग्निः॒ समि॑द्ध्यत॒ इत्या॒ह समि॑न्ध
ए॒वैन॑म॒ग्निर्वृ॒त्राणि॑ ज॒ङ्घन॑दित्या॒ह समि॑द्ध ए॒वास्मि॑न्निन्द्रि॒यं द॑धात्य॒ग्नेः
स्तो॑मं म॒नाम॒ह इत्या॒ह म॒नुत॑ ए॒वैन॑मे॒तानि॒ वा

अ॒ह्वाꣳ रू॒पाण्य॑ - [] 26

TS 5.5.6.2

-न्व॒हमे॒वैनं॑ चि॒नुते॒ ऽवा॒ह्वाꣳ रू॒पाणि॑ रु॒न्धे ब्र॑ह्मवा॒दिनो॑ वदन्ति॒
॥ ॥
कस्मा॑त् स॒त्याद्या॒तया॑म्नीर॒न्या इ॒ष्टका॑ अ॒यात॑या॒म्नी लो॒कं
पृ॒णेत्यै॑न्द्रा॒ग्नी हि बा॑र्ह॒स्पत्ये॑ति ब्रू॒यादिन्द्रा॑ग्नी च॒ हि दे॒वानां॑
बृ॒हस्प॑तिश्चा-या॒तया॑मानो ऽनु॒चर॑वती भवत्यजा॒मित्वा॑या -नु॒ष्टुभा॑ऽनु
चर॑त्या॒त्मा वै लो॑कं पृ॒णा प्रा॒णो ऽनु॒ष्टुप् तस्मा॑त् प्रा॒णः सर्वा॑ण्य॒ङ्गान्य॑नु
चर॑ति ता अ॒स्य सू॒ददो॑हस - [] 27

TS 5.5.6.3

इत्या॒ह तस्मा॑त् प॒रुषि॑प॒रुषि॑ र॒सः सोम॑ꣳ श्री॒णन्ति॒ पृश्न॑य॒ इत्या॒हान्नं॑
वै पृ॒श्न्यन्न॑मे॒वाव रु॒न्धेऽर्को॑ वा अ॒ग्निर॑र्कोऽन्नम॒न्नमे॒वाव रु॒न्धे जन्म॑न्

दे॒वानां॑ वि॒शस्त्रि॒ष्वा रो॒चने॑ दि॒व इ॒त्याहे॒माने॒वास्मै॑ लो॒कान्
ज्योति॑ष्मतः करोति यो वा इष्ट॑कानां प्रति॒ष्ठां वे॒द प्र॒त्येव॑ तिष्ठति
तया॑ () दे॒वतया॑ऽङ्गि॒रस्वद् ध्रु॒वा सी॒देत्या॑हैषा वा इष्ट॑कानां प्रति॒ष्ठा
य ए॒वं वे॒द प्र॒त्येव॑तिष्ठति ॥ 28

(रूपाणि – सू॒ददो॑हस – स्तया – षोड॑श च) (A6)

TS 5.5.7.1

सु॒वर्गा॒य वा ए॒ष लो॒काय॑ ची॒यते॑ यद॒ग्निर्व॑ज्र ए॒काद॑शिनी
यद॒ग्नावे॑काद॒शिनीं॑ मि॒नुयाद्-व॑ज्रेणै॒न सु॒वर्गाल्लो॒काद॒न्तर्द॑द्ध्य॒द्यन्न
मि॒नुया॑त् स्वरु॒भिः प॒शून् व्य॑र्धयेदे॒कयू॑पं मि॒नोति॑ नैनं॒ वज्रे॑ण
सु॒वर्गाल्लो॒काद॒न्तर्द॑धाति न स्वरु॒भिः प॒शून् व्य॑र्धयति वि वा ए॒ष
इ॒न्द्रिये॑ण वी॒र्ये॑ण॒र्धय॑ते योऽग्निं॑ चि॒न्व-न्न॑धि॒क्राम॑त्यैन्द्रि॒य - [] 29

TS 5.5.7.2

-र्चा ऽऽक्र॑मणं प्रती॒ष्टका॑मुप द॒द्ध्यान्ने॒न्द्रिये॑ण वी॒र्ये॑ण व्य॑र्ध्यते
रु॒द्रो वा ए॒ष यद॒ग्निस्त॑स्य ति॒स्रः श॒रव्याः॑ प्रती॒ची ति॒रश्च॑य॒नूची॑ ताभ्यो
वा ए॒ष आ वृ॑श्च्यते योऽग्निं॑ चि॒नुते॑ ऽग्निं चि॒त्वा ति॒सृध॑न्वमयाचितं

ब्रा॒ह्म॒णाय॑ दद्यात् ताभ्य॑ ए॒व नम॑स्करोत्यथो ताभ्य॑ ए॒वाऽऽत्मानं॑
निष्क्री॑णीते यत्ते रु॒द्र पु॒रो – [] 30

TS 5.5.7.3

धनु॑स्तद्-वातो॑ अनु॑ वातु ते तस्मै॑ ते रु॒द्र सँव॑त्सरेण नम॑स्करोमि
यत्ते रु॒द्र दक्षि॑णा धनु॑स्तद्-वातो॑ अनु॑ वातु ते तस्मै॑ ते रु॒द्र
परि॑वत्सरेण नम॑स्करोमि यत्ते रु॒द्र पश्चा॑द्धनु॑स्तद्-वातो॑ अनु॑
वातु ते तस्मै॑ ते रु॒द्रेदा॑वत्सरेण नम॑स्करोमि यत्ते

रु॒द्रोत्तरा॑द्धनु॑स्त – [] 31

TS 5.5.7.4

द्वातो॑ अनु॑ वातु ते तस्मै॑ ते रु॒द्रेदु॑वत्सरेण नम॑स्करोमि यत्ते रु॒द्रोपरि॑
धनु॑स्तद्-वातो॑ अनु॑ वातु ते तस्मै॑ ते रु॒द्र व॑त्सरेण नम॑स्करोमि रु॒द्रो
वा ए॒ष यद॑ग्निः स यथा॑ व्याघ्रः कु॒ब्धस्तिष्ठ॑त्येवं वा ए॒ष ए॒तर्हि॑
सञ्चित॑मेतैरुप तिष्ठते नम॑स्कारैरेवैनं॑ शमयति येऽ॒ग्नयः॑ – [] 32

TS 5.5.7.5

पुरी॑ष्याः प्रवि॑ष्टाः पृथि॑वीमनु ।
तेषां॑ त्वम॑स्युत्तमः प्र॒णो जी॒वात॑वे सुव ॥

आपं॑ त्वा॒ग्ने॒ मन॒सा ऽऽपं॑ त्वा॒ग्ने॒ तप॒सा ऽऽपं॑ त्वा॒ग्ने॒ दी॒क्षया॑
 ऽऽपं॑ त्वा॒ग्ने॒ उप॒स॒द्भिरा॑पं॑ त्वा॒ग्ने॒ सु॒त्यया॑ ऽऽपं॑ त्वा॒ग्ने॒ दक्षि॑णाभि॒रापं॑
 त्वा॒ग्ने॒ ऽव॒भृ॒थेना॑पं॑ त्वा॒ग्ने॒ व॒शया॑ ऽऽपं॑ त्वा॒ग्ने॒ स्व॒गाका॒रेणे॒त्याहै॑
 () षा॒ वा अ॒ग्नेरा॒प्तिस्त॒यैवैन॑मा॒प्नोति॑ ॥ 33

(ऐ॒न्द्रि॒या - पु॒र - उ॒त्तरा॑द्धनु॒स्त- द॒ग्नय॑ - आ॒हा - षौ च॑) (A7)

TS 5.5.8.1

गा॒य॒त्रेण॑ पु॒रस्ता॒दुप॑ तिष्ठते प्रा॒णमे॒वास्मिन्॑ दधाति बृ॒हद्-रथं॑ त॒राभ्यां॑
 प॒क्षावो॑ज ए॒वास्मिन्॑ दधात्यृ॒तुस्था॑य॒ज्ञा-य॒ज्ञिये॑न पु॒च्छमृ॑तु॒ष्वेव॑ प्रति
 तिष्ठति॑ पृ॒ष्ठैरु॑प तिष्ठते ते॒जो वै पृ॒ष्ठानि॑ तेज ए॒वास्मिन्॑ दधाति
 प्र॒जाप॑ति॒रग्नि॑म॒सृज॑त सोऽस्मा॒त् सृष्टः॑ प॒राडै॒त् तं वा॑रव॒न्तीये॑ना-
 वा॒रय॑त तद्-वा॒रव॒न्तीय॑स्य वा॒रव॒न्तीय॑त्व॒ इयै॑तेन॑ इ॒येती॑ अ॒कुरु॑त
 तच्छ॒यैत॑स्य॒ इयै॑त॒त्वं - [] 34

TS 5.5.8.2

यद्-वा॒रव॒न्तीये॑नोप॒तिष्ठ॑ते वा॒रय॑त ऐ॒वैन॑ इ॒यैतेन॑ इ॒येती॑ कु॒रुते॑
 प्र॒जाप॑ते॒र्हृद॑येना-पि॒पक्षं॑ प्र॒त्युप॑ तिष्ठते प्रे॒माण॑मे॒वास्य॑ गच्छति॒

प्राच्या॑ त्वा दि॒शा सा॒दयामि॑ गा॒यत्रेण॑ छ॒न्दसा॒ऽग्निना॑ दे॒वतया॒ऽग्नेः
 शी॒र्ष्णाग्नेः॑ शिर॒ उप॑ द॒धामि॑ दक्षि॒णया॒ त्वा दि॒शा सा॒दयामि॑
 त्रैष्टु॑भेन॒ छन्द॑सेन्द्रेण॒ देवतया॒ऽग्नेः प॒क्षेणा॒ग्नेः प॒क्षमुप॑ द॒धामि॑
 प्रती॑च्या॒ त्वा दि॒शा सा॒दयामि॑ – [] 35

TS 5.5.8.3

जा॒गतेन॑ छ॒न्दसा॒ सवि॑त्रा दे॒वतया॒ऽग्नेः पु॒च्छेना॒ग्नेः पु॒च्छमुप॑
 द॒धाम्युदी॑च्या॒ त्वा दि॒शा सा॒दयाम्यानु॑ष्टुभेन॒ छन्द॑सा मि॒त्रावरु॑णाभ्यां
 दे॒वतया॒ऽग्नेः प॒क्षेणा॒ग्नेः प॒क्षमुप॑ द॒धाम्यू॒र्ध्वया॑ त्वा दि॒शा सा॒दयामि॑
 पा॒ङ्केन॑ छ॒न्दसा॒ बृह॒स्पति॑ना दे॒वतया॒ऽग्नेः पृ॒ष्ठेना॒ग्नेः पृ॒ष्ठमुप॑ द॒धामि॑
 यो॒ऽवा अ॒पा॒त्मान॑म॒ग्निं चि॒नुते॑ऽपा॒त्माऽमु॒ष्मिन् लो॒के भव॑ति॒ यः
 सा॒त्मानं॑ चि॒नुते॑ () सा॒त्माऽमु॒ष्मिन् लो॒के भव॑त्या॒त्मेष्ट॒का उप॑
 द॒धात्ये॒ष वा अ॒ग्नेरा॒त्मा सा॒त्मान॑मे॒वाग्निं॑ चि॒नुते॑ सा॒त्माऽमु॒ष्मिन्
 लो॒के भव॑ति॒ य ए॒वं वे॒द ॥ 36 (इ॒यैतत्त्वं – प्रती॑च्या॒ त्वा दि॒शा
 सा॒दयामि॑ – यः सा॒त्मानं॑ चि॒नुते॑ – द्वाविं॑शतिश्च) (A8)

TS 5.5.9.1

अ॒ग्न उ॒दधे॑ या॒ त इ॒षुर्यु॑वा॒ नाम॒ तया॑ नो मृ॒ड तस्या॑स्ते॒ नमस्तस्या॑स्त॒
उप॒ जीव॑न्तो भूया॒स्माग्ने॑ दु॒ध्र ग॒ह्य कि॒ञ्शिल॑ व॒न्य या॒ त इ॒षुर्यु॑वा॒
नाम॒ तया॑ नो मृ॒ड तस्या॑स्ते॒ नमस्तस्या॑स्त॒ उप॒ जीव॑न्तो भूया॒स्म
पञ्च॒ वा ए॒तेऽग्नयो॑ यच्चि॒तय॑ उ॒दधि॑रेव॒ नाम॒ प्रथ॑मो

दु॒ध्रो – [] 37

TS 5.5.9.2

द्वि॒तीयो॒ ग॒ह्यस्तृ॑तीयः॒ कि॒ञ्शिल॑श्चतु॒र्थो व॒न्यः पञ्च॑मस्तेभ्यो॒
यदा॑हु॒तीर्न जु॒हुया॑द॒ध्वर्यु॑ च॒ यज॑मानं च॒ प्र द॑हेयुर्यदे॒ता
आ॑हु॒तीर्जु॒होति॑ भा॒गधे॑ये॒नैवैना॑ञ्छमयति॒ नाऽऽ*ति॒माच्छ॑त्यद॒ध्वर्यु॑र्न
यज॑मानो॒ वाङ्म॑ आ॒सन् न॒सोः प्रा॒णोऽक्ष्यो॑श्चक्षुः॒ कर्ण॑योः॒ श्रोत्रं॑
बा॒हुवो॑र्बल-मू॒रुवो॑रोजोऽरि॒ष्टा वि॒श्वान्य॑ङ्गानि॒ तनू॑ – [] 38

TS 5.5.9.3

-स्त॒नुवा॑ मे स॒ह नम॑स्ते अस्तु॒ मा मा॑ हि॒ञ्सीर॑प॒ वा ए॒तस्मा॑त्
प्रा॒णाः क्रा॑मन्ति॒ योऽग्निं॑ चि॒न्वन्न॑धि॒ क्रा॑मति॒ वाङ्म॑ आ॒सन् न॒सोः
प्रा॒ण इ॒त्याह॑ प्रा॒णाने॒वा*ऽऽत्म॑न् ध॒त्ते यो॒ रु॒द्रो अ॒ग्नौ यो॒ अ॒प्सु

य ओषधीषु यो रुद्रो विश्वा भुवनाऽऽविवेश तस्मै रुद्राय नमो
अस्त्वाहुतिभागा वा अन्ये रुद्रा हविर्भागा – [] 39

TS 5.5.9.4

अन्ये शतरुद्रीयं हुत्वा गावीधुकं चरुमेतेन यजुषा चरमायामिष्टकायां
नि दद्ध्याद्-भागधेयेनैवैनं शमयति तस्य त्वै शतरुद्रीयं
हुतमित्याहुर्यस्यैतदग्नौ क्रियत इति वसवस्त्वा रुद्रैः पुरस्तात् पान्तु
पितरस्त्वा यमराजानः पितृभिर्दक्षिणतः पान्त्वादित्यास्त्वा विश्वैर्देवैः
पश्चात् पान्तु द्युतानस्त्वा मारुतो मरुद्भिरुत्तरतः पातु – [] 40

TS 5.5.9.5

देवास्त्वेन्द्रज्येष्ठा वरुणराजानो ऽधस्ताच्चो-परिष्ठाच्च पान्तु
न वा एतेन पूतो न मेद्ध्यो न प्रोक्षितो यदेनमतः प्राचीनं प्रोक्षति
यथ् संचितमाज्येन प्रोक्षति तेन पूतस्तेन मेद्ध्यस्तेन प्रोक्षितः ॥ 41

(दुध - स्तनू - हविर्भागाः - पातु - द्वात्रिंशच्च) (A9)

TS 5.5.10.1

समीची नामासि प्राची दिक्तस्यास्ते ऽग्निरधिपति रसितो रक्षिता
यश्चाधिपति र्यश्च गोप्ता ताभ्यां नमस्तौनो मृडयतां ते यं द्विष्मो यश्च

नो॒ द्वेष्टि॒ तं॒ वाँ॒ जंभे॑ द॒धाम्यो॑ज॒स्विनी॑ नामा॒सि दक्षि॑णा दिक्
तस्या॑स्त इन्द्रोऽधि॑पतिः पृ॒दाकुः॑ प्राची॒ नामा॑सि प्र॒तीची॑
दिक् तस्या॑स्ते – [] 42

TS 5.5.10.2

सोमोऽधि॑पतिः स्व॒जो ऽव॒स्थावा॒ नामा॒स्युदी॑ची दिक् तस्या॑स्ते
वरु॑णोऽधि॑पति-स्ति॒रश्च॑ रा॒जि-र॑धि॒पत्नी॑ नामा॒सि बृ॒हती॑ दिक् तस्या॑स्ते
बृ॒हस्प॑ति-र॑धि॒पतिः॑ श्वि॒त्रो व॒शिनी॑ नामा॒सीयं॑ दिक् तस्या॑स्ते
यमोऽधि॑पतिः क॒ल्माष॑ ग्री॒वो रक्षि॑ता यश्चाधि॑पति॒ र्यश्च॑ गो॒प्ता ताभ्यां॑
नम॑स्तौ नो मृ॒डय॑तां ते यं द्वि॒ष्मो यश्च॑ – [] 43

TS 5.5.10.3

नो॒ द्वेष्टि॒ तं॒ वाँ॒ जंभे॑ द॒धाम्ये॑ता वै दे॒वता॑ अ॒ग्निं चि॒तꣳ रक्ष॑न्ति
ताभ्यो॑ यदाहु॒तीर्न जुहु॑याद॒ध्वर्युं॑ च यज॑मानं च ध्या॒येयु॑र्यदे॒ता
आहु॑तीर्जु॒होति॑ भा॒गधे॑र्येनै-वैनाञ्छ॑मयति॒ नाऽऽ*ति॑माच्छ॑त्यद॒ध्वर्युर्न॑
यज॑मानो हे॒तयो॑ नाम स्थ॒ तेषां॑ वाँः पु॒रो गृ॒हा अ॒ग्निर्व॑ इष॒वः
सलि॑लो नि॒लिं॒पा नाम॑ – [] 44

TS 5.5.10.4

स्थ॑ तेषां॑ँ वो दक्षि॑णा गृ॒हाः पि॒तरो॑ व इ॒षवः॑ स॒गरो॑ वज्रि॑णो नाम॑ स्थ
 तेषां॑ँ वः प॒श्चाद् गृ॒हाः स्व॒प्नो व इ॒षवो॑ ग॒ह्वरो॑ ऽव॒स्थावा॑नो नाम॑ स्थ
 तेषां॑ँ व उत्त॑राद् गृ॒हा आ॒पो व इ॒षवः॑ स॒मुद्रो॑-ऽधि॑पतयो नाम॑ स्थ
 तेषां॑ँ व उप॑रि गृ॒हा वर्॒षं व इ॒षवो॑ऽव॒स्वान् क्र॒व्या नाम॑ स्थ
 पार्थि॑वा-स्तेषां॑ँ व इ॒ह गृ॒हा - [] 45

TS 5.5.10.5

अन्नं॑ँ व इ॒षवो॑ ऽनि॒मिषो॑ वा॒तना॑मं तेभ्यो॑ वो न॒मस्ते॑ नो मृ॒डय॑त
 ते यं द्वि॒ष्मो यश्च॑ नो द्वेष्टि॑ तं वो॑ ज॒म्भे द॑धामि हु॒तादो॑ वा अ॒न्ये दे॒वा
 अ॒हुता॑दोऽन्ये॑ ता॒नग्नि॑चिदे॒वोभ्या॑न् प्री॒णाति॑ द॒ध्ना म॑धुमि॒श्रेणै॑ता
 आ॒हुती॑र्जुहोति॑ भा॒गधे॑येनै॒वैनान्॑ प्री॒णात्य॑थो ख॒ल्वाहु॑रिष्ट॒का वै दे॒वा
 अ॒हुता॑द इत्य॑ - [] 46

TS 5.5.10.6

-नु॒परि॑क्रामं जु॒होत्य॑परि॒वर्गमे॒वैनान्॑ प्री॒णाती॑म॒ स्तन॑मूर्ज॒स्वन्तं॑
 धया॑पां प्र॒प्यात॑मग्ने स॒रिर॑स्य म॒द्ध्ये ।
 उ॒थ्सं जु॑षस्व॒ मधु॑मन्तमूर्व॒ समु॑द्रि॒यं स॑दन॒मा वि॑शस्व ॥

यो वा अ॒ग्निं प्र॒युज्य न वि॒मुञ्चति॑ यथाऽ॒श्वो यु॒क्तोऽवि॒मुच्य॑मानः
क्षु॒द्ध्यन् परा॒भवत्ये॒वमस्या॒ग्निः परा॑ भवति तं परा॒भवन्तं य॑ज॒मानोऽनु॑
परा॑ भवति सोऽ॒ग्निं चित्वा लू॒क्षो – [] 47

TS 5.5.10.7

भव॒तीम॑ स्तन॒मूर्ज॑स्वन्तं धया॒पामित्या॑ज्यस्य पूर्णा॑ सु॒चं जु॒होत्ये॒ष
वा अ॒ग्नेर्वि॒मोको॑ वि॒मुच्यै॒वास्मा॑ अन्नमपि दधाति तस्मा॑दाहु॒र्यश्चै॒वं
वे॒द यश्च॑ न सु॒धाय॑ ह वै वा॒जी सु॒हितो॑ दधातीत्य॒ग्निर्वा॒व वा॒जी
तमे॒व तत् प्री॑णाति स ए॒नं प्री॑तः प्री॒णाति॑ वसी॒यान् भवति॑ () ॥ 48

(प्र॒तीची॑ दि॒क्तस्या॑स्ते-द्वि॒ष्मो यश्च॑-नि॒लिम्पा॑ ना-मे॒ ह गृ॒हा-इति॑-
लू॒क्षो-वसी॑यान् भवति) (A10)

TS 5.5.11.1

इन्द्रा॑य रा॒ज्ञे सू॒करो॑ वरु॒णाय॑ रा॒ज्ञे कृ॒ष्णो य॒माय॑ रा॒ज्ञ ऋ॒श्य ऋ॒षभा॑य
रा॒ज्ञे ग॒वयः॑ शा॒र्दूला॑य रा॒ज्ञे गौ॒रः पु॒रुष॑रा॒जाय॑ म॒र्कटः॑ क्षिप्र॒श्येन॑स्य
वर्ति॑का नील॒ङ्गोः क्रि॒मिः सोम॑स्य रा॒ज्ञः कु॒लुङ्गः॑ सि॒न्धोः
शि॒शु॒मारो॑ हि॒मव॑तो ह॒स्ती ॥ 49 (इन्द्रा॑य रा॒ज्ञे-ऽष्टा॑वि॒शतिः)
(A11)

TS 5.5.12.1

म॒युः प्रा॒जाप॒त्य ऊ॒लो ह॒लीक्ष्णो॑ वृष॒द॒ञ्शस्ते॑ धा॒तुः सर॑स्वत्यै
शा॒रिः श्ये॑ता पु॒रुष॒वाख् सर॑स्वते शु॒कः श्ये॑तः पु॒रुष॒वागा॑र॒ण्योऽजो॑
नकु॒लः शका॑ ते पौ॒ष्णा वा॒चे क्रौञ्चः॑ ॥ 50

(म॒यु – स्त्रयो॑वि॒ञ्शतिः॑) (A12)

TS 5.5.13.1

अपां॑ न॒प्त्रे जषो॑ ना॒क्रो म॒करः कु॒लीक॑यस्तेऽकू॒पा॒रस्य॑ वा॒चे
पैङ्ग॒राजो॑ भगा॒य कु॒षीत॑क आ॒ती वा॒हसो॑ दर्वि॒दा ते वा॒यव्या॑
दिग्भ्यश्च॑क्रवा॒कः ॥ 51

(अपा॑ – मे॒कान्न॑वि॒ञ्शतिः॑) (A13)

TS 5.5.14.1

बला॑याजगर आ॒खुः सृ॒जया॑ शय॒ण्डक॑स्ते मै॒त्रा मृ॒त्यवे॑ऽसि॒तो
मन्य॑वे॒ स्वजः॑ कुं॒भीन॑सः पु॒ष्कर॑सा॒दो लो॑हि॒ताहि॑स्ते त्वाष्ट्राः
प्रति॑श्रु॒त्कायै॑ वा॒हसः॑ ॥ 52

(बला॑या – षा॒दश॑) (A14)

TS 5.5.15.1

पुरु॒षमृ॒गश्च॒न्द्रम॑से गो॒धा का॒लका॑ दा॒र्वाघा॑टस्ते वन॒स्पती॑नामे॒ण्यहे॒
कृ॒ष्णो रा॒त्रियै॑ पि॒कः क्षि॒वङ्का॑ नी॒लशी॑र्ष्णी ते॒ऽर्य॒म्णे धा॒तुः
क॒त्कटः॑ ॥ 53

(पुरु॒षमृ॒गौ- ष्ठा॑द॒श) (A15)

TS 5.5.16.1

सौरी॑ ब॒लाक॑श्यो म॒यूरः॑ श्ये॒नस्ते॑ ग॒न्धर्वा॑णां व॒सूनां॑ क॒पिञ्ज॑लो
रु॒द्राणां॑ ति॒त्तिरी॑ रो॒हित् कु॑ण्ड॒णाची॑ गो॒लत्ति॑का ता अ॒प्सर॑सा-
म॒रण्या॑य सृ॒मरः॑ ॥ 54

(सौ-र्य॑ष्टा॒दश) (A16)

TS 5.5.17.1

पृ॒षतो॑ वै॒श्वदे॑वः पि॒त्वो न्य॒ङ्कुः॑ क॒शस्ते॑ऽनु॒मत्या॑ अ॒न्यवा॑पोऽ॒र्धमा॑सानां
मा॒सां क॒श्यपः॑ क्वयिः॑ कु॒टरु॑र्दात्यौहस्ते॑ सि॒नीवा॑ल्यै बृ॒हस्प॑तये
शि॒त्पुटः॑ ॥ 55

(पृ॒षतो॑- ष्ठा॑द॒श) (A17)

TS 5.5.18.1

श॒का भौ॒मी पा॒न्त्रः क॒शो मा॒न्थी॒लव॒स्ते पि॒तृ॒णामृ॒तूनां ज॒ह॒का
सँ॒व॒त्स॒राय॒ लो॒पा क॒पोत॒ उ॒लूकः॒ श॒शस्ते॒ नैर्ऋ॒ताः कृ॒क॒वाकुः॑
सा॒वि॒त्रः ॥ 56

(श॒का - ऽष्टा॑द॒श) (A18)

TS 5.5.19.1

रु॒रु रौ॒द्रः कृ॒क॒ला॒सः श॒कुनिः॒ पि॒प्प॒का ते श॒र॒व्यायै॑ ह॒रि॒णो मा॒रुतो॑
ब्र॒ह्म॒णे शा॒र्गस्तर॒क्षुः कृ॒ष्णः श्वा च॑तु॒रक्षो॑ ग॒र्दभ॒स्त इ॒तर॒जनाना॑म॒ग्नये॒
॥
धू॒ङ्क्षणा॑ ॥ 57

(रु॒रु - वि॒ंश॑तिः) (A19)

TS 5.5.20.1

अ॒ल॒ज आ॒न्तरि॒क्ष उ॒द्रो म॒दुः प्ल॒वस्ते॑ऽपाम॒दित्यै॑ ह॒स॒साचि॑रि॒न्द्राण्यै॑
की॒र्शा गृ॒द्ध्रः शि॒ति॒क॒क्षी वा॑र्द्ध्रा॒णस॒स्ते दि॒व्या द्या॒वापृ॑थि॒व्या
॥
श्वा॒वित् ॥ 58

(अ॒ल॒जो - ऽष्टा॑द॒श) (A20)

TS 5.5.21.1

सु॒पर्णः॑ पा॒र्जन्यो॑ ह॒सो वृ॒को वृ॒षद॒शस्त॑ ऐ॒न्द्रा अ॒पामु॒द्रो॑ ऽर्य॒म्णे
लो॒पाशः॑ सि॒हो न॒कुलो॑ व्या॒घ्रस्ते॑ महे॒न्द्राय॑ का॒माय॑ पर॒स्वान् ॥ 59

(सु॒पर्णो॑ – ऽष्टा॒दशः॑) (A21)

TS 5.5.22.1

आ॒ग्नेयः॑ कृ॒ष्णाग्री॑वः सा॒रस्व॑ती मे॒षी ब॒भ्रुः सौ॒म्यः पौ॒ष्णः श्या॒मः
शि॒तिपृ॒ष्ठो बा॒र्हस्प॑त्यः शि॒ल्पो वै॒श्वदे॑व ऐ॒न्द्रोऽरु॑णो मा॒रुतः॑ क॒ल्माष॑
ऐ॒न्द्रा॒ग्नः स॒हितो॑ ऽधो॒रामः॑ सा॒वित्रो॑ वा॒रुणः॑ पे॒त्वः ॥ 60

(आ॒ग्नेयो॑ – द्वावि॒ंशतिः॑) (A22)

TS 5.5.23.1

अ॒श्वस्तू॒परो॑ गो॒मृग॑स्ते प्रा॒जाप॑त्या आ॒ग्नेयौ॑ कृ॒ष्णाग्री॑वौ त्वा॒ष्ट्रौ
लो॒मश॑स॒क्थौ शि॒तिपृ॒ष्ठौ बा॒र्हस्प॑त्यौ धा॒त्रे पृ॒षोद॑रः सौ॒र्यो
ब॒लक्षः॑ पे॒त्वः ॥ 61

(अ॒श्वः – षोड॑शः) (A23)

TS 5.5.24.1

अ॒ग्नये॑ऽनी॒कव॑ते रोहि॒ताज्जि॑रन॒ड्वान॑धो॒रामौ॑ सावि॒त्रौ पौ॒ष्णौ
र॒जत॑ना॒भी वै॒श्वदे॑वौ पि॒शङ्गौ॑ तू॒परौ॑ मा॒रुतः॑ क॒ल्माष॑ आ॒ग्नेयः॑
कृ॒ष्णोऽजः॑ सा॒रस्व॑ती मे॒षी वा॒रुणः॑ कृ॒ष्ण एक॑शितिपा॒त् पे॒त्वः ॥ 62

(अ॒ग्नये॑ – द्वा॒विंश॑तिः) (A24)

Prasna Korvai with starting Padams of 1 to 24 Anuvaakams :-

(यदे॑केन – प्र॒जाप॑तिः प्रे॒णाऽनु॑ – यजु॒षा – ऽऽपो॑ – वि॒श्वक॑र्मा –
ऽग्न॑ आ या॒हि – सु॒वर्गा॑य वज्रो – गा॒यत्रे॑णा – ग्न॑ उद॒धे – समी॑ची
– न्द्रा॑य – म॒यु – र॒पां – ब॒लाय॑ – पु॒रुष॑मृ॒गः – सौ॒री – पृ॒षतः॑ –
श॒का – रु॒रु – र॒त्नजः॑ – सु॒पर्ण॑ – आ॒ग्नेयो॑ – ऽश्वो॑ –
ऽग्नये॑ऽनी॒कव॑ते – चतु॑र्विंशतिः)

Korvai with starting Padams of 1, 11, 21 Series of Panchaatis :-

(यदे॑केन – स पा॒पीया॑ – ने॒तद्वा॑ अ॒ग्ने – र्ध॒नुस्त॑द् –
दे॒वास्त्वेन्द्र॑ज्ये॒ष्ठा – अ॒पां न॒प्त्रे – ऽश्व॑स्तू॒परो॑ – द्वि॒षष्टिः॑)

First and Last Padam of Fifth Prasnam of 5th Kandam

(यदेके – नैकशित्तिपात् पेत्वः)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे पञ्चमः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

5.6 पञ्चमकाण्डे षष्ठः प्रश्नः – उपानुवाक्याभिधानं

TS 5.6.1.1

हिरण्यवर्णाः शुचयः पावका यासु जातः कश्यपो यास्विन्द्रः ।
अग्निं या गर्भं दधिरे विरूपास्ता न आपः श७ स्योना भवन्तु ॥
यासां राजा वरुणो याति मध्ये सत्यानृते अवपश्यन् जनानां ।
मधुश्रुतः शुचयो याः पावकास्ता न आपः श७ स्योना भवन्तु ॥
यासां देवा दिवि कृण्वन्ति भक्षं या अन्तरिक्षे बहुधा भवन्ति ।
याः पृथिवीं पयसोन्दन्ति – [] 1

TS 5.6.1.2

शुक्रास्ता न आपः श७ स्योना भवन्तु ॥
शिवेन मा चक्षुषा पश्यताऽऽपः शिवया तनुवोप स्पृशत त्वचं मे ।
सर्वा अग्नीं रप्सुषदो हुवे वो मयि वर्चो बलमोजो नि धत्त ॥
यददः सं प्रयतीरहा वनदताहते ।

तस्मा॒दा न॒द्यो॑ नाम॒ स्थ॒ ता वो॒ नामा॑नि॒ सिन्ध॑वः ॥

यत् प्रे॑षिता॒ वरु॑णेन॒ ताः शी॑भ॒ सम॑वल्गात । 2

TS 5.6.1.3

तदा॑प्नो॒-दिन्द्रो॑ वो॒ यती॑-स्तस्मा॒-दापो॑ अनु॒ स्थन॑ ॥

अप॑काम॒ स्य॑न्दमाना॒ अवी॑वरत वो॒ हिकं॑ ।

इन्द्रो॑ वः शक्ति॑भि दे॒वी-स्तस्मा॑द्-वा॒र्णामि॑ वो॒ हितं॑ ॥

एको॑ दे॒वो अप्य॑तिष्ठथ् स्य॑न्दमाना॒ यथा॑ व॒शं ।

उदा॑निषु-र्मही॑रिति॒ तस्मा॑-दुद॒क-मु॑च्यते ॥

आपो॑ भ॒द्रा घृ॑तमिदाप॒ आसु॑र॒ग्नी-षोमौ॑ बिभ्र॒त्याप॒ इत् ताः॑ ।

ती॒व्रो रसो॑ मधु॒पृचा॑ - [] 3

TS 5.6.1.4

-मर॑ंगम॒ आ मा॑ प्रा॒णेन॑ सह॒ वर्च॑सा गन् ॥

आदि॑त् प॒श्याम्यु॑त वा शृ॒णोम्या॑ मा॒ घोषो॑ गच्छति॒ वाङ् आ॑सां ।

मन्ये॑ भेजा॒नो अ॒मृत॑स्य॒ तर्हि॑ हि॒रण्य॑वर्णा॒ अतृ॑पं य॒दा वः॑ ॥

आपो॑ हि॒ ष्ठा म॒यो भु॒वस्ता॑ न ऊ॒र्जे द॑धातन ।

महे रणा॒य चक्ष॑से ॥

यो वः शि॒वत॑मो र॒सस्त॑स्य भाज॒यते॑ह नः ।

उ॒शती॑रिव मा॒तरः () ॥

तस्मा॒ अरं॑ ग॒माम॑ वो यस्य क्षया॒य जि॒न्वथ॑ ।

आपो॑ जन॒यथा॑ च नः ॥

दि॒वि श्र॑य स्वा॒न्तरि॑क्षे यतस्व पृ॒थि॒व्या सं भ॑व ब्र॒ह्मव॑र्च-स॒मसि॑

ब्र॒ह्मव॑र्चसा॒य त्वा ॥ 4 (उ॒दन्ति॑ - स॒मव॑ल्गात - म॒धुपृ॑चां - मा॒तरो॑

- द्वाविं॑शतिश्च} (A1)

TS 5.6.2.1

अपां॑ ग॒रहान्॑ गृ॒ह्णात्ये॒तद्वा॒व रा॒जसू॑यं य॒देते॑ ग॒रहाः॑ स॒वो ऽग्नि॑र्व॒रुण॑स॒वो

रा॒जसू॑य-म॒ग्निस॑व-श्चि॒त्यस्ता॑भ्या-मे॒व सू॑यतेऽथो॑ उ॒भावे॑व लो॒काव॑भि

ज॒यति॑ यश्च॑ रा॒जसू॑ये॒नेजा॑नस्य यश्चा॒ग्नि॑चित॒ आपो॑ भव॒न्त्यापो॑ वा

अ॒ग्नेर्भा॑तृ॒व्या यद॑पो॒ ऽग्ने॑रध॒स्तादु॑प॒ दधा॑ति॒ भ्रातृ॑व्याभि॒भूत्यै॑

भ॒वत्या॑त्म॒ना प॑राऽस्य॒ भ्रातृ॑व्यो भव॒त्यमृतं॑ - [] 5

TS 5.6.2.2

ॐ॒ वा॒ आप॒स्तस्मा॑-द॒द्भिर॑व॒तान्त॑-म॒भि षि॑ञ्चन्ति॒ नाऽऽ*ति॑मा॒च्छति॑
 सर्व॑मा॒युरेति॑ य॒स्यैता॑ उप॒धीय॑न्ते॒ य उ॑ चै॒ना ए॒वं ॐ॒ वेदा॑न्नं॒ ॐ॒ वा आपः॑
 प॒शव॑ आपोऽन्नं॑ प॒शवोऽन्ना॑दः प॒शुमान्॑ भवति॒ य॒स्यैता॑ उप॒धीय॑न्ते
 य उ॑ चै॒ना ए॒वं ॐ॒ वेद॑ द्वा॒दश॑ भवन्ति॒ द्वा॒दश॑ मा॒साः स॑व॒थ्सरः॑
 स॑व॒थ्सरे॒णैवा॑स्मा - [] 6

TS 5.6.2.3

अ॒न्नम॑व रु॒न्धे पा॒त्राणि॑ भवन्ति॒ पात्रे॑ वा अ॒न्नम॑द्यते॒ सयौ॑न्ये॒वान्न॑मव
 रु॒न्ध आ द्वा॒दशा॑त् पु॒रुषा॑द॒न्न-म॒त्यथो॑ पा॒त्रान्न॑ छिद्यते॒ य॒स्यैता॑
 उप॒धीय॑न्ते॒ य उ॑ चै॒ना ए॒वं ॐ॒ वेद॑ कुं॒भाश्च॑ कुं॒भीश्च॑ मि॒थुना॑नि॒ भवन्ति॑
 मि॒थुन॑स्य प्र॒जात्यै॑ प्र प्र॒जया॑ प॒शुभि॑-र्मि॒थुनै॑-र्जा॒यते॑ य॒स्यैता॑
 उप॒धीय॑न्ते॒ य उ॑ - [] 7

TS 5.6.2.4

चै॒ना ए॒वं ॐ॒ वेद॑ शु॒गवा॑ अ॒ग्निः सौ॑ऽध्व॒र्युं य॑ज॒मानं॑ प्र॒जाः
 शु॒चाऽर्प॑यति॒ यदप॑ उप॒दधा॑ति॒ शुच॑मे॒वास्य॑ शमयति॒
 नाऽऽ*ति॑मा॒च्छत्य॑ध्व॒र्युर्न॑ यज॒मानः॑ शा॒म्यन्ति॑ प्र॒जा य॒त्रैता॑ उप॒धीय॑न्ते

ऽपां॑ वा॒ ए॒ता॒नि॒ हृ॒द॒या॒नि॒ य॒दे॒ता॒ आ॒पो॒ य॒दे॒ता॒ अ॒प॒ उ॒प॒द॒धा॒ति॒
दि॒व्या॒भि॒रे॒वै॒नाः॒ स॒ꣳ सृ॒ज॒ति॒ व॒र्षु॒कः॒ प॒र्ज॒न्यो॒ – [] 8

TS 5.6.2.5

भ॒व॒ति॒ यो॒ वा॒ ए॒ता॒सा॒मा॒य॒त॒नं॒ क्लृ॒प्तिं॒ वै॒दा॒ऽऽ*य॒त॒न॒वा॒न् भ॒व॒ति॒
क॒ल्प॒ते॒ ऽस्मा॒ अनु॒सी॒त॒मु॒प॒ द॒धा॒त्ये॒त॒द्वा॒ आ॒सा॒मा॒य॒त॒न॒मे॒षा॒ क्लृ॒प्ति॒र्य॒
ए॒वं॒ वै॒दा॒ऽऽ*य॒त॒न॒वा॒न् भ॒व॒ति॒ क॒ल्प॒ते॒ऽस्मै॒ द्वं॒द्व॒म॒न्या॒ उ॒प॒ द॒धा॒ति॒
च॒त॒स्रो॒ म॒द्ध्ये॒ धृ॒त्या॒ अ॒न्नं॒ वा॒ इ॒ष्ट॒का॒ ए॒तत्॒ ख॒लु॒ वै सा॒क्षा॒द॒न्नं॒
य॒दे॒ष च॒रु॒र्य॒दे॒तं॒ च॒रु॒मु॒प॒ द॒धा॒ति॒ सा॒क्षा॒ – [] 9

TS 5.6.2.6

दे॒वा॒स्मा॒ अ॒न्न॒म॒व॒ रु॒न्धे॒ म॒द्ध्य॒त॒ उ॒प॒ द॒धा॒ति॒ म॒द्ध्य॒त॒ ए॒वा॒स्मा॒ अ॒न्नं॒
द॒धा॒ति॒ त॒स्मा॒न् म॒द्ध्य॒तो॒ऽन्न॒म॒द्य॒ते॒ बा॒र्ह॒स्प॒त्यो॒ भ॒व॒ति॒ ब्र॒ह्म॒ वै दे॒वा॒नां॒
बृ॒ह॒स्प॒ति॒-ब्र॒ह्म॒णै॒वा॒स्मा॒ अ॒न्न॒म॒व॒ रु॒न्धे॒ ब्र॒ह्म॒व॒र्च॒स॒म॒सि॒
ब्र॒ह्म॒व॒र्च॒सा॒य॒ त्वे॒त्या॒ह॒ ते॒ज॒स्वी॒ ब्र॒ह्म॒व॒र्च॒सी॒ भ॒व॒ति॒ य॒स्यै॒ष उ॒प॒धी॒य॒ते॒
य॒ उ॒ चै॒न॒मे॒वं॒ वै॒द॒ ॥ 10

(अ॒मृत॑ – म॒स्मै – जा॒य॒ते॒ य॒स्यै॒ता – उ॒प॒धी॒य॒न्ते॒ य॒ उ॒ – प॒र्ज॒न्य॑ –
उ॒प॒द॒धा॒ति॒ सा॒क्षा॒थ् – स॒प्त॒च॒त्वा॒रि॒ꣳश॒च्च॑) (A2)

TS 5.6.3.1

भू॒ते॒ष्ट॒का॒ उप॑ द॒धा॒त्य॒त्रा॒त्र वै मृ॒त्यु॒र्जा॒यते॑ य॒त्रय॒त्रैव॑ मृ॒त्यु॒र्जा॒यते॑
त॒त ए॒वैन॒मव॑ यज॒ते तस्मा॑द॒ग्नि॒चि॒त् सर्व॑मा॒युरे॒ति सर्वे॑ ह्य॒स्य
मृ॒त्यवो॑ ऽवे॒ष्टास्त॒स्मा-द॒ग्नि॒चि॒त्रा-भि॑च॒रित॒वै प्र॒त्यगे॑न-म॒भिचा॑रः
स्तृ॒णु॒ते सू॒यते॑ वा ए॒ष यो॑ऽग्निं चि॒नु॒ते दे॒वसु॒वामे॒तानि॑ ह॒वी॒षि
भ॒वन्त्ये॒ताव॒न्तो वै दे॒वाना॑ऽ स॒वास्त॑ ए॒वा - [] 11

TS 5.6.3.2

-स्मै स॒वान् प्र॑ य॒च्छन्ति॑ त ए॒नऽ सु॒वन्ते स॒वो॑ऽग्नि॒र्वरु॑ण॒सवो॑
रा॒ज॒सूयं॑ ब्र॒ह्म॒स॒वश्चि॒त्यो दे॒वस्य॑ त्वा स॒वितुः॑ प्र॒स॒व इ॒त्याह॑
स॒वि॒तृप्र॑सू॒त ए॒वैनं॑ ब्र॒ह्म॒णा दे॒वता॑भि॒रभि॑ षि॒ञ्च॒त्यन्न॑-स्या॒न्नस्या॑भि
षि॒ञ्च॒त्यन्न॑-स्या॒न्नस्या॑-वरु॒द्ध्यै पु॒रस्ता॑त् प्र॒त्यञ्च॑म॒भि षि॑ञ्चति
पु॒रस्ता॑द्धि प्र॒ती॒ची-न॒मन्न॑म॒द्यते॑ शी॒र्षतो॑ऽभि षि॒ञ्च॒ति शी॒र्षतो॑
ह्य॒न्नम॑द्य॒त आ॑ मु॒खाद॑न्व॒वस्रा॑वयति - [] 12

TS 5.6.3.3

मु॒खत॑ ए॒वास्मा॑ अ॒न्नाद्यं॑ द॒धा॒त्य॒ग्नेस्त्वा॑ सा॒म्राज्ये॑ना॒भि
षि॒ञ्चा॒मीत्या॑हैष॒ वा अ॒ग्नेः स॒वस्ते॒नैवैन॑म॒भि षि॑ञ्चति बृ॒हस्प॑ते॒स्त्वा

साम्राज्येनाभिषिञ्चामीत्याह ब्रह्म वै देवानां बृहस्पतिर्ब्रह्मणैवैनमभि
षिञ्चतीन्द्रस्य त्वा साम्राज्येनाभिषिञ्चा-मीत्याहेन्द्रियमेवास्मि-
न्नुपरिष्ठाद् दधात्ये त - [] 13

TS 5.6.3.4

-द्वै राजसूयस्य रूपं य एवं विद्वानग्निं चिनुत उभावेव लोकावभि
जयति यश्च राजसूयेनेजानस्य यश्चाग्निचित इन्द्रस्य सुषुवाणस्य
दशधेन्द्रियं वीर्यं पराऽपतत् तद्देवाः सौत्रामण्या समभरन्थ् सूयते
वा एष योऽग्निं चिनुतेऽग्निं चित्वा सौत्रामण्या यजेतेन्द्रियमेव
वीर्यं संभृत्याऽऽत्मन् धत्ते ॥ 14

(त एवा - न्ववसावयत्ये - त - दष्टाचत्वारिंशच्च) (A3)

TS 5.6.4.1

सजूरब्दोऽयावभिः सजूरुषा अरुणीभिः सजूः सूर्य एतशेन
सजोषावश्विना दसोभिः सजूरग्निर्वैश्वानर इडाभिर्घृतेन स्वाहा
सँवथ्सरो वा अब्दो मासा अयावा उषा अरुणी सूर्य एतश इमे
अश्विना सँवथ्सरोऽग्निर्वैश्वानरः पशव इडा पशवो घृतं

सँव॒थ्स॒रं प॒शवोऽनु॒ प्र जा॑यन्ते सँव॒थ्स॒रेणै॒वास्मै॑ प॒शून्
प्र॒ज॒न॒य॒ति द॒र्भस्त॑म्बे जु॒होति॑ य - [] 15

TS 5.6.4.2

-द्वा अ॒स्या अ॒मृतं॑ यँद्-वी॒र्यं॑ तद्-द॒र्भास्त॑स्मिन् जु॒होति॑ प्रैव जा॑यते
ऽन्ना॒दो भ॑वति य॒स्यै॒वं जु॒ह्वत्ये॒ता वै दे॒वता॑ अ॒ग्नेः पु॒रस्ता॑द्भा॒गास्ता॑
ए॒व प्री॑णा॒त्यथो॒ चक्षु॑रे॒वाग्नेः॑ पु॒रस्ता॑त् प्र॒ति द॒धात्य॑न॒न्धो भ॑वति य
ए॒वं वे॒दाऽऽ*पो॒ वा इ॒दम॑ग्रे स॒लिल॑मा॒सीथ् स प्र॒जाप॑तिः पु॒ष्कर॑प॒र्णे
वा॒तो भू॑तोऽले॒लाय॑थ् सः - [] 16

TS 5.6.4.3

प्र॒तिष्ठां॑ नाऽवि॒न्दत॑ स ए॒तद॒पां कु॒लाय॑मप॒श्यत् तस्मि॑न्न॒ग्निम॑चि॒नुत॑
तदि॒यम॑भवत् ततो॒ वै स प्र॑त्य॒तिष्ठ॑द्यां पु॒रस्ता॑दु॒पा-द॑धात् तच्छि॒रो
ऽभव॑थ् सा प्रा॒ची दि॒ग्यां दक्षि॑णत उ॒पाद॑धाथ् स दक्षि॑णः प॒क्षोऽभव॑थ्
सा दक्षि॑णा दि॒ग्यां पश्चा॑-दु॒पाद॑धात् तत् पु॒च्छम॑भवथ् सा प्र॒तीची॑
दि॒ग्यामु॑त्तरत उ॒पाद॑धाथ् - [] 17

TS 5.6.4.4

स उत्तरः पक्षोऽभवत् सोदीची दिग्यामुपरिष्ठा-दुपादधात् तत्
 पृष्ठमभवत् सोर्ध्वा दिगियं वा अग्निः पञ्चैष्टक-स्तस्माद्-यदस्यां
 खनन्त्यभीष्टकां तृन्दन्त्यभि शर्कराञ् सर्वा वा इयं वयोभ्यो नक्तं
 दृशे दीप्यते तस्मादिमां वयाञ्सि नक्तं नाद्ध्यासते य एवं
 विद्वानग्निं चिनुते प्रत्येव - [] 18

TS 5.6.4.5

तिष्ठत्यभि दिशो जयत्याग्नेयो वै ब्राह्मणस्तस्माद्-ब्राह्मणाय सर्वासु
 दिक्ष्वर्धुकञ् स्वामेव तद्-दिशमन्वेत्यपां वा अग्निः कुलाय
 तस्मादापोऽग्निञ् हारुकाः स्वामेव तद्-योनिं प्रविशन्ति ॥ 19

(यद- लेलायत् स-उत्तरत उपादधा-देव - द्वात्रिंशच्च) (A4)

TS 5.6.5.1

सँवथ्सरमुख्यं भृत्वा द्वितीये सँवथ्सर आग्नेयमष्टाकपालं
 निर्वपेदैन्द्र-मेकादशकपालं वैश्वदेवं द्वादशकपालं बार्हस्पत्यं चरुं
 वैष्णवं त्रिकपालं तृतीये सँवथ्सरेऽभिजिता यजेत यदष्टाकपालो
 भवत्यष्टाक्षरा गायत्र्याग्नेयं गायत्रं प्रातस्सवनं प्रातस्सवनमेव

तेन दाधार गायत्रीं छन्दो यदेकादशकपालो भवत्येकादशाक्षरा
 त्रिष्टुगैन्द्रं त्रैष्टुभं माद्ध्यन्दिनं सवनं माद्ध्यन्दिनमेव सवनं तेन
 दाधार त्रिष्टुभं – [] 20

TS 5.6.5.2

छन्दो यद्-द्वादशकपालो भवति द्वादशाक्षरा जगती वैश्वदेवं जागतं
 तृतीयसवनं तृतीयसवनमेव तेन दाधार जगतीं छन्दो
 यद्-बार्हस्पत्यश्चरुर्भवति ब्रह्म वै देवानां बृहस्पतिर्ब्रह्मैव
 तेन दाधार यद्-वैष्णवस्त्रिकपालो भवति यज्ञो वै विष्णुर्यज्ञमेव
 तेन दाधार यत् तृतीये सँवथ्सरेऽभिजिता यजतेऽभिजित्यै
 यथ् सँवथ्सरमुख्यं बिभर्तीममेव – [] 21

TS 5.6.5.3

तेन लोकं स्पृणोति यद् द्वितीये सँवथ्सरेऽग्निं चिनुतेऽन्तरिक्षमेव
 तेन स्पृणोति यत् तृतीये सँवथ्सरे यजतेऽमुमेव तेन लोकं
 स्पृणोत्येतं वै पर आट्णारः कक्षीवाँ औशिजो वीतहव्यः
 श्रायसस्त्रसदस्युः पौरुकुथ्स्यः प्रजाकामा अचिन्वत ततो वै ते

स॒हस्र॑ꣳस॒हस्रं॑ पु॒त्रान॑विन्दन्त॒ प्रथ॑ते प्र॒जया॑ प॒शुभि॑स्तां मा॒त्रामा॑प्नोति
यां तेऽग॑च्छन् य एवं () वि॒द्वाने॒तम॑ग्निं चि॒नुते॑ ॥ 22

(दा॒धार॑ त्रि॒ष्टुभ॑ - मि॒ममे॑वै - वं - च॒त्वारि॑ च) (A5)

TS 5.6.6.1

प्र॒जाप॑तिर॒ग्निम॑चिनुत॒ स क्षु॑रपविर्भू॒त्वाऽति॑ष्ठत् तं दे॒वा बि॑भ्यतो
नोपाऽऽ*यन् ते छन्दो॑भिरा॒त्मानं॑ छादयित्वा॒पाऽऽ*यन् तच्छ॑न्दसां
छन्द॑स्त्वं ब्र॒ह्म वै छन्दा॑ꣳसि ब्र॒ह्मण॑ ए॒तद्-रूपं॑ यत् कृ॒ष्णाजि॑नं
का॒र्ष्णी उ॒पान॑हावुप॒ मुञ्च॑ते छन्दो॑भिरेवाऽऽ*त्मानं॑ छादयित्वाऽग्निमुप॑
चर॑त्या॒त्मनो॑ऽहिꣳसायै दे॒वनि॑धिर्वा ए॒ष नि धी॑यते यद॒ग्नि - [] 23

TS 5.6.6.2

-र॒न्ये वा वै नि॒धिम॑गुप्तं वि॒न्दन्ति॒ न वा प्र॑ति प्र॒ जाना॑त्यु॒खामा॑
क्रा॒मत्या॑त्मानमे॒वाधि॑पां कुरुते गु॒प्त्या अथो॑ ख॒ल्वाहु॑र्नाऽऽक्र॑म्येति
नैर्ऋ॒त्युखा॑ यदाक्रामे॒न्निर्ऋ॑त्या आ॒त्मान॑मपि दद॑ध्यात्
तस्मा॑न्नाऽऽक्र॑म्या पु॒रुष॑शीर्षमुप॑ दधाति गु॒प्त्या अथो॑ यथा॑
ब्रू॒यादे॑तन्मे गोपा॒येति॑ तादृ॒गेव॑ तत् - [] 24

TS 5.6.6.3

प्र॒जाप॑ति॒र्वा अ॒थ॒र्वा ऽग्नि॑रे॒व द॒द्ध्य॑ङ्ग॒थर्व॑णस्तस्येष्ट॑का
अ॒स्थान्ये॒त॒ ह वा॒व तद्-ऋ॑षि॒रभ्य॑नू॒वाचे॑न्द्रो द॒धी॒चो अ॒स्थभि॑रिति
यदिष्ट॑काभि॒रग्निं॑ चि॒नोति॑ सा॒त्मान॑मे॒वाग्निं॑ चि॒नुते॑ सा॒त्मा मु॒ष्मिन् लो॒के
भ॒वति॑ य ए॒वं वे॒द शरी॑रं वा ए॒तद् अ॒ग्नेर्य॑च्चि॒त्य आ॒त्मा वै॒श्वान॑रो
यच्चि॒ते वै॒श्वान॑रं जु॒होति॑ शरी॒रमे॒व स॒ ऽस्कृ॑त्या - [] 25

TS 5.6.6.4

-भ्या॑रो॒हति॑ शरी॒रं वा ए॒तद्-य॑ज॒मानः॑ स॒ ऽस्कु॑रुते यद॒ग्निं चि॒नुते॑
यच्चि॒ते वै॒श्वान॑रं जु॒होति॑ शरी॒रमे॒व स॒ ऽस्कृ॑त्या ऽऽ*॒त्मना॑ ऽभ्या॑रो॒हति॑
तस्मा॑त् तस्य॒ नाव॑ द्यन्ति जी॒वन्ने॒व दे॒वान॑प्येति वै॒श्वान॑र्यर्चा पु॒रीष॑मुप
द॒धाती॑यं वा अ॒ग्निर्वै॒श्वान॑रस्तस्यै॒षा चि॒तिर्य॑त् पु॒रीष॑म॒ग्निमे॒व
वै॒श्वान॑रं चि॒नुत ए॒षा वा अ॒ग्नेः () प्रि॒या त॒नूर्य॑द्-वै॒श्वान॑रः
प्रि॒यामे॒वास्य॑ त॒नुव॑म॒व रु॒न्धे ॥ 26

(अ॒ग्नि - स्त॒थ् - स॒ ऽस्कृ॑त्या - ग्ने - दर्श॑ च) (A6)

TS 5.6.7.1

अ॒ग्नेर्वै दी॒क्षया॑ दे॒वा वि॒राज॑मा॒प्नुवन्॑ ति॒स्रो रा॒त्रीर्दी॑क्षितः स्यात्
 त्रि॒पदा॑ वि॒राड् वि॒राज॑मा॒प्नोति॑ षड्-रा॒त्रीर्दी॑क्षितः स्यात् षड् वा
 ऋ॒तवः॑ सँव॒थ्सरः॑ सँव॒थ्सरो॑ वि॒राड् वि॒राज॑मा॒प्नोति॑ द॒श रा॒त्रीर्दी॑क्षितः
 स्याद्-द॒शाक्ष॑रा वि॒राड् वि॒राज॑मा॒प्नोति॑ द्वा॒दश रा॒त्रीर्दी॑क्षितः स्याद्
 द्वा॒दश मा॑साः सँव॒थ्सरः॑ सँव॒थ्सरो॑ वि॒राड् वि॒राज॑मा॒प्नोति॑ त्रयो॒दश
 रा॒त्रीर्दी॑क्षितः स्यात् त्रयो॒दश - [] 27

TS 5.6.7.2

मा॑साः सँव॒थ्सरः॑ सँव॒थ्सरो॑ वि॒राड् वि॒राज॑मा॒प्नोति॑ पञ्च॒दश
 रा॒त्रीर्दी॑क्षितः स्यात् पञ्च॒दश वा अ॒र्धमा॑सस्य रा॒त्रयोऽर्ध॑मा॒सशः॑
 सँव॒थ्सर आ॑प्यते सँव॒थ्सरो॑ वि॒राड् वि॒राज॑मा॒प्नोति॑ सप्त॒दश
 रा॒त्रीर्दी॑क्षितः स्याद् द्वा॒दश मा॑साः पञ्च॒र्तवः॑ स सँव॒थ्सरः॑
 सँव॒थ्सरो॑ वि॒राड् वि॒राज॑मा॒प्नोति॑ चतुर्विं॒शति॑ रा॒त्रीर्दी॑क्षितः
 स्या-च॒तुर्विं॒शति॑र॒र्धमा॑साः सँव॒थ्सरः॑ सँव॒थ्सरो॑ वि॒राड्
 वि॒राज॑मा॒प्नोति॑ त्रिं॒शत॑ रा॒त्रीर्दी॑क्षितः स्यात् - [] 28

TS 5.6.7.3

त्रि॒ंश॒दक्ष॒रा वि॒राड् वि॒राज॑मा॒प्नोति॑ मा॒सं दी॒क्षितः॑ स्याद्-यो मा॒सः
स सँ॑व॒थ्सरः॑ सँ॑व॒थ्सरो वि॒राड् वि॒राज॑मा॒प्नोति॑ च॒तुरो॑ मा॒सो दी॒क्षितः॑
स्या॑च्च॒तुरो॑ वा ए॒तं मा॒सो व॑स॒वोऽबि॑भ॒रुस्ते॑ पृ॒थि॒वीमा॑ऽज॒यन् गाय॑त्रीं
छन्दो॑ऽष्टौ रु॒द्रास्ते॑-ऽन्तरि॑क्ष॒माऽज॒यन् त्रि॒ष्टुभं॑ छन्दो॑ द्वा॒दश-
ऽऽदि॒त्यास्ते॑ दि॒वमा॑ऽज॒यन् जग॑तीं छन्द॒स्ततो॑ वै ते ()
व्यावृ॑त-म॒गच्छ॑ञ्छ्रै॒ष्यं दे॒वानां॑ तस्मा॑द् द्वा॒दश॑ मा॒सो भृ॒त्वाऽग्निं॑
चिन्वी॑त द्वा॒दश॑ मा॒साः सँ॑व॒थ्सरः॑ सँ॑व॒थ्सरो॑ -ऽग्नि॑श्चित्य॒स्तस्या॑-
हो॒रात्रा॑णी॒ष्टका॑ आ॒प्तेष्ट॑कमे॒नं चि॒नुते॑ऽथो॑ व्यावृ॑तमे॒व गच्छ॑ति
श्रै॒ष्यं स॒माना॑नां ॥ 29 (स्या॑त् त्रयो॑दश - त्रि॒ंश॒तं रा॒त्रीर्दी॑क्षितः
स्या॑द् - वै ते॑ - ऽष्टा॒विंश॑तिश्च) (A7)

TS 5.6.8.1

सु॒वर्गा॒य वा ए॒ष लो॒काय॑ ची॒यते॑ यद॒ग्नि॒स्तं य॑न्नान्वा॒रोह॑थ्
सु॒वर्गा॒ल्लो॒काद्-य॑ज॒मानो॑ ही॒येत॑ पृ॒थि॒वीमा॑ऽक्र॒मिषं॑ प्रा॒णो मा॒ मा
हा॒सीद॒न्तरि॑क्ष॒माऽक्र॒मिषं॑ प्र॒जा मा॒ मा हा॒सीद्-दि॒वमा॑ऽक्र॒मिषं॑

सुव॒रग॒न्मेत्या॒हैष॒ वा अ॒ग्नेर॒न्वारो॒हस्तेनै॒वैन॒-म॒न्वारो॒हति॒ सुव॒र्गस्य॑
लो॒कस्य॑ स॒मष्ट्यै॒ यत् प॒क्षस॒मि॒तां मि॒नुयात् - [] 30

TS 5.6.8.2

कनी॒याऽसं॑ य॒ज्ञक्र॒तुमु॒पेयात्॑ पा॒पीय॑स्यस्या ऽऽत्म॒नः प्र॒जा
स्याद्-वे॒दिस॒मि॒तां मि॒नोति॒ ज्याया॑ऽसमे॒व य॒ज्ञक्र॒तुमु॒पैति॒
नास्याऽऽ*त्म॒नः पा॒पीय॑सी प्र॒जा भ॑वति सा॒हस्रं॑ चि॒न्वीत॑ प्रथ॒मं
चि॒न्वानः॑ स॒हस्र॑स॒मि॒तो वा अ॒यं लो॒क इ॒ममे॒व लो॒कम॒भि ज॑यति
द्वि॒षाह॑स्रं चि॒न्वीत॑ द्वितीयं चि॒न्वानो॑ द्वि॒षाह॑स्रं वा अ॒न्तरि॑क्ष-
म॒न्तरि॑क्षमे॒वाभि॑ ज॒यति॒ त्रि॒षाह॑स्रं चि॒न्वीत॑ तृतीयं चि॒न्वान - [] 31

TS 5.6.8.3

-स्त्रि॒षाह॑स्रो वा अ॒सौ लो॒को ऽमु॒मेव लो॒कम॒भि ज॑यति जा॒नुद॒घ्नं
चि॒न्वीत॑ प्रथ॒मं चि॒न्वानो॑ गा॒यत्रि॒यैवे॒मं लो॒कम॒भ्यारो॑हति ना॒भिद॒घ्नं
चि॒न्वीत॑ द्वितीयं चि॒न्वान॑स्त्रि॒ष्टुभै॒वा-न्तरि॑क्ष-म॒भ्यारो॑हति ग्री॒वद॒घ्नं
चि॒न्वीत॑ तृतीयं चि॒न्वानो॑ जग॒त्यैवा॒मुन् लो॒कम॒भ्यारो॑हति ना॒ग्निं
चि॒त्वा रा॒मामु॑पे॒यादयो॒नौ रे॒तो धा॒स्यामी॒ति न द्वि॒तीयं चि॒त्वाऽन्य॑स्य
स्त्रि॒य - [] 32

TS 5.6.8.4

-मु॒पे॒या॒न्न तृ॒तीयं॑ चि॒त्वा कां॑ च॒नोपे॒याद्-रेतो॑ वा ए॒तन्नि ध॑त्ते यद॒ग्निं
चि॒नुते॑ यदु॒पे॒याद्-रेत॑सा व्यृ॒द्ध्येता॑ऽथो ख॒ल्वाहु॑र प्रज॒स्यं तद्-
यन्नोपे॒यादि॑ति यद्-रेत॑स्सिचावुप॒दधा॑ति ते ए॒व यज॑मानस्य
रेतो॑ बिभृ॒तस्त॑स्मा-दु॒पे॒याद्-रेत॑सो-ऽस्क॑न्दाय त्रीणि॒ वाव रेता॑ऽसि
पि॒ता पु॒त्रः पौ॒त्रो - [] 33

TS 5.6.8.5

यद् द्वे रे॒तस्सिचा॑वुप॒दद्ध्याद्-रेतो॑ऽस्य वि॒च्छिन्धा॑त् ति॒स्र उप॑ दधाति
रेत॑सः संत॒त्या इ॒यं वा॒व प्र॑थ॒मा रे॒तस्सिग् वा॒ग्वा इ॒यं तस्मा॑त्
प॒श्यन्ती॑मां प॒श्यन्ति॑ वाचं॒ वद॑न्तीमन्तरि॒क्षं द्वि॒तीया॑ प्रा॒णो वा
अन्तरि॑क्षं तस्मा॒न्नाऽन्तरि॑क्षं प॒श्यन्ति॑ न प्रा॒णम॒सौ तृ॒तीया॑ चक्षु॒र्वा
अ॒सौ तस्मा॑त् प॒श्यन्त्य॒मूं प॒श्यन्ति॑ चक्षु॒र्यजु॑षे॒मां चा - [] 34

TS 5.6.8.6

-मूं चोप॑ दधाति॒ मन॑सा म॒द्ध्यमा॑मेषां॒ लो॒कानां॑ क्लृ॒प्त्या अ॒थो
प्रा॒णाना॑मिष्टो य॒ज्ञो भृ॑गुभि॒राशी॑र्दा वसु॒भिस्त॑स्य त इ॒ष्टस्य॑ वी॒तस्य॑
द्र॒विणे॑ह भक्षी॒येत्या॑ह स्तु॒तश॒स्त्रे ए॒वैते॑न दु॒हे पि॒ता मा॒तरि॑श्चाऽच्छि॒द्रा

पदा धा अच्छिद्रा उशिजः पदाऽनु तक्षुः सोमो विश्वविन्नेता
 नेषद्-बृहस्पतिरुक्थामदानि शऽसिषदित्याहैतद्वा () अग्नेरुक्थं
 तेनैवैनमनु शऽसति ॥ 35

(मि॒नु॒यात् - तृ॒तीयं॑ चि॒न्वानः॑ - स्त्रि॒यं - पौ॒त्र - श्व - वै -
 सप्त॑ च) (A8)

TS 5.6.9.1

सू॒यते॑ वा ए॒षोऽग्नी॑नां य उ॒खायां॑ भ्रि॒यते॑ यद॒धः सा॒दये॒द्-गर्भाः॑
 प्र॒पादु॑काः स्यु॒रथो॑ यथा स॒वात् प्र॒त्यव॑रोहति तादृ॒गेव॑ तदा॒सन्दी
 सा॒दय॑ति गर्भा॒णां धृ॒त्या अ॒प्रपा॑दायाथो स॒वमे॒वैनं॑ करोति गर्भो॒ वा
 ए॒ष यदु॑ख्यो योनिः शि॒क्यं यच्छि॒क्यादु॑खां नि॒रूहे॒द्-योने॒र्गर्भं॑
 निर्॒हण्या॑थ षडु॒द्याम॑ शि॒क्यं भव॑ति षोढा वि॒हितो॑ वै - [] 36

TS 5.6.9.2

पु॒रुष आ॒त्मा च शि॒रश्च॑ च॒त्वार्य॑ङ्गान्या॒त्मन्ने॒वैनं॑ बि॒भर्ति॑ प्र॒जाप॑तिर्वा
 ए॒ष यद॒ग्निस्त॑स्यो॒खा चो॒लूख॑लं च स्तनौ ताव॑स्य प्र॒जा उप॑ जी॒वन्ति॑
 यदु॑खां चो॒लूख॑लं चो॒पद॑धाति ताभ्यामे॒व यज॑मानोऽमु॒ष्मिन्

लो॒केऽग्निं॑ दु॒हे सँव॑त्सरो वा ए॒ष यद॒ग्निस्त॑स्य त्रेधाविहि॒ता इ॒ष्टकाः॑
प्राजाप॒त्या वै॑ष्णवी – [] 37

TS 5.6.9.3

वै॒श्वक॑र्मणी-रहो॒रात्रा॑ण्येवा॒स्य प्राजा॑पत्या यदु॒ख्यं बि॒भर्ति॑ प्राजाप॒त्या
ए॒व तदु॑प ध॒त्ते यथ् स॒मिध॑ आ॒दधा॑ति वै॒ष्णवा॑ वै वन॒स्पत॑यो
वै॒ष्णवी॒रेव॑ तदु॑प ध॒त्ते यदि॑ष्टकाभि॒रग्निं॑ चि॒नोती॑यं वै वि॒श्वक॑र्मा
वै॒श्वक॑र्मणी॒रेव॑ तदु॑प ध॒त्ते तस्मा॑-दाहु-स्त्रि॒वृद॒ग्निरि॑ति तं वा ए॒तं
य॑ज॒मान॑ ए॒व चि॑न्वीत यद॒स्यान्य॑ () श्रि॒नुया॑द्यत् तं दक्षि॒णाभि॑र्न
रा॒धये॑द॒ग्निम॑स्य वृ॒ञ्जीत॑ योऽस्या॒ग्निं चि॑नुयात् तं दक्षि॒णाभी॑
रा॒धये॑द॒ग्निमे॒व तथ् स्पृ॑णोति ॥ 38

(षो॒ढावि॒हितो॒ वै – वै॑ष्णवी – र॒न्यो – वि॒श्रु॑तिश्च) (A9)

TS 5.6.10.1

प्रजा॑पति-र॒ग्नि-म॑चि॒नुत॑र्तुभिः सँव॑त्सरं व॒सन्ते॑नैवा॒स्य
पूर्वा॑र्धम॑चि॒नुत॑ ग्री॒ष्मेण॑ दक्षि॒णं प॒क्षं व॑र्षाभिः पु॒च्छं श॒रदो॑त्तरं
प॒क्षं हे॑म॒न्तेन॑ म॒द्ध्यं ब्र॑ह्म॒णा वा अ॑स्य तत् पूर्वा॑र्धम॑चि॒नुत॑ क्ष॒त्रेण॑

दक्षिणं पक्षं पशुभिः पुच्छं विशोत्तरं पक्षमाशया मद्ध्यं य एवं
विद्वानग्निं चिनुत ऋतुभिरेवैनं चिनुतेऽथो एतदेव सर्वमव - [] 39

TS 5.6.10.2

रुन्धे शृण्वन्त्येनमग्निं चिक्रयानमत्यन्नं रोचत इयं वाव
प्रथमा चित्तिरोषधयो वनस्पतयः पुरीषमन्तरिक्षं द्वितीया
वयांसि पुरीषमसौ तृतीया नक्षत्राणि पुरीषं यज्ञश्चतुर्थी
दक्षिणा पुरीषं यजमानः पञ्चमी प्रजा पुरीषं यत् त्रिचितीकं
चिन्वीत यज्ञं दक्षिणामात्मानं प्रजामन्तरियात् तस्मात्
पञ्चचितीकश्चेतव्य एतदेव सर्वं स्पृणोति यत्

तिस्रश्चितय - [] 40

TS 5.6.10.3

-स्त्रिवृद्ध्यग्निर्यद् द्वे द्विपाद्-यजमानः प्रतिष्ठित्यै पञ्च चितयो
भवन्ति पाङ्क्तः पुरुष आत्मानमेव स्पृणोति पञ्च चितयो भवन्ति
पञ्चभिः पुरीषैरभ्यूहति दश सं पद्यन्ते दशाक्षरो वै पुरुषो यावानेव
पुरुषस्तं स्पृणोत्यथो दशाक्षरा विराडन्नं विराड् विराज्येवान्नाद्ये
प्रति तिष्ठति सँवत्सरो वै षष्ठी चितिर्ऋतवः पुरीषं () षट्

चितयो भवन्ति षट् पुरीषाणि द्वादश सं पद्यन्ते द्वादश मासाः
सँवत्सरः सँवत्सर एव प्रति तिष्ठति ॥ 41

(अव - चितयः - पुरीषं - पञ्चदश च) (A10)

TS 5.6.11.1

रोहितो धूम्रोहितः कर्कन्धुरोहितस्ते प्राजापत्या बभ्रुररुणबभ्रुः
शुकबभ्रुस्ते रौद्राः श्येतः श्येताक्षः श्येतग्रीवस्ते पितृदेवत्यास्तिस्रः
कृष्णा वशा वारुण्यस्तिस्रः श्वेता वशाः सौर्यो मैत्राबार्हस्पत्या
धूम्रललामास्तूपराः ॥ 42

(रोहितः - षड्विंशतिः) (A11)

TS 5.6.12.1

पृश्नि-स्तिरश्चीन-पृश्निरूर्ध्व-पृश्निस्ते मारुताः फल्गूलोहितोर्णी
बलक्षी ताः सारस्वत्यः पृषती स्थूलपृषती क्षुद्रपृषती ता
वैश्वदेव्यस्तिस्रः श्यामा वशाः पौष्णियस्तिस्रो रोहिणीर्वशा मैत्रिय
ऐन्द्राबार्हस्पत्या अरुणललामास्तूपराः ॥ 43

(पृश्निः - षड्विंशतिः) (A12)

TS 5.6.13.1

शिति॑बाहु॒-र॒न्यत॑रिशि॒तिबाहुः॑ सम॒न्त शि॑तिबाहु॒स्त ऐ॑न्द्रवा॒यवाः
शि॒तिर॒न्ध्रो ऽन्य॑तरिशि॒तिर॒न्ध्रः सम॑न्तशि॒तिर॒न्ध्रस्ते॑ मै॒त्रावरु॑णाः
शु॒द्धवा॑लः स॒र्वशु॑द्धवा॒लो म॒णिवा॑लस्त आ॒श्विना॑स्ति॒स्रः शि॒ल्या व॒शा
वै॒श्वदे॑व्यस्ति॒स्रः श्ये॑नीः परमे॒ष्ठिने॑ सोमापौ॒ष्णाः
श्या॒मल॑लामास्तू॒पराः ॥ 44

(शि॒तिबाहुः॑ पञ्चविं॑शतिः) (A13)

TS 5.6.14.1

उ॒न्नत॑ ऋष॒भो वा॑मनस्त ऐ॒न्द्रावरु॑णाः शि॒तिक॑कुच्छि॒तिपृ॑ष्ठः
शि॒तिभ॑सत् त ऐ॒न्द्राबा॑र्हस्प॒त्याः शि॒तिपा॑च्छि॒त्योष्ठः॑ शि॒तिभ्रु॑स्त
ऐ॒न्द्रावै॑ष्णावास्ति॒स्रः सि॒द्ध्मा व॒शा वै॒श्वक॑र्म॒ण्यस्ति॒स्रो धा॒त्रे पृ॑षो॒दरा
ऐ॒न्द्रापौ॑ष्णाः श्ये॑तललामास्तू॒पराः ॥ 45

(उ॒न्नतः॑ पञ्चविं॑शतिः) (A14)

TS 5.6.15.1

कर्णा॑स्त्रयो॑ या॒माः सौ॒म्यास्त्रयः॑ श्वि॒तिङ्गा॑ अ॒ग्नये॑ यवि॒ष्ठाय॑ त्रयो॑
नकु॒लास्ति॒स्रो रोहि॑णीस्त्र्यव्य॒स्ता वसू॑नां ति॒स्रोऽरु॑णा दि॒त्यौह्य॑स्ता
रु॒द्राणां॑ सोमै॒न्द्रा ब॒भ्रुल॑लामास्तूपराः ॥ 46

(कर्णा॑स्त्रयो – वि॒शतिः॑) (A15)

TS 5.6.16.1

शु॒ण्ठास्त्रयो॑ वै॒ष्णवा॑ अधी॒लो॒धकर्णा॑स्त्रयो वि॒ष्णव॑ उरु॒क्रमा॑य
लफ्सु॒दिन॑स्त्रयो वि॒ष्णव॑ उरु॒गाया॑य पञ्चा॒वीस्ति॒स्र आ॑दि॒त्यानां॑
त्रि॒व॒थ्सा-स्ति॒स्रो-ऽङ्गि॑र॒सामै॒न्द्रावै॒ष्णवा॑ गौ॒रल॑लामास्तूपराः ॥ 47

(शु॒ण्ठा – वि॒शतिः॑) (A16)

TS 5.6.17.1

इन्द्रा॑य रा॒ज्ञे त्रयः॑ शि॒तिपृ॑ष्ठा इन्द्रा॑या-धि॒राजा॑य त्रयः॑ शि॒तिक॑कु॒द
इन्द्रा॑य स्वरा॒ज्ञे त्रयः॑ शि॒तिभ॑स-दस्ति॒स्रस्तु॒र्यौह्यः॑ सा॒द्ध्यानां॑ ति॒स्रः
प॒ष्ठौह्यो॑ वि॒श्वेषां॑ दे॒वाना॑माग्ने॒न्द्राः कृ॑ष्णल॑लामास्तूपराः ॥ 48

(इन्द्रा॑य रा॒ज्ञे – द्वावि॒शतिः॑) (A17)

TS 5.6.18.1

अ॒दि॒त्यै॒ त्रयो॑ रो॒हि॒तै॒ता इ॒न्द्रा॒ण्यै॒ त्रयः॑ कृ॒ष्णै॒ताः कु॒ह्वै॑
त्रयो॑ऽरु॒णै॒तास्ति॒स्रो धे॒नवो॑ रा॒कायै॑ त्रयो॑ऽन॒ड्वाहः॑ सि॒नीवा॒ल्या
आ॒ग्ना॒वैष्ण॒वा रो॒हि॒तल॒लामा॒स्तूप॒राः ॥ 49

(अ॒दि॒त्या-अ॒ष्टाद॒श) (A18)

TS 5.6.19.1

सौ॒म्यास्त्र॑यः पि॒शंगाः॑ सो॒माय॑ रा॒ज्ञे त्रयः॑ सा॒रङ्गाः॑ पा॒र्जन्या॑
नभो॑रूपास्ति॒स्रोऽजा॑ म॒ल्हा इ॒न्द्रा॒ण्यै ति॒स्रो मे॒ष्य आ॒दि॒त्या
द्या॒वापृ॑थि॒व्या मा॒लंगा॑स्तूप॒राः ॥ 50

(सौ॒म्या - ए॒कान्न॑वि॒ंशतिः॑) (A19)

TS 5.6.20.1

वा॒रुणा॑स्त्र॒यः कृ॒ष्णल॑ला॒मा व॒रुणाय॑ रा॒ज्ञे त्रयो॑ रो॒हि॒तल॒लामा॑ व॒रुणाय॑
रि॒शाद॑से त्रयो॑ऽरु॒णल॑ला॒माः शि॒ल्पास्त्र॑यो वै॒श्वदे॒वास्त्र॑यः पृ॒श्नयः॑
सर्व॑दे॒वत्या॑ ऐ॒न्द्रासू॒राः श्ये॑तल॒लामा॑स्तूप॒राः ॥ 51

(वा॒रुणा - वि॒ंशतिः॑) (A20)

TS 5.6.21.1

सो॒माय॑ स्वर॒ज्ञे-॑ऽनो॒वा॒हा॒व॒न॒ड्वा॒हा-॑वि॒न्द्रा॒ग्नि॒भ्या-॑
मो॒जो॒दा॒भ्यामु॒ष्टा॒रा-॑वि॒न्द्रा॒ग्नि॒भ्यां॑ ब॒ल॒दा॒भ्यां॑ सी॒र॒वा॒हा॒व॒वी द्वे
धे॒नू भौ॒मी दि॒ग्भ्यो॑ वड॒बे द्वे॑ धे॒नू भौ॒मी वै॒रा॒जी पु॒रु॒षी द्वे॑ धे॒नू
भौ॒मी व॒यव॑ आ॒रो॒ह॒ण॒वा॒हा॒व॒न॒ड्वा॒हौ वा॒रु॒णी कृ॒ष्णे व॒शे अ॒रा॒ड्यौ
दि॒व्यावृ॑ष॒भौ परि॒मरौ॑ ॥ 52

(सो॒माय॑ स्वर॒ज्ञे - चतु॑स्त्रिं॒शत्) (A21)

TS 5.6.22.1

एका॒दश॑ प्रा॒तर्ग॒व्याः प॒शव॑ आ ल॒भ्यन्ते॑ छ॒गलः॑ क॒ल्मा॒षः
कि॒कि॒दी॒वि॒र्वि॒दी॒ग॒य॒स्ते त्वा॒ष्ट्राः सौ॒री॒र्न॒व श्वे॒ता व॒शा अ॒नू॒ब॒न्ध्या
भ॒व॒न्त्या॒ग्ने॒य ऐ॒न्द्रा॒ग्न आ॒श्वि॒न॒स्ते वि॒शा॒ल॒यू॒प आ ल॒भ्यन्ते॑ ॥ 53

(ऐ॒का॒द॒श प्रा॒तः - पञ्च॑विं॒शतिः॑) (A22)

TS 5.6.23.1

पि॒शङ्गा॑स्त्रयो॒ वास॑न्ताः सा॒रङ्गा॑स्त्रयो॒ ग्रैष्माः॑ पृष॒न्तस्त्रयो॑
वा॒र्षि॒काः पृ॒श्न॒यस्त्रयः॑ शा॒र॒दाः पृ॒श्नि॒स॒क्था॑स्त्रयो॒ है॒म॒न्ति॒का
अ॒व॒लि॒प्ता॑स्त्रयः॒ शै॒शि॒राः सँ॒व॒त्स॒रा॒य नि॒व॒क्ष॒सः ॥ 54

(पिशङ्गा - विंशतिः) (A23)

Special Korvai for Anuvaakam 12 to 20

रो॒हि॒तः कृ॒ष्णा धू॒म्रल॒लामाः - पृ॒श्निः श्या॒मा अ॒रुण॒ल॒लामाः -
शि॒तिबा॒हुः शि॒ल्पाः श्ये॒नीः श्या॒मल॒लामा - उ॒न्नतः सि॒द्ध्मा धा॒त्रे
पौ॒ष्णाः श्ये॒तल॒लामाः - क॒र्णा ब॒भ्रुल॒लामाः - शु॒ण्ठा गौ॒रल॒लामा -
इ॒न्द्राय कृ॒ष्णाल॒लामा - अ॒दित्यै रो॒हित ल॒लामः -
सौ॒म्या मा॒लङ्गा - वा॒रुणाः सू॒राः श्ये॒तल॒लामा - द॒श ।

Prasna Korvai with starting Padams of 1 to 23 Anuvaakams :-

(हि॒र॒ण्यव॒र्णा - अ॒पां ग्र॒हान् - भू॒तेष्ट॒काः - स॒जूः - सँ॒व॒त्स॒रं -
प्र॒जाप॒तिः स क्षु॒रप॒वि - र॒व॒ग्नेर्वै दी॒क्षया - सु॒व॒र्गाय तं यँ॒न्न -
सू॒यते - प्र॒जाप॒तिर् ऋ॒तुभी - रो॒हितः - पृ॒श्निः - शि॒तिबा॒हु -
रु॒न्नतः - क॒र्णाः - शु॒ण्ठा - इ॒न्द्राया - दि॒त्यै - सौ॒म्या - वा॒रुणाः
- सो॒मायै - का॒द॒श - पि॒शङ्गा - स्त्रयो॒विं॒शतिः)

Korvai with starting Padams of 1, 11, 21 Series of Panchaatis :-

(हिरण्यवर्णा - भूतेष्टकाः - छन्दो यत् - कनीयाऽसन्-
त्रिवृद्ध्यग्नि - वारुणा - श्रुतुष्पञ्चाशत्)

First and Last Padam of Sixth Prasnam of 5th Kandam

(हिरण्यवर्णा - निवक्षसः)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे षष्ठः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

5.7 पञ्चमकाण्डे सप्तमः प्रश्नः—उपानुवाक्यावशिष्टकर्मनिरूपणं

TS 5.7.1.1

यो वा अ॒य॒था॒दे॒व॒त॒म॒ग्निं॑ चि॒नु॒त आ दे॒व॒ता॒भ्यो॑ वृ॒श्च॒य॒ते पा॒पी॒या॒न्
भव॒ति यो य॒था॒दे॒व॒तं॑ न दे॒व॒ता॒भ्य आ वृ॒श्च॒य॒ते व॒सी॒या॒न् भव॒त्याग्ने॒य्या
गा॒य॒त्रि॒या प्र॒थ॒मां चि॒ति॒म॒भि मृ॒शे॒त् त्रि॒ष्टु॒भा द्वि॒ती॒यां जग॑त्या
तृ॒ती॒या॒म॒नु॒ष्टु॒भा च॒तु॒र्थीं प॒ङ्क्त्या॑ पञ्च॒मीं य॒था॒दे॒व॒त॒मे॒वाग्निं॑ चि॒नु॒ते
न दे॒व॒ता॒भ्य आ वृ॒श्च॒य॒ते व॒सी॒या॒न् भव॒ती॒डा॒यै वा ए॒षा वि॒भक्तिः॑ प॒श॒व
इ॒डा प॒शु॒भिरे॒न – [] 1

TS 5.7.1.2

—चि॒नु॒ते यो वै प्र॒जा॒प॒तये॑ प्र॒ति प्रो॒च्याग्निं॑ चि॒नो॒ति नाऽऽ*ति॒मा॒च्छ—
त्य॒श्वा॒व॒भि॒त॒स्ति॒ष्ठेतां॑ कृ॒ष्ण उत्त॑रतः श्वे॒तो दक्षि॑ण॒स्ता॒वा॒ल॒भ्येष्ट॑का उप
द॒द्ध्या॒दे॒त॒द्वै प्र॒जा॒प॒ते रू॒पं प्रा॒जा॒प॒त्योऽश्वः॑ सा॒क्षादे॒व प्र॒जा॒प॒तये॑

प्रति॒प्रो॒च्या॒ग्निं॑ चि॒नोति॑ नाऽऽ*ति॒मा॒र्च्छत्ये॒तद्वा॑ अ॒हो रू॒पं

यच्छ्वे॒तोऽश्वो॑ रा॒त्रियै॑ कृ॒ष्ण ए॒तद॒हो - [] 2

TS 5.7.1.3

रू॒पं य॒दिष्ट॑का रा॒त्रियै॑ पु॒रीष॑मिष्ट॒का उप॑धा॒स्यञ्छ॒वेत॑म॒श्वम॑भि मृ॒शेत्
पु॒रीष॑मुप॒धास्य॑न् कृ॒ष्णम॑हो॒रात्रा॑भ्या॒मेवैनं॑ चि॒नुते॑ हि॒रण्य॑ पा॒त्रं म॒धोः
पू॒र्णं द॑दाति म॒धव्यो॑ऽऽसानीति सौ॒र्या चि॒त्रव॑त्याऽवै॒क्षते॑ चि॒त्रमे॒व भ॑वति
म॒द्ध्यन्दि॑नेऽश्व॒मव॑ घ्रापयत्यसौ वा आ॒दित्य॑ इ॒न्द्र ए॒ष प्र॒जाप॑तिः
प्रा॒जाप॑त्योऽश्व॒स्तमे॒व सा॒क्षादृ॑द्धनोति ॥ 3

(ए॒न - मे॒तद॒हो - ऽष्टा॑च॒त्वारि॑ञ्श॒च्च) (A1)

TS 5.7.2.1

त्वा॒मग्ने॑ वृ॒षभं॑ चे॒कितानं॑ पु॒नर्यु॑वानं॒ जन॑यन्नुपा॒गां ।
अ॒स्थूरि॑ णो गार्॒हप॑त्यानि सन्तु ति॒ग्मेन॑ नो ब्र॒ह्मणा॑ सञ् शि॒शाधि॑ ॥
प॒शवो॑ वा ए॒ते य॒दिष्ट॑काश्चित्यां चि॒त्यामृ॑षभमुप दधाति
मि॒थुन॑मे॒वास्य॑ तद्-य॒ज्ञे करो॑ति प्र॒जन॑नाय तस्माद्-यू॒थेयू॑थ ऋ॒षभः॑ ॥
सँव॒त्सर॑स्य प्रति॒मां यां॑ त्वा रा॒त्र्युपा॑सते ।

प्र॒जा॒ꣳ सु॒वीरां॑ कृ॒त्वा वि॒श्व॒मायु॑र्व्य॒श्नवत्॑ ॥

प्रा॒जाप॒त्या - [] 4

TS 5.7.2.2

—मे॒तामु॑प द॒धाती॑यं वा वै॒षैका॑ष्ट॒का यदे॒वैका॑ष्ट॒काया॑मन्नं
क्रि॒यते॑ तदे॒वैत॑याव रु॒न्ध ए॒षा वै प्र॒जाप॑तेः का॒मदु॑घा तयै॒व
यज॑मा॒नोऽमु॑ष्मिन् लो॒केऽग्निं॑ दु॒हे येन॑ दे॒वा ज्यो॑तिषो॒र्ध्वा
उ॒दाय॑न् येनाऽऽदि॒त्या व॑स॒वो येन॑ रु॒द्राः ।
येनाङ्गि॑र॒सो म॒हिमा॑न—मा॒नशु॑स्तेनै॒तु यज॑मानः स्व॒स्ति ॥

सु॒वर्गा॑य वा ए॒ष लो॒काय॑ - [] 5

TS 5.7.2.3

ची॒यते॑ यद॒ग्निर्ये॑न दे॒वा ज्यो॑तिषो॒र्ध्वा उ॒दाय॑न्नित्यु॒ख्यꣳ स॒मिन्ध॑
इ॒ष्टका॑ ए॒वैता॑ उप॒ धत्ते॑ वा॒नस्प॑त्याः सु॒वर्ग॑स्य लो॒कस्य॑ स॒मष्ट्यै॑
श॒तायु॑धाय श॒तवी॑र्याय श॒तोत॑ये ऽभि॒माति॑षाहे ।
श॒तं यो॑ नः श॒रदो॑ अजी॒तानि॑न्द्रो नेष॒दति॑ दु॒रितानि॑ वि॒श्वा ॥
ये च॒त्वारः॑ प॒थयो॑ दे॒वया॑ना अ॒न्तरा॑ द्यावा॒पृथि॑वी वि॒यन्ति॑ ।
तेषां॑ यो अज्या॒नि— म॒जीति॑—मा॒वहा॑त् तस्मै॑ नो दे॒वाः - [] 6

TS 5.7.2.4

परि॑ दत्ते॒ह सर्वे॑ ॥

ग्री॒ष्मो हे॒मन्त॑ उ॒त नो॑ व॒सन्तः॑ श॒रद् व॒र्षाः सु॒वित॑न्नो अस्तु ।

तेषा॑मृ॒तूनां॑ श॒त शार॑दानां नि॒वात॑ एषा॒मभये॑ स्याम ॥

इ॒दुव॒त्सरा॑य परि॒वत्स॑राय सं॒वँत्स॑राय कृ॒णुता॑ बृ॒हन्न॑मः ।

तेषां॑ व॒यं सु॒मतौ॑ य॒ज्ञिया॑नां ज्यो॒गजी॑ता अ॒हताः॑ स्याम ॥

भ॒द्रान्नः॑ श्रेयः॒ सम॑नैष्ट दे॒वास्त्वया॑ऽव॒सेन॑ सम॒शीम॑हि त्वा ।

स नो॑ म॒यो भूः पि॑तो – [] 7

TS 5.7.2.5

आ वि॒शस्व॑ शं तो॒काय॑ त॒नुवे॑ स्यो॒नः ॥

अ॒ज्यानी॑रेता उ॒प द॑धात्येता वै दे॒वता॑ अ॒परा॑जितास्ता ए॒व प्र वि॑शति

नैव जी॑यते ब्र॒ह्मवा॑दिनो वदन्ति यद॒र्द्धमा॑सा मा॒सा ऋ॒तवः॑ सँव॒त्सर॑

ओष॑धीः प॒चन्त्य॑थ क॒स्माद॑न्याभ्यो दे॒वता॑भ्य आ॒ग्रय॑णं निरु॒प्यत॑

इत्ये॒ता हि तद्-दे॒वता॑ उ॒दज॑यन् यदृ॒तुभ्यो॑ निर्व॒पेद् दे॒वता॑भ्यः स॒मदं॑

द॒ध्यादा॑ग्रयणं () निरु॒प्यैता॑ आ॒हुती॑ र्जु॒होत्य॑र्द्धमा॒साने॒व

मा॒सानृ॒तून्त् सँ॒व॒त्स॒रं प्री॒णा॒ति न दे॒वता॑भ्यः स॒मदं॑ दधाति भ॒द्रान्नः॑
श्रेयः॑ स॒मनै॑ष्ट दे॒वा इ॒त्याह॑ हु॒ताद्या॑य यज॒मान॑स्याऽ*प॒राभा॑वाय ॥ 8

(प्र॒जाप॑त्यां – लो॒काय॑ – दे॒वाः – पि॒तो – द॒ध्यादा॑ग्रयणं –
पञ्च॑विं॒शति॑श्च) (A2)

TS 5.7.3.1

इन्द्र॑स्य वज्रो॑ऽसि वा॒र्त्रघ्न॑स्तनूपा नः॑ प्र॒तिस्प॑शः ।
यो नः॑ पु॒रस्ता॑द् दक्षि॒णतः॑ प॒श्चा-दु॒त्तर॑तो-ऽघा॒युरभि॑दास॒त्येत॑
सोऽश्मान॑मृच्छतु ॥

दे॒वा॒सुराः॑ सँ॒य॒त्ता आ॒सन् ते॑ऽसुरा दि॒ग्भ्य आ॒ऽबा॑धन्त तान् दे॒वा
इ॒ष्वा च॑ वज्रे॑ण चा॒पानु॑दन्त यद्-व॒ज्रिणी॑रुप॒दधा॑तीष्वा चै॒व तद्-
वज्रे॑ण च॒ यज॑मानो भ्रातृ॒व्यान॑प नुदते दि॒क्षूप॑ – [] 9

TS 5.7.3.2

दधाति॑ दे॒वपु॒रा ए॒वैता॑स्तनू॒पानीः॑ पर्यू॒हते॑ ऽग्ना॒विष्णू॑ स॒जोष॑से॒मा
व॒र्द्धन्तु॑ वा॒गिरः॑ ।
द्यु॒म्नैर्वा॑जेभि॒रा ग॑तं ॥

ब्र॒ह्म॒वा॒दि॒नो॑ वद॒न्ति॒ यन्न॑ दे॒वता॑यै जु॒ह्व॒त्यथ॑ किं दे॒व॒त्या
वसो॑र्ध॒रि॒त्यग्नि॑-र्वसु॒स्तस्यै॑षा धा॒रा वि॒ष्णु-र्वसु॒स्तस्यै॑षा धा॒रा॑
ऽऽग्ना॑वैष्ण॒व्यर्चा॑ वसो॑र्ध॒रां॑ जुहोति भा॒ग॒धे॒र्ये॒नै॒वैनौ॑ सम॑र्धयत्यथो॑

एता- [] 10

TS 5.7.3.3

-मे॒वाहु॑ति॒मा॒यत॑नवतीं करोति॒ यत्काम॑ ए॒नां जु॒होति॒ तदे॒वाव॑ रुन्धे
रु॒द्रो वा ए॒ष यद॑ग्निस्तस्यै॒ते त॒नुवौ॑ घो॒राऽन्या॑ शि॒वाऽन्या॑
यच्छ॑त॒रु॒द्री॒यं जु॒होति॒ यैवा॑स्य घो॒रा त॒नूस्तां॑ तेन॑ शमयति॒
यद्-वसो॑र्ध॒रां॑ जुहोति॒ यैवा॑स्य शि॒वा त॒नूस्तां॑ तेन॑ प्रीणाति॒
यो वै वसो॑र्ध॒रायै॑ - [] 11

TS 5.7.3.4

प्रति॑ष्ठां वे॒द प्र॒त्ये॒व ति॑ष्ठति॒ यदा॑ज्यमु॒च्छिष्ये॑त तस्मिन्
ब्र॒ह्मौ॒दनं॑ प॒चेत् तं॑ ब्रा॒ह्म॒णाश्च॒त्वारः॑ प्रा॒श्नी॒युरेष॑ वा
अ॒ग्निर्वै॑श्वा॒नरो॑ यद्ब्रा॒ह्म॒ण ए॒षा खलु॑ वा अ॒ग्नेः प्रि॒या

त॒नूर्य॑द्-वै॒श्वान॑रः प्रि॒याया॑मे॒वैनां॑ त॒नुवां॑ प्र॒ति ष्ठा॑पयति च॒तस्रो॑
धे॒नूर्द॑द्यात् ताभि॒रेव॑ यज॒मानो॑ऽमुष्मिन् लो॒केऽग्निं॑ दु॒हे ॥ 12

(उ॒पै - तां - धा॒रायै - षट्च॑त्वारि॒ंशच्च॑) (A3)

TS 5.7.4.1

चि॒त्तिं जु॑होमि म॒नसा॑ घृ॒तेने॑त्याहा॒दाभ्या॑ वै ना॒मैषाऽऽहु॑तिर्वै॒श्वक॑र्मणी
नैनं॑ चि॒क्या॒नं भ्रा॑तृ॒व्यो द॑भ्नोत्यथो दे॒वता॑ ए॒वाव रु॑न्धे
ऽग्ने॒ तम॑द्येति प॒ङ्क्त्या॑ जु॒होति॑ प॒ङ्क्त्याऽऽहु॑त्या य॒ज्ञमु॑ख॒मा र॑भते
स॒प्त ते अ॒ग्ने स॒मिधः॑ स॒प्तजि॑ह्वा इ॒त्याह॑ हो॒त्रा ए॒वाव रु॑न्धे
ऽग्नि॒र्दे॒वेभ्यो॑ऽपा॒क्राम॑द्-भा॒गधे॑य - [] 13

TS 5.7.4.2

-मि॒च्छ॒मा॒नस्त॑स्मा ए॒तद्-भा॒गधे॑यं प्राय॒च्छन्ने॒तद्वा
अ॒ग्नेर॑ग्निहो॒त्रमे॒तर्हि॒ खलु॑ वा ए॒ष जा॒तो यर्हि॒ सर्व॑श्चितो
जा॒तायै॒वास्मा॑ अ॒न्नम॑पि द॒धाति॑ स ए॒नं प्री॑तः प्री॒णाति॑ व॒सीया॑न्
भव॑ति ब्र॒ह्मवा॑दिनो वदन्ति॒ यदेष॑ गा॒र्हप॑त्यश्ची॒यतेऽथ
क्वा॒स्याऽऽह॑वनी॒य इ॒त्यसा॑वा॒दित्य॑ इति ब्रू॒यादे॒तस्मिन्
हि सर्वा॑भ्यो दे॒वता॑भ्यो जु॒ह्वति॑ - [] 14

TS 5.7.4.3

य ए॒वं वि॒द्वान॒ग्निं चि॒नुते सा॒क्षादे॒व दे॒वता ऋ॒द्ध्नो॒त्यग्ने॑
यश॒स्विन् यश॒से म॒मर्प॑येन्द्रा॒वती म॒पचि॑ती मिहाऽऽव॒ह ।
अ॒यं मू॒र्धा पर॑मे॒ष्ठी सु॒वर्चाः॑ स॒माना॑नामु॒त्तम॑ श्लो॒को अ॒स्तु ॥
भ॒द्रं प॒श्यन्त॒ उप॒ सेदु॒रग्रे॒ तपो॑ दी॒क्षामृ॑षयः सु॒वर्वि॑दः ।
ततः॑ क्ष॒त्रं ब॒लमो॑जश्च जा॒तं तद॒स्मै दे॒वा अ॒भि सं न॑मन्तु ॥
धा॒ता वि॒धाता॑ पर॒मो – [] 15

TS 5.7.4.4

–त स॒न्दृक् प्र॒जाप॑तिः पर॒मे॒ष्ठी वि॒राजा॑ ॥
स्तो॒माः छ॒न्दाँ॒सि नि॒विदो॑ म आ॒हुरेत॒स्मै रा॒ष्ट्रम॒भि सं न॑माम ॥
अ॒भ्याव॑र्त॒द्ध्वमु॒प मे॒त सा॒कम॑यँ श॒स्ताऽधि॑पतिर्वो अ॒स्तु ।
अ॒स्य वि॒ज्ञान॑मनु सँ र॒भद्ध्व॑मिमं प॒श्चादनु॑ जी॒वाथ॒ सर्वे॑ ॥
रा॒ष्ट्रभृ॑त ए॒ता उप॑ दधात्येषा वा अ॒ग्नेश्चि॑ती रा॒ष्ट्रभृ॑त् तयै॒वास्मिन् रा॒ष्ट्रं
दधा॑ति () रा॒ष्ट्रमे॒व भ॑वति नास्माद् रा॒ष्ट्रं भ्रँ॑शते ॥ 16

(भा॒ग॒धे॒यं – जु॒ह्वति॑ – पर॒मा – रा॒ष्ट्रं द॑धाति – स॒प्त च॑) (A4)

TS 5.7.5.1

यथा॒ वै पु॒त्रो जा॒तो म्रि॒यत॑ ए॒वं वा॑ ए॒ष म्रि॒यते॑ यस्या॒ग्निरु॒ख्य॑
उ॒द्वाय॑ति॒ यन्नि॒र्मन्थ्यं॑ कु॒र्याद्-वि॒च्छि॒न्धाद्-भ्रा॒तृव्य॑मस्मै॒ जनये॑त् स
ए॒व पुनः॑ प॒रीद्ध्यः॒ स्वादे॒वैनं॑ यो॒नैर्जन॑यति॒ नास्मै॑ भ्रा॒तृव्यं॑ जनयति॒
तमो॑ वा ए॒तं गृ॒ह्णाति॑ यस्या॒ग्निरु॒ख्य॑ उ॒द्वाय॑ति॒ मृत्यु॑स्तमः॒ कृष्णं॑
वा॒सः कृ॒ष्णा धे॒नुर्दक्षि॑णा॒ तम॑सै - [] 17

TS 5.7.5.2

-व तमो॑ मृत्यु॒मप॑ ह॒ते हि॒रण्यं॑ द॒दाति॑ ज्योति॒र्वै हि॒रण्यं॑ ज्योति॒षैव॑
तमो॑ऽप॒ ह॒तेऽथो॑ तेजो॒ वै हि॒रण्यं॑ तेज॒ एवाऽऽ॒त्मन्॑ ध॒त्ते सु॒वर्नं॑
घ॒र्मः स्वा॒हा सु॒वर्ना॒र्कः स्वा॒हा सु॒वर्नं॑ शु॒क्रः स्वा॒हा सु॒वर्नं॑ ज्योतिः॒
स्वा॒हा सु॒वर्नं॑ सूर्यः॒ स्वा॒हा ऽर्को॑ वा ए॒ष यद॒ग्निर॒सावा॑दि॒त्यो- [] 18

TS 5.7.5.3

ऽश्व॑मे॒धो यदे॒ता आ॒हुती॑ जु॒होत्य॑र्का-श्वमे॒धयो॒रेव॑ ज्योती॒ष्णि
सं द॑धात्येष॒ ह त्वा॑ अ॒र्काश्व॑मे॒धी यस्यै॒तद॒ग्नौ क्रि॑यत॒
आपो॑ वा इ॒दम॑ग्रे॒ सलि॑लमासीत् स ए॒तां प्र॒जाप॑तिः प्रथ॒मां

चि॒तिम॑प॒श्यत् तामु॑पा॒धत्त॒ तदि॒यम॑भवत् तं वि॒श्वक॑र्माऽब्रवी॒दुप॑
त्वाऽऽया॒नीति॑ नेह॒ लोको॑ऽस्तीत्य॑ – [] 19

TS 5.7.5.4

–ब्रवी॒थ् स ए॒तां द्वि॒तीयां॑ चि॒तिम॑प॒श्यत् तामु॑पा॒धत्त॒ तद॒न्तरि॑क्षम॒भवत्
स य॒ज्ञः प्र॒जाप॑तिमब्रवी॒दुप॑ त्वाऽऽया॒नीति॑ नेह॒ लोको॑ऽस्तीत्य॑ब्रवी॒थ्
स वि॒श्वक॑र्माणमब्रवी॒दुप॑ त्वाऽऽया॒नीति॑ केन॑ मोपै॒ष्यसी॑ति
दि॒श्याभि॑रित्यब्रवीत् तं दि॒श्याभि॑रुपैत् ता उपा॒धत्त॒ ता दि॒शो – [] 20

TS 5.7.5.5

ऽभव॑न्थ् स परमे॒ष्ठी प्र॒जाप॑तिमब्रवी॒दुप॑ त्वाऽऽ*या॒नीति॑ नेह
लोको॑ऽस्तीत्य॑ब्रवी॒थ् स वि॒श्वक॑र्माणं च य॒ज्ञं चा॒ब्रवी॒दुप॑ वा॒मा
ऽया॒नीति॑ नेह॒ लोको॑ऽस्तीत्य॑ब्रूता॒ꣳ स ए॒तां तृ॒तीयां॑ चि॒तिम॑प॒श्यत्
तामु॑पा॒धत्त॒ तद॒साव॑भवत् स आ॒दित्यः॑ प्र॒जाप॑ति–

मब्रवी॒दुप॑ त्वा – [] 21

TS 5.7.5.6

ऽया॒नीति॑ नेह॒ लोको॑ऽस्तीत्य॑ब्रवी॒थ् स वि॒श्वक॑र्माणं च य॒ज्ञं
चा॒ब्रवी॒दुप॑ वा॒माऽया॒नीति॑ नेह॒ लोको॑ऽस्तीत्य॑ब्रूता॒ꣳ स

परमे॒ष्ठिनम॒ब्रवी॒दुप॒ त्वाऽऽया॒नीति॒ केन॒ मोपै॒ष्यसी॒ति लोकं॑
 पृ॒णये॒त्यब्र॒वीत् तं॑ लो॒कं पृ॒णयो॒पैत् तस्मा॒दया॒तयाम्नी॑ लोकं
 पृ॒णाऽया॒तयामा॑ ह्यसा - [] 22

TS 5.7.5.7

-वा॒दि॒त्यस्ता॒नृषयो॑ ऽब्रुवन्नुप॒ व आ॒ऽया॒मेति॒ केन॒ न उपै॒ष्यथे॒ति
 भू॒म्नेत्य॑ब्रुवन् तान् द्वाभ्यां॑ चि॒तीभ्यामु॒पायन्थ् स पञ्च॑चि॒तीकः॑
 सम॑पद्यत य एवं वि॒द्वानग्निं॑ चि॒नुते॑ भू॒याने॒व भव॑त्यभीमान्
 लो॒काञ्ज॑यति वि॒दुरे॒नं दे॒वा अथो॑ ए॒तासा॑मे॒व दे॒वता॑नाञ्
 सायु॑ज्यं गच्छति ॥ 23

(तम॑सा - ऽऽदि॒त्यो - ऽस्ती॒ति - दि॒श - आ॒दि॒त्यः

प्र॒जाप॑तिमब्रवीदुप॒ त्वा - ऽसौ - पञ्च॑च॒त्वारि॑ञ्शच्च) (A5)

TS 5.7.6.1

वयो॑ वा अ॒ग्निर्य॑द॒ग्निचित् पक्षि॑णोऽ॒श्नीया॑त् तमे॒वाग्नि॑म॒द्यादा॑-
 ति॒माच्छे॑त् सँव॒थ्स॒रं व्र॑तं च॒रेत् सँव॒थ्स॒रञ् हि व्र॑तं नाति॑ प॒शुर्वा
 एष॑ यद॒ग्निर्हि॒नस्ति॒ खलु॒ वै तं प॒शुर्य॑ ए॒नं पु॒रस्ता॑त् प्र॒त्यञ्च॑मु॒पच॑रति॒

तस्मात् पश्चात् प्राडुपचर्य आत्मनोऽहिंसायै तेजोऽसि तेजो मे
यच्छ पृथिवीं यच्छ – [] 24

TS 5.7.6.2

पृथिव्यै मा पाहि ज्योतिरसि ज्योतिर्मे यच्छान्तरिक्षं यच्छान्तरिक्षान्मा
पाहि सुवरसि सुवर्मे यच्छ दिवं यच्छ दिवो मा पाहीत्याहैताभिर्वा
इमे लोका विधृता यदेता उपदधात्येषां लोकानां विधृत्यै
स्वयमातृण्णा उपधाय हिरण्येष्टका उपदधातीमे वै लोकाः
स्वयमातृण्णा ज्योतिर्.हिरण्यं यथ् स्वयमातृण्णा उपधाय – [] 25

TS 5.7.6.3

हिरण्येष्टका उपदधाती-मानेवैताभि-लोका-ज्ज्योतिष्मतः कुरुतेऽथो
एताभिरेवास्मा इमे लोकाः प्र भान्ति यास्ते अग्ने सूर्ये रुच उद्यतो
दिवमातन्वन्ति रश्मिभिः ।

ताभिः सर्वाभी रुचे जनाय नस्कृधि ॥

या वो देवाः सूर्ये रुचो गोष्वश्वेषु या रुचः ।

इन्द्रा॑ग्नी॒ ताभिः॑ सर्वा॒भी रुचं॑ नो धत्त बृहस्पते ॥

रुच॑न्नो धेहि – [] 26

TS 5.7.6.4

ब्राह्म॑णेषु रुच॒न् राज॑सु नस्कृ॒धि ।

रुचं॑ वि॒श्येषु॑ शू॒द्रेषु॑ मयि॑ धेहि रुचा॒ रुचं॑ ॥

द्वेधा॑ वा अ॒ग्निं चि॒क्या॒नस्य॑ यश॑ इन्द्रि॒यं गच्छ॑त्यग्निं

वा चि॒तमी॒जानं॑ वा यदे॒ता आहु॑तीर्जु॒होत्या॒त्मन्ने॒व यश॑ इन्द्रि॒यं धत्त॑

ईश्व॑रो वा ए॒ष आ॒र्तिमा॒र्तो॒र्योऽग्निं॑ चि॒न्वन्न॑धि॒ क्राम॑ति॒ तत्त्वा॑ यामि॒

ब्रह्म॑णा वन्द॒मान॑ इति॑ वारु॒ण्यर्चा॑ – [] 27

TS 5.7.6.5

जुहु॑याच्छान्ति॒रेवैषा॑ ऽग्नेर्गु॒प्तिरा॒त्मनो॑ ह॒विष्कृ॑तो वा ए॒ष योऽग्निं॑

चि॒नुते॑ यथा॒ वै ह॒विः स्क॑न्दत्ये॒वं वा॑ ए॒ष स्क॑न्दति॒ योऽग्निं॑ चि॒त्वा

स्त्रि॒यमु॒पैति॑ मै॒त्रावरु॑ण्याऽऽ*मि॒क्षया॑ यजेत॒ मैत्रा॑वरु॒णता॑ –

मेवो॒पैत्या॒त्मनो॑ ऽस्क॑न्दाय॒ यो वा अ॒ग्निमृ॑तु॒स्थां वेद॑तुर्ऋ॒तुरस्मै॑

कल्प॑मान॒ एति॑ प्रत्ये॒व तिष्ठ॑ति सँव॒थ्सरो॑ वा अ॒ग्निर् – [] 28

TS 5.7.6.6

ऋ॒तु॒स्थास्तस्य॑ वस॒न्तः शिरो॑ ग्री॒ष्मो दक्षि॑णः प॒क्षो व॒र्षाः
 पु॒च्छ॑ शरदु॒त्तरः॑ प॒क्षो हे॒मन्तो॑ म॒द्ध्यं पू॒र्वप॒क्षा-श्रि॒तयोऽप॒रप॒क्षाः
 पु॒रीष-म॒होरा॒त्राणी॑ष्टका ए॒ष वा अ॒ग्निर्ऋ॒तुस्था॑ य ए॒वं
 वे॒द॒र्तुर्ऋ॒तुर॒स्मै क॒ल्प॒मान॑ ए॒ति प्र॒त्ये॒व ति॒ष्ठति॑ प्र॒जाप॒तिर्वा
 ए॒तं ज्यै॑ष्ठ्य॒कामो॑ न्य॒धत्त॑ ततो॒ वै स ज्यै॑ष्ठ्यम॒गच्छ॑द्य
 ए॒वं वि॒द्वान॒ग्निं चि॒नुते॑ () ज्यै॑ष्ठ्यमे॒व ग॑च्छति ॥ 29

(पृ॒थि॒वीं यँ॑च्छ - यथ् स्व॒यमा॒तृ॒ण्णा उप॒धाय॑ - धे॒ह्य - चा -
 ग्नि - श्रि॒नुते॑ - त्री॒णि च) (A6)

TS 5.7.7.1

यदा॑कू॒ताथ् स॒मसु॑स्रो॒द्धृदो॑ वा म॒नसो॑ वा संभृ॒तं चक्षु॑षो वा ।
 तम॒नु प्रेहि॑ सु॒कृ॒तस्य॑ लो॒कं य॑त्र॒र्षयः॑ प्रथ॒मजा॑ ये पु॒रा॒णाः ॥
 ए॒तं स॒धस्थ॑ परि॒ ते द॒दामि॑ यमा॒वहा॑च्छे॒वधिं॑ जा॒तवे॑दाः ।
 अ॒न्वा॒गन्ता॑ य॒ज्ञप॑तिर्वो अत्र॒ तं स्म॑ जानी॒त पर॑मे व्यो॒मन् ॥

जानी॑तादे॒नं पर॒मे व्यो॒मन् दे॒वाः सध॑स्था वि॒द रू॒पम॑स्य ।

यदा॑गच्छात् – [] 30

TS 5.7.7.2

पथि॑भिर्दे॒वयानै॑रिष्टा॒पूर्ते कृ॑णुतादा॒विर॑स्मै ॥

सं प्र च्य॑वद्ध्व॒मनु॒ सं प्र या॒ताग्ने॑ पथो॒ दे॒वयाना॑न् कृ॑णुद्ध्वं ।

अ॒स्मिन्थ् सध॑स्थे अ॒ध्युत्तर॑स्मिन् विश्वे॑ दे॒वा यज॑मानश्च सीदत ॥

प्र॒स्तरे॑ण परि॒धिना॑ सु॒चा वे॒द्या च ब॒र्हिषा॑ ॥

ऋ॒चेमं॑ य॒ज्ञं नो॑ वह॒ सुव॑र्दे॒वेषु॑ गन्त॒वे ॥

यदि॑ष्टं य॒त् परा॑दानं॒ यद॒त्तं या॑ च दक्षि॒णा ।

त – [] 31

TS 5.7.7.3

–द॒ग्निर्वै॑श्वक॒र्मणः॑ सुव॑र्दे॒वेषु॑ नो दधत् ॥

येना॑ स॒हस्रं॑ व॒हसि॑ येना॒ग्ने सर्व॑वेदसं ।

तेने॒मं य॒ज्ञं नो॑ वह॒ सुव॑र्दे॒वेषु॑ गन्त॒वे ॥

येना॒ग्ने दक्षि॑णा यु॒क्ता य॒ज्ञं व॒हन्त्यृ॒त्विजः॑ ।

तेने॒मं य॒ज्ञं नो॑ वह॒ सुव॑र्दे॒वेषु॑ गन्त॒वे ॥

ये॒नाग्ने॑ सु॒कृतः॑ प॒था म॒धो॒र्ध्रा॑ व्या॒नशुः॑ ।

ते॒नेमं॑ य॒ज्ञं नो॑ वह॒ सुव॑र्दे॒वेषु॑ गन्त॒वे () ॥

यत्र॑ धा॒रा अ॒नपे॑ता म॒धो॒र्धृत॑स्य च याः ।

तद॒ग्निर्वै॑श्व॒कर्म॑णः सुव॑र्दे॒वेषु॑ नो दधत् ॥ 32

(आ॒गच्छा॑त् - त - द्वा॒नशु॑ स्ते॒नेमं॑ य॒ज्ञं नो॑

वह॑ सुव॑र्दे॒वेषु॑ गन्त॒वे - चतु॑र्दश च) (A7)

TS 5.7.8.1

यास्ते॑ अग्ने॑ स॒मिधो॑ या॒नि धा॒म या जि॒ह्वा जा॑तवेदो॒ यो अ॒र्चिः ।

ये ते॑ अग्ने॑ मे॒डयो॑ य इ॒न्द्रव॑स्तेभि॒रात्मा॑नं चि॒नुहि॑ प्रजा॒नन् ॥

उ॒थ्सन्न॑य॒ज्ञो वा ए॒ष यद॑ग्निः किं वा॒ऽहै॒तस्य॑ क्रि॒यते॑

किं वा॑ न यद्वा अ॒ध्वर्यु॑-र॒ग्नेश्चि॒न्वन्-॑न्तरेत्या॒त्मनो॑ वै

तद॒न्तरे॑ति यास्ते॑ अग्ने॑ स॒मिधो॑ या॒नि - [] 33

TS 5.7.8.2

धा॒मेत्या॑है॒षा वा अ॒ग्नेः स्व॑यं चि॒तिर॒ग्निरे॒व तद॑ग्निं

चि॒नोति॑ ना॒ध्वर्यु॑रा॒त्मनो॑ऽन्तरे॑ति चत॒स्र आ॒शाः

प्र॒चर॑न्त्व॒ग्नय॑ इ॒मं नो॑ य॒ज्ञं न॑यतु प्र॒जा॒नन् ।
 घृ॒तं पि॒न्वन्न॒जर॑ सु॒वीरं॑ ब्र॒ह्म स॒मिद्-भ॑व॒त्याहु॑तीनां ॥
 सु॒वर्गा॒य वा ए॒ष लो॒कायो॑प॒ धीय॑ते यत् कू॒र्मश्च॑त॒स्र आ॒शाः
 प्र च॒रन्त्व॒ग्नय॑ इ॒त्याह॑ - [] 34

TS 5.7.8.3

दि॒श ए॒वैते॒न प्र जा॑नाती॒मं नो॑ य॒ज्ञं न॑यतु प्र॒जा॒नन्नि॒त्याह॑ सु॒वर्ग॑स्य
 लो॒कस्या॒भिनी॑त्यै ब्र॒ह्म स॒मिद्-भ॑व॒त्याहु॑तीना-मि॒त्याह॑ ब्र॒ह्मणा॑ वै
 दे॒वाः सु॒वर्गं॑ लो॒कमा॑यन् यद्-ब्र॒ह्मण्व॑त्योप॒दधा॑ति ब्र॒ह्मणै॒व तद्-
 यज॑मानः सु॒वर्गं॑ लो॒कमे॑ति प्र॒जाप॑ति॒र्वा ए॒ष यद॑ग्निस्तस्य प्र॒जाः
 प॒शवः॑ छन्दा॒सि रू॒पं स॒र्वान् वर्णा॑निष्ट॒कानां॑ () कुर्या॑द् रू॒पेणै॒व
 प्र॒जां प॒शून् छन्दा॑स्य॒व रु॒न्धेऽथो॑ प्र॒जाभ्य॑ ए॒वैनं॑ प॒शुभ्यः॑ छन्दा॒भ्यो
 ऽव॑रु॒द्ध्य चि॑नुते ॥ 35

(यान्य - ग्नय इत्याहे - ष्टकानां - षोडश च) (A8)

TS 5.7.9.1

मयि॑ गृ॒ह्णाम्य॑ग्रे अ॒ग्निं रा॒यस्पो॑षाय सु॒प्रजा॑स्त्वाय सु॒वीर्या॑य ।
 मयि॑ प्र॒जां मयि॑ वर्चो॑ दधा॒म्यरि॑ष्टाः स्याम त॒नुवा॑ सु॒वीराः॑ ॥

यो नो अ॒ग्निः पि॒तरो ह॒थस्व॒न्तर॒मर्त्यो॑ म॒र्त्याँ॑ आ॒वि॒वेश॑ ।
तमा॒त्मन् परि॑ गृ॒ह्णी॒महे॑ व॒यं मा सो॑ अ॒स्माँ॑ अ॒वहा॒य परा॑ गात् ॥
यद॒ध्व॒र्युरा॒त्मन्न॒ग्निम॑-गृ॒हीत्वा॒ऽग्निं॑ चि॒नुया॒द्यो॑ऽस्य॒
स्वो॑ऽग्निस्तमपि - [] 36

TS 5.7.9.2

यज॑मानाय चि॒नुया॒द॒ग्निं॑ ख॒लु वै प॒शवो॑ऽनूप॑ तिष्ठन्तेऽप॒क्रामु॑का
अ॒स्मात् प॒शवः॑ स्यु॒र्मयि॑ गृ॒ह्णाम्य॑ग्रे अ॒ग्निमि॒त्याहा॑ऽऽत्म॒न्नेव॑
स्वम॒ग्निं दा॑धार ना॒स्मात् प॒शवो॑ऽप॒ क्राम॑न्ति ब्र॒ह्मवा॒दिनो॑ वदन्ति
यन्मृ॒च्चाऽऽप॑श्चा॒ग्नेर॒नाद्य॑मथ॒ कस्मान्मृ॒दा चा॒द्भिश्चा॒ग्निश्ची॑यत॒
इति॑ यद॒द्भिः सं॒ यौ - [] 37

TS 5.7.9.3

-त्यापो॑ वै सर्वा॑ दे॒वता॑ दे॒वता॑भिरे॒वैनँ॑ सँ॒ सृज॑ति
यन्मृ॒दा चि॒नोती॒यं वा॑ अ॒ग्निर्वै॑श्चा॒नरो॑ऽग्नि॒नैव॑ तद॒ग्निं चि॑नोति
ब्र॒ह्मवा॒दिनो॑ वदन्ति॒ यन्मृ॒दा चा॒द्भिश्चा॒ग्निश्ची॑यतेऽथ॒

क॒स्मा॒द॒ग्निरु॒च्यत॒ इति॑ यच्छ॒न्दोभि॑-श्चि॒नो॒त्य॒ग्नयो॒ वै छ॒न्दा॒सि
त॒स्मा॒द॒ग्निरु॒च्यते॑ऽथो॒ इयं॑ वा॒ अ॒ग्निर्वै॑श्चा॒नरो॒ य - [] 38

TS 5.7.9.4

-न्मृ॒दा चि॒नोति॑ त॒स्मा॒द॒ग्निरु॒च्यते॑ हि॒रण्ये॒ष्टका॑ उप॒ दधा॑ति ज्योतिर्वै
हि॒रण्यं ज्योति॑रे॒वाऽस्मिन्॑ दधा॒त्यथो॒ तेजो॒ वै हि॒रण्यं तेज॑ ए॒वाऽऽ*त्मन्
धत्ते॒ यो वा अ॒ग्निः सर्व॑तो॒मुखं॑ चि॒नुते॑ सर्वा॒सु प्र॒जास्व॑न्नम॒त्ति सर्वा॑
दि॒शोऽभि॑ जयति गाय॒त्रीं पु॒रस्ता॑दुप॒ दधा॑ति त्रि॒ष्टुभं॑ दक्षि॒णतो॑ जग॒तीं
पश्चा॑दनु॒ष्टुभ॑मुत्तरतः प॒ङ्क्तिं म॑द्ध्य ए॒ष वा () अ॒ग्निः सर्व॑तो॒मुखस्तं॑
य॒ एवं वि॒द्वाञ्चि॑नुते सर्वा॒सु प्र॒जास्व॑न्नम॒त्ति
सर्वा॑ दि॒शोऽभि॑ जय॒त्यथो॑ दि॒श्येव॑ दि॒शं प्र॑ वयति तस्मा॑द्-दि॒शि
दिक् प्रो॒ता ॥ 39

(अ॒पि-स॒यौति॑-वैश्चा॒नरो॒ य-देष॑ वै-पञ्च॑वि॒ंशति॑श्च) (A9)

TS 5.7.10.1

प्र॒जाप॑तिर॒ग्निम॑सृजत सौ॒ऽस्मात् सृ॒ष्टः प्रा॒ङ् प्रा॒ऽ*द्रव॑त् तस्मा॒
अश्वं॑ प्रत्यास्यथ् स दक्षि॒णाऽऽव॑र्तत तस्मै॑ वृ॒ष्णिं प्रत्या॑स्यथ्
स प्रत्य॑ङ्गाऽव॑र्तत तस्मा॑ ऋ॒षभं॑ प्रत्यास्यथ् स उद॑ङ्गाऽव॑र्तत

तस्मै॑ ब॒स्तं प्र॒त्यास्य॑त् स ऊ॒र्ध्वोऽ॒द्रव॑त् तस्मै॑ पु॒रुषं॑
प्र॒त्यास्य॑द्यत् प॒शुशी॒र्षाण्यु॑प॒दधा॑ति स॒र्वत॑ ए॒वैन॑ - [] 40

TS 5.7.10.2

मव॑रुद्ध्य चि॒नुत॑ ए॒ता वै प्रा॑णभृ॒त-श्चक्षु॑ष्मती॒रिष्ट॑का यत्
प॒शुशी॒र्षाणि॑ यत् प॒शुशी॒र्षाण्यु॑प॒दधा॑ति ताभि॒रेव॑ यज॒मानोऽमु॑ष्मिन्
लो॒के प्रा॑णित्यथो ताभि॒रेवास्मा॑ इ॒मे लो॒काः प्र भा॑न्ति मृ॒दाऽभिलि॑प्योप
दधा॑ति मे॒द्ध्यत्वा॑य प॒शुर्वा ए॒ष यद॑ग्निर॒न्नं प॒शव॑ ए॒ष खलु॑ वा
अ॒ग्निर्य॑त् प॒शुशी॒र्षाणि॑ यं का॒मये॑त क॒नीयोऽस्या॑न्नञ् - [] 41

TS 5.7.10.3

स्या॑दिति सं॒तरां तस्य॑ प॒शुशी॒र्षाण्यु॑प द॒द्ध्यात् क॒नीय॑ ए॒वास्या॑न्नं
भव॑ति यं का॒मये॑त स॒माव॑दस्या॑न्नञ् स्या॑दिति म॒द्ध्यत॑स्तस्योप
द॒द्ध्यात् स॒माव॑-दे॒वास्या॑न्नं भव॑ति यं का॒मये॑त भू॒योऽस्या॑न्नञ्
स्या॑दित्यन्तेषु तस्य॑ व्यु॒दूह्यो॑प द॒द्ध्याद॑न्तत ए॒वास्मा॑ अ॒न्नम॑व रु॒न्धे
भू॒योऽस्या॑न्नं भव॑ति () ॥ 42

(ए॒न- म॒स्या॑न्नं - भू॒योऽस्या॑न्नं भव॑ति) (A10)

TS 5.7.11.1

स्ते॒गान् द॒ष्ट्रा॒भ्यां॑ म॒ण्डू॒कान् जं॒भ्ये॒भिरा॒दकां॑-खा॒देनो॒र्ज॒
स॒ सू॒देना॑*ऽरण्यं॑ जा॒न्बी॒लेन॑ मृदं॑ ब॒स्व॒र्वे॒भिः
शर्क॑रा॒भिरव॑का॒मव॑का॒भिः शर्क॑रामु॒त्सादे॑न जि॒ह्वा॒मव॑क्र॒न्देन॑
ता॒लु॒ सर॑स्वतीं जि॒ह्वाग्रे॑ण ॥ 43

(स्ते॒गान् - द्वाविं॑शतिः) (A11)

TS 5.7.12.1

वाज॑ ह॒नू॒भ्याम॒प आ॒स्ये॒नाऽऽ*दि॒त्या-ञ्छ॑म॒श्रु॒भि-रु॒पया॑म-
म॒धरे॑णो॒ष्ठेन॑ स॒दुत्त॑रे॒णान्त॑रे॒णा-नू॒का॒शं प्र॑का॒शेन॑ बा॒ह्य स्त॑नयि॒न्तुं
नि॒र्बा॒धेन॑ सू॒र्याग्नी॑ चक्षु॒भ्यां वि॒द्युतौ॑ क॒नान॑का॒भ्याम॒शनिं॑ म॒स्तिष्के॑ण
ब॒लं म॒ज्ज॑भिः ॥ 44

(वाजं॑ पञ्चविं॑शतिः) (A12)

TS 5.7.13.1

कू॒र्मा-ञ्छ॑फै॒रच्छ॑ला॒भिः क॒पि॒ज्ज॒लान्त्साम॑ कु॒ष्ठिका॑भिर्ज॒वं
ज॒ङ्घा॑भि॒रग॒दं जा॒नु॒भ्यां वी॒र्यं॑ कु॒हा॒भ्यां भ॒यं प्र॑चा॒ला॒भ्यां

गुहोपपक्षाभ्या-मश्विनाव॑ साभ्यामदिति॑ शीर्ष्णा निर्ऋतिं
निर्जाल्मकेन॑ शीर्ष्णा ॥ 45

(कूर्मान्-त्रयोविंशतिः) (A13)

TS 5.7.14.1

योक्त्रं॑ गृद्ध्राभिर्युगमानतेन॑ चित्तं॑ मन्याभिः॑ संक्रोशान् प्राणैः॑
प्रकाशेन॑ त्वचं॑ पराकाशेनान्तरां॑ मशकान्॑ केशैरिन्द्र॑ स्वपसा॑
वहेन॑ बृहस्पति॑ शकुनिसादेन॑ रथमुष्णिहाभिः॑ ॥ 46

(योक्त्र - मेकविंशतिः) (A14)

TS 5.7.15.1

मित्रावरुणौ॑ श्रोणीभ्यामिन्द्राग्नी॑ शिखण्डाभ्या-मिन्द्राबृहस्पती॑
ऊरुभ्यामिन्द्राविष्णू॑ अष्टीवद्भ्या॑ सवितारं॑ पुच्छेन॑
गन्धर्वाञ्छेपेना-फसरसो॑ मुष्काभ्यां॑ पवमानं॑ पायुना॑ पवित्रं॑
पोत्राभ्यामाक्रमणं॑ स्थूराभ्यां॑ प्रतिक्रमणं॑ कुष्ठाभ्यां॑ ॥ 47

(मित्रावरुणौ - द्वाविंशतिः) (A15)

TS 5.7.16.1

इन्द्रस्य॑ क्रो॒डो ऽदि॑त्यै पा॒जस्यं॑ दि॒शां ज॒त्रवो॑ जी॒मू॒तान्॑
हृद॑यौप॒शाभ्या॑-मन्त॑रि॒क्षं पु॒रि॒तता॑ नभ॑ उ॒दर्ये॑णेन्द्रा॒णीं प्ली॒हा
वल्मी॑कान् क्लो॒म्ना गि॒रीन् प्ला॒शिभिः॑ स॒मु॒द्रमु॒दरे॑ण वैश्वा॒नरं॑
भस्म॑ना ॥ 48

(इन्द्रस्य - द्वाविंशतिः) (A16)

TS 5.7.17.1

पू॒ष्णो वनि॑ष्ठुरन्धा॒हेः स्थू॑रगु॒दा सर्पा॑न् गु॒दाभिर्. ऋ॒तून् पृ॒ष्ठीभिर्दि॑वं
पृ॒ष्ठेन॑ वसू॒नां प्र॒थ॒मा की॒कसा॑ रु॒द्राणां॑ द्वि॒तीया॑ ऽऽदि॒त्यानां॑ तृ॒तीया
ऽङ्गि॑रसां चतु॒र्थी सा॒द्द॒ध्यानां॑ पञ्च॒मी वि॒श्वेषां॑ दे॒वानां॑ ष॒ष्ठी ॥ 49

(पूष्ण - श्रुतुर्विंशतिः) (A17)

TS 5.7.18.1

ओ॒जो ग्री॒वाभिर्-नि॒र्ऋ॑तिम॒स्थभि॑रिन्द्र॒ स्वप॑सा वह॑न रु॒द्रस्य॑
वि॒चलः॑ स्क॒न्धो ऽहो॑रा॒त्रयो॑र्द्वि॒तीयो॑ ऽर्ध॒मासा॑नां तृ॒तीयो॑ मा॒सां
चतु॒र्थ ऋ॒तूनां॑ पञ्च॒मः सँव॑त्सरस्य ष॒ष्ठः ॥ 50

(ओजो - विंशतिः) (A18)

TS 5.7.19.1

आ॒न॒न्दं॑ न॒न्द॒थु॒ना॒ का॒मं॑ प्र॒त्या॒सा॒भ्यां॑ भ॒य॒ꣳ शि॒ती॒म॒भ्यां॑ प्र॒शि॒षं॑
प्र॒शा॒सा॒भ्यां॑ सूर्या॒चन्द्र॑मसौ वृ॒क्ष्या॒भ्यां॑ श्याम॒श॒ब॒लौ॑ म॒त॒स्ना॒भ्यां॑
ꣳव्यु॒ष्टि॒ꣳ रू॒पेण॑ नि॒मृ॒क्ति॒म॒रू॒पेण॑ ॥ 51

(आ॒न॒न्द॒ꣳ – षोड॑श) (A19)

TS 5.7.20.1

अ॒ह॒र्मा॒ꣳसे॒न रा॒त्रिं॑ पी॒व॒सा॒ऽपो॑ यू॒षेण॑ घृ॒त॒ꣳ र॒से॒न श्यां॑ व॒स॒या
दू॒षी॒का॒भि॒-ह्रा॒दु॒नि॒-म॒श्रु॒भिः॑ पृ॒ष्वां दि॒व॒ꣳ रू॒पेण॑ नक्ष॒त्रा॒णि प्र॒ति॒रू॒पेण॑
पृ॒थि॒वीं च॒र्म॒णा छ॒वीं छ॒व्यो॑ पा॒कृ॒ताय॑ स्वा॒हा ऽऽल॒ब्धाय॑ स्वा॒हा हु॒ताय॑
स्वा॒हा ॥ 52 (अ॒हर॑ – षा॒वि॒ꣳश॒तिः) (A20)

TS 5.7.21.1

अ॒ग्नेः॑ प॒क्ष॒तिः॑ सर॒स्व॒त्यै नि॒प॒क्ष॒तिः॑ सोम॒स्य तृ॒तीया॒ऽपां॑
च॒तु॒र्थ्यो॒ष॒धी॒नां पञ्च॑मी सँव॒त्स॒र॒स्य ष॒ष्ठी म॒रु॒ताꣳ सप्त॑मी
बृ॒ह॒स्प॒ते॒र॒ष्ट॒मी मि॒त्र॒स्य॑ न॒व॒मी व॒रु॒ण॒स्य द॒श॒मीन्द्र॑स्यैका॒द॒शी वि॒श्वे॑षां
दे॒वानां॑ द्वा॒द॒शी द्या॒वापृ॒थि॒व्योः॑ पा॒र्श्वं य॒म॒स्य पा॒टूरः॑ ॥ 53

(अ॒ग्ने॒-रे॒का॒त्र त्रि॒ꣳश॒त्) (A21)

TS 5.7.22.1

वा॒योः प॒क्षतिः॑ सर॒स्वतो॑ नि॒पक्ष॑ति-श्च॒न्द्रम॑स-स्तृ॒तीया॑ नक्ष॒त्राणां॑
चतु॒र्थी स॒वितुः॑ पञ्च॒मी रु॒द्रस्य॑ षष्ठी॒ सर्पा॑णां सप्त॒म्यर्य॑म्णोऽष्ट॒मी
त्वष्टु॑र्नव॒मी धा॒तुर्द॑श॒मीन्द्रा॑ण्या ए॒काद॑श्यदि॒त्यै द्वा॒दशी॑ द्यावापृथि॒व्योः
पा॒र्श्वं य॒म्यै पा॒टूरः॑ ॥ 54

(वा॒यो - र॒ष्टाविं॑शतिः) (A22)

TS 5.7.23.1

पन्था॑मनू॒वृग्भ्या॑ संत॒तिः स्ना॒वन्या॑भ्या॒ शुका॑न् पि॒त्तेन॑ हरि॒माणं॑
य॒क्ना ह॒लीक्ष्णा॑न् पा॒पवा॑तेन॒ कू॒श्माञ्छ॑कभिः शव॒र्तानू॑वद्ध्येन॒ शुनो॑
वि॒शस॑नेन॒ सर्पा॑न् लो॒हितग॑न्धेन॒ वया॑सि पक्व॒गन्धेन॑ पि॒पीलि॑काः
प्र॒शादे॑न ॥ 55

(पन्थां - द्वा॒विं॑शतिः) (A23)

TS 5.7.24.1

क्र॒मैर॑त्य॒क्रमी॑द्-वा॒जी वि॒श्वैर्दे॒वैर्य॑ज्ञि॒यैः सँ॑वि॒दानः॑ ।
स नो॑ नय सु॒कृ॒तस्य॑ लो॒कं तस्य॑ ते व॒यः स्व॒धया॑ मदे॒म ॥ 56

(क्र॒मै - र॒ष्टाद॑श) (A24)

TS 5.7.25.1

द्यौ॑स्ते॒ पृ॒ष्ठं पृ॒थिवी॑ स॒धस्थ॑मा॒त्मान्तरि॑क्षꣳ समु॒द्रो योनिः॑
सूर्य॑स्ते चक्षु॒र्वातः॑ प्रा॒णश्च॒न्द्रमाः॑ श्रो॒त्रं मा॒साश्चा॑र्ध॒मासाश्च॑
प॒र्वाण्यु॑तवो॒ङ्गानि॑ सँव॒त्सरो॑ म॒हिमा ॥ 57

(द्यौ – पञ्चविंशतिः) (A25)

TS 5.7.26.1

अ॒ग्निः प॒शुरा॑सीत् तेनायजन्त॒ स ए॒तं लो॒कम॑जयद्-यस्मि॒न्नग्निः॑
स ते लो॒कस्तं॑ जै॒ष्यस्य॑थाव जिघ्र वा॒युः प॒शुरा॑सीत् तेनायजन्त॒ स
ए॒तं लो॒कम॑जयद्-यस्मिन् वा॒युः स ते लो॒कस्तस्मा॑त् त्वाऽन्तरे॑ष्यामि
यदि॒ नावजि॑घ्रस्यादित्यः प॒शुरा॑सीत् तेनायजन्त॒ स ए॒तं
लो॒कम॑जयद् यस्मि – ()-न्नादित्यः॑ स ते लो॒कस्तं॑ जै॒ष्यसि॑
यद्यवजि॑घ्रसि ॥ 58

(यस्मि – त्रष्टौ च) (A26)

Prasna Korvai with starting Padams of 1 to 26 Anuvaakams :-

(यो वा अ॒य॒थादे॒वत॒ - न्त्वा॒म॒ग्न॒ - इन्द्र॑स्य॒ - चि॒त्तिं॒ - य॒था वै॒ -
व॒यो वै॒ - यदा॑कू॒ताद् - या॒स्ते अ॒ग्ने - म॒यि गृ॑ह्णामि॒ - प्र॒जाप॑तिः
सोऽ॒स्मात् - स्ते॒गान् - वा॒जं - कू॒र्मान् - यो॒क्त्रं - मि॒त्राव॑रुणा
- विन्द्र॑स्य॒ - पू॒ष्ण - ओ॒ज - आ॒नन्द॒ - मह॑ - र॒ग्ने - वा॒योः
- प॒न्थां - क्र॒मै - द्यौ॒स्ते - ऽग्निः॑ प॒शुरा॑सी॒त् - षड्वि॑ंशतिः)

Korvai with starting Padams of 1, 11, 21 Series of Panchaatis :-

(यो वा - ए॒वाऽऽहु॑ति - म॒भ॒वन् - प॒थि॒भि - र॒व॒रु॒ध्या - ऽऽन॑न्द
- म॒ष्टौ प॑ञ्च॒शत्)

First and Last Padam of Seventh Prasnam of 5th Kandam :-

(यो वा अ॒य॒थादे॒वतं॒ - य॒द्य॒व॒जिघ्र॑सि)

Kaanda Korvai with starting Padams of 7 Prasanams of Kandam 5:-

(सा॒वि॒त्रा॒णि – वि॒ष्णु॑मु॒खा – उ॒थ्स॒न्नय॒ज्ञो – दे॒वा॒सु॒रा – यदे॒के॒न
– हि॒र॒ण्य॒वर्णा॑ – यो वा – स॒प्त)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे सप्तमः प्रश्नः समाप्तः ॥

॥ इति पञ्चमं काण्डं ॥

Details of Anuvakam, Panchati and Padam for Kandam 5

	Anuvakam	Panchati	Padams
Prasna 1	11	59	3081
Prasna 2	12	64	3195
Prasna 3	12	48	2477
Prasna 4	12	58	2906
Prasna 5	24	62	2727
Prasna 6	23	54	2436
Prasna 7	26	58	2582
Total	120	403	19404